


DITÈÈKIIBWA ²

 Ndi . . . anu pashiishe ndambu. Mvwa ne muntu kampanda uvwa wa ciputuku, ciputuku cya dikema, kadi pààbi bìvwa bikèngela bwa mèmè kuya pa diine dîbà adi, bwalu ùvwa bibi, bibi be. Ki mèmè kwendesha kashinyi njila mujima kuumukila ku Michigan, munene wa bampulushi ùvwa mubiikile, ne bikwabo, bwa ne yêyè ùvwa bibi, bibi be. Mpindyewu, kadi's nebilengele; byònsò—byònsò bìdi mu bukòntononyi, pa nanku bìdi bîmpè. Pàdi anu Mukalenge ùbwela, byònsò bìdi mu bukòntononyi dîbà adi, kî mmwômò anyi? Kaa, Yêyè—Yêyè's mmwîmpè be; patùdi twela meeji ku bwîmpè Bwèndè ne luse Lwèndè, ku mushinga wùdiYe naawu kutùdi, ne mushindu mwine wùdi diMutumbisha ne mushinga's we.

Ee, tudi bateete bwa kubanga, twamba ne tudi bafwànyine kwangata nshapita yisatu ya kumpala ya Mukanda wà Efeso. Ne ndi ngeela meeji ne twangàci myaku yisatu ya kumpala, anyi *bikampanda* bisatu bya kumpala mwaba awu. Katùvwa baye kule menemene to, kadi pàmwápa bwa diloolo edi tudi mwa kudifilamu ne mbàbi tuya kule ndambu. Mpindyewu, ndi muswe kwamba ne mèmè ncyèna mulongi wa Bible wa ku tulaasa tutumbuke to, nansha wa kânà, ne ndi kule menemene ne kwikala mwena tèòlòjî, kadi ndi—ndi munange Mukalenge, ne ntu munange kuMukwacila mudimu ne . . . [Mwaneetu wa balume kampanda ùdi wàkula ne Mwaneetu Branham—Muf.]

Muntu kampanda, anu mu bwalu bwa lukasalukasa, mwambe, anu kumpala menemene kwa twètù kutungunuka mpindyewu, mwànà wa bakaji mutekete mu lupitaadi lwà mu Louisville, ne bangangabuka bapiluke bònsò bamulekèle, ùdi munkaci mwa kupùnga ne lufu patùdi twakulangana apa, ne ùdi ùlòmba masambila bwa mwànà ewu. Twètù bu beena Kilisto, mmudimu wètù bwa kwinyika mitu, mpindyewu, bwa disambila.

Mukalenge wetù wa ngàsà, kacyèna anu mudimu wètù to, kadi ndyèsè dyetu, ne ndijinga dyetu—dyetu bwa kwinyika mitu diloolo edi twètù bu ekeleeziya, bu kasumbu kàà bantu babiikidiibwe bwa kupatuka, beena kwitabuuya kaaba aka diloolo edi, bwa kulongesha Diyì Dyebe, diikàle ditushikika mu Mubidi bilondèshìle myaba, yitùdi ne cya kwikala, ne mutùdi mwa kukwacila mudimu pamwe mu mushindu mukùmbàne bu bidimba bya Mubidi wà Kilisto.

² Nenku mpindyewu tudi babiikidiibwe bwa kuya dyakamwe kùdi Nzambi. Ne yònsò wa kutùdi twètù baataatù ùdi ùdyàmbidila ne, bu mwine awu wìkala mwànà mutekete wa bakaji mulela wetù twètù, mushindu mwine wùvwà myoyi

yetu mifwànyine kulakuka kapyà ne kusaama munda mwètù, ne twètù bafwànyine kubiikila maekeleeziya ku telefone bwa kwenzawu disambila's. Kadi mwoyi wà taatù kampanda wùdi wùlákuka kapyà, wùsaama. Mukalenge, swaku bwa Mupersona munene wa Nyuma Mwímpè awu alwe anu mpindyewu ku mwoyi wà yêyè taatù awu. Umushaku mpatà yònsò nansha ya mikese, ne disaama dyònsò, nenku enzaku bwa yêyè amanye ne Wèwè udi Nzambi ne kakwenaku disaamà didi mwa kwimana mu Bwikadi Bwebe to pàdi mudimu Wèbè wà kùdi Nzambi mukumbajiibwe kùdi ekeleeziya Webè ne cisàmbà Cyebe.

³ Ne bu mùdìbi ne munda mwa lumingu lujimà elu, tudi tusambila, kubangila ku dyalumingu dishààle ndi mwele meeji ku mishindu eyi anyi ku bya dikwata naabi mudimu bya disambila ebi. Katwena ne cingoma ciine cya ndolò to bwa ku dimona dya pa buloba, kadi ndundu wa nyuunyi mukese ewu ngwa ùshebeyangana pàdiye mukwaciibwe mu minu ya diitabuuja. Èyi Mukalenge, swaku bwa masambila etu afike ku kiipacila, lufu lùdi lulembèlèle kuulu kwa mwànà awu kuntu kwàka alu, swaku bwa lùsunsudiibwè; mîdimà, mifitù, yùmukè ku luseke lwà kalaalu kàà mwànà awu, mwànà wa mu diboko anyi mwànà awu, mwànà mutekete wa bakaji awu. Nenku swaku bwa Bukènkè bunene bwa Bwikadi bwa Nzambi bùteemè pambidi pèndè. Swaku bwa àpatukè mu lupitaadi amu, mwànà wa mubidi tumatuma.

⁴ Nzambi, tudi bamanye ne dyàmwàmwa dya musulu dyàdya bananga beetu mbindile, ne mbya butumbi. Kadi tudi banange bânà beetu bakese. Nenku tudi tulomba, Mukalenge, ciine aci bwa butumbi Bwebe, bwa Wèwè ulameku mwoyi wà mwànà awu. Twètù, bu ekeleeziya Webe, tudi tutandisha lufu alu, twamba ne: "Shààla mwimane anu kaaba kamwe. Kwèna mwa kwangata mwànà awu nansha, bwalu tudi tunana mwoyi wèndè bwa bwalu bwa Bukalenge bwa Nzambi." Filaku bintu ebi, Mukalenge, bwa kuyabi buludi ku kiipacila patùdi tubiludika apa, mu Dîna dya Yesu Kilisto, Musungidi wetù. Amen.

⁵ Tudi twitabuuja anyi? Ncyèna mumanye cîmvwà mêmè ewu mufwànyine kwenza to bu nncìvwa mwena Kilisto. Ncìvwaku mufwànyine kutungunuka ne kwikalaku to. Kakwena cintu nansha cimwe cya kwikadila ne mwoyi to, pa kuumusha anu difikisha dya bakwabo ku disungidiibwa, ki cìdi citàmbe bwímpè cîndiku mêmè ewu mumanye.

⁶ Mpindyewu, diloolo edi tudi baswe anu kubanga ndambu dyambulula dya dileesona dyetu dya musangu mushààle. Nenku nênteetè kubala, bwalu, nshapita mujimà awu, bu mêmè ne mushindu diloolo edi. Pa nanku mu dyalumingu mu dinda nebikengela pàmwäpa bwa mêmè kubàmbakaja dyalumingu mu dinda ne diloolo, piikalàbi bikùmbàne nanku, bwa kuteeta kubwela mu mmwenekelu wa cîndi muswe bwa ekeleeziya kumonaye awu. Kaa, s'mbya butumbi bwa wèwè kupeta mwaba

webe! Ne muntu nansha umwe kèna mwa kwenza cintu nansha cimwe pàdiye kàyi mumanye menemene cidiye wènza to.

7 Anjì ambabi tũng bu wêwè ne cya kwikala...kupandiibwa, ne kwikàle ngangabuka wa citende mucikàle ùcifuminakù ku dijikija tulaasa twèndè ne yêyè mmufwànyine...kacya kàyi mwanjì kupandanganaku to. Nansha mùdibi ne, yêyè nnsongààlùmè wa citende ne mulenga kwisù, ne nsuki myela cisaku mifinunuja, ne muvwale mvwadilu wa kapelu, wa mankenda, ne bikwabo byònsò. Bu yêyè mwa kwamba ne: “Ngààmanyi kunoona twele, ne ngààshipi twishì ne manga ku byamu byònsò bya mudimu ne bikwabo byònsò.” Kadi wêwè’s udi mufwànyine kudyumvwa anu ndambu mushindu kampanda wà mwoyi kuulukuulu pa bwalu abu. Bwànyì mème mbipiciibwe ne mwangate ngangabuka wa kale ukààdikù mupandangane kwònsò eku misangu ne misangu, kumpala kwa ne nya’ nkààdi nswa bwa kungeelabo keele. Ndi—ndi muswe kumanya muntu kampanda wa kàyi ùcìjikijilakù tulaasa to, ndi mèmè muswe muntu kampanda mwikàlekù ne ndambu wa malabula.

8 Nenu Kampanda udi mutàmbe bwîmpè ku malabula ùndiku mèmè ewu mumanye, wa dibìikidisha diloolo edi, n’Nyuma Mwîmpè. Yêyè awu ki Ngangabuka munene ne Mulongeshi munene wa Nzambi.

9 Nenu bu mwaba wà dishindamijila Diyiisha dyànyì diloolo edi, diikàle anu dipàtukila mu diyiisha dya mu dyalumingu, bwa ne bìdi ne, bôbò bààkabènga Samwèlè pamwe ne Dìyì dya Mukalenge, ne bààkiitaba Shawùlà, mwànà wa Kishà awu, ne bààkabènga Samwèlè, mwine uvwa uleeja mpala wa Nyuma Mwîmpè awu, bwalu yêyè ùvwa wàkula anu mùvwà Nyuma ùmulombola mwa kwakulaye. Kadi pààkakòkàye ntema yabo ku cyòci aci, wàkamba ne: “Vùlukààyi ne, kacya mèmè ncitukù munwàmbile cintu nansha cimwe mu Dinà dya Mukalenge citù Mukalenge kàyikù mukumbaje to. Anyì ncitukù mwendè lwendu lwà muditwale bibi kumpala kwenu to. Ne muntu nansha umwe kèna mwa kumbanda bwa mpekaatu to.”

Bu mwàkambà Yesu ne: “Nganyì udiku mwa kuMbanda bwa mpekaatu?” Nwamonu anyì?

10 Ki kwambaye kabidi, ne: “Ncìtukù mulwe kunùdi bwa kunulomba mfranga ne bikwabo bu kàà pa luse nansha. Ncìtukù munwàngàte kantu nansha kamwe to. Kadi byònsò bìnkaadiku mwambe’s bìvwa bwa dyakalenga dyenu, bintù munutwadile bipàtukila mukana mwa Mukalenge abi.”

11 Ki cisàmbà cijimà kufilaci bujaadiki ne: “Bwa aci kaayi ncilelela. Byònsò abi mbilelela, kadi tudi anu baswe kwikala ne mfumu. Tudi baswe kwikala mùdì bakwabo bàà pa buloba amu.”

12 Mpindyewu, diloolo edi, Mufundu wètù ndyabanya... Mukanda wa Efeso, m’Mukanda wà Yoshùwà wà Dipungila

Dipyadipya. Ndyabanya ne diteeka dya mu bulongame dya “bacimunyi.” Mpindyewu, cidi anu mmwaba wà dishindamijila bitùdì twamba bwa ndambu wa tusunsa cyanààna, bwa kupetaku kaaba kumpala kwa twètù kubanga kubala, kubanga ne mvensa mwi³. Mpindyewu, tudi tusangana mu dyalumingu diloolo dyàshàadi edi ne. . . Nzambi mu Dipungila Dikulukulu wàkapèèsha Izaleela mulayi wà buloba bwa diikisha, bwalu bàkaavwa balwè beena lwendu ne balalakanyi. Nenku bàvwa bàsanganyiibwa mu buloba bùvwà kabùyi bwàbò bòbò to, nenku Nzambi wàkalayila kùdì Abraham ne yèyè neñjì kusòmbela. . . dimiinu dyèndè nedyànjì kusòmbela mu cisàmbà cyenyi munda mwa bidimu nkama yinaayi, ne nebabakengeshe, kadi ku cyanza cya bukole Yèyè neabapatulemu ne neababweje mu buloba bwìmpè mùvwà mabele ne bwìci bituuta nkoka.

¹³ Nenku, mpindyewu, pàakaseemenà cikondo cya mulayi, Nzambi kujjuulaYe muntu kampanda bwa kuyaye naabo ku bwine buloba abu. Mbanganyi bàdì mu kalaasa aka diloolo edi bàvwà. . . bàdì bamaneyè ne yèyè awu ùvwa nganyi? Mòsà. Monaayi, cifwanyikijilu cilelela cya menemene, cya menemene cya Kampanda wetù udibo batupeeshe bwa katufikisha ku Buloba bulaya, Kilisto. Mpindyewu twètù tudi ne mulayi, bwalu wètù mulayi wòwò n’Diikisha dya mu nyuma, pàvwàbi ne, dyàbò diikisha bòbò divwa dya mu mubidi. Ne pa nanku bàvwa bàlwa ku buloba bùvwàbò mwa kwambaku ne: “Ki bwètù peetu buloba mbwòbù ebu, katùcyèna kabidi balalakanyi to, twasòmbedi apa, ebu ki bwètù peètù buloba, ne muneemu ki mutùdiku ne diikisha. Netukune wetù blé, madimi etu a mvinyo, ne netudye bya pa madimi etu a mvinyo. Ne pashiishe patwafwa, netubishiile bânà beetu balela.”

¹⁴ Kaa, mushindu mwine wutùdì bafwànyine kubwela mu buloba abu, mikenji ya bumpyanyi, bu mùvwà Naomi ne Luuta, Boàzà, kwaluja byònsò abi, mùvwà mwanaabo ne muntu mu Izaleela, mùvwàye ne cya. . . cyònsò cìvwàyekù mujimije cìvwa ne cya kupikudiibwa kùdì cilongo kampanda. Kaa, bilenga be! Mbifwànyine kwangata mbingu ne mbingu ne mbingu ne mbingu ne mbingu, katùyiku bafwànyine kushiya nshapita ewu, bwa kuya ku cyòci to. Tudi bafwànyine kutwangaja Bible mujimà anu mwòmò emu, anu mu nshapita umwepele ewu.

¹⁵ Nenku, kaa, mèmè ntu anu munange kuCilonga. Kale wàwa tuvwa tuCyàngata, kadi tuCyàngata munda mwa cidimu cijimà ne citùpà, kadi katùyi tushiyakù Mukanda to. Anu kushàala naaCi.

¹⁶ Mpindyewu, kadi, cìvwa cintu cinène be bwine bumpyanyi abu, mushindu wùvwàbi ne bumpyanyi mu buloba bùvwà kampanda mukwabo nansha umwe pa kuumusha cilongo cya mu dísù kàyi mufwànyinekù kupikula bumpyanyi abu nansha. Mpindyewu, ngànjì ndengeku anu kaacimanyinu kakese kaaba aka kàmvwà mulengè diloolo adi, bwenu nwènù baamàmù.

Mbanganyi mwab'ewu bàdiku basambìdile bananga baabo, bajimine? Eyo. S'ki bwalu mbwòbù abu cyakabidi, nwamonu's: "Bumpyanyi bwebe." Nwamonu anyi?

¹⁷ Pòlò wàkambila mwena Loomu awu, yêyè ne: "Itabuuja Mukalenge Yesu Kilisto, nenku neusungidiibwe ne wêwè ne bàà mu nzubu mwebe." Wêwè ne diitabuuja búngì bukùmbàne bwa wêwè mwine kusungidiibwa, mwikàle ne diitabuuja búngì bukùmbàne, mwànà wa balume awu nansha mwikàle ne mutu mukole wà mushindu kaayi, anyi mwànà wa bakaji awu, yêyè neasungidiibwe nansha bya munyi. Nzambi, mu mushindu kampana anyi kansanga! Byôbì bikèngela bwa kumulaadikaYe cyâdì muulu, mulààle mu lupitaadi mwàmwa, ùpùnga ne lufu, yêyè neasungidiibwe. Nzambi ngudi mucilaye. Bumpyanyi! Kaa! "Ne bôbò nebiikalèmu," mùdì Yeshààyi mwambe, "ne bàna baabo balela bônso pamwe naabo. Kabààkwenzelanganakù bibi anyi kabààkubùtulanganakù to pa mukuna Wànyi wônso wà cijila, mùdì Mukalenge wàmba."

¹⁸ Kaa, ndi ne kaaba kakese kândì ntekemena ne ndi mwa kufikaku diloolo edi, bwenu nwênù. Cìdi anu cilàkuka kapyà munda mwa mwoyi wànyi, ciikàle cyàlukila ku bwòbù bwalu abu.

¹⁹ Kadi mpindyewu, tuyaayi kumpala. Dìbà adi nukààvwakù bamone ne Mòsà, mwenji munene wa bishima wàkaya ne Izaleela too ne ku buloba abu, ne wàkabàfikisha ku buloba bulaya, kadi kàyi mubateekele bumpyanyi bwabo awu anyi? Yêyè kí ngwàkabàpèèsha bumpyanyi bwabo nansha; yêyè wàkabàlombola too ne ku buloba abu, kadi Yoshùwà ngwàkaabanyina bantu buloba. Ncya bushuwa anyi? Ne Kilisto wàkaya ne Ekeleeziya too ne kaaba kàà ne bìvwà bu byabo byàkatèèkiibwa kumpala kwabo, byàkabàpèèshiibwa, kushààle anu bwa kusabuka Yadènè cyanàànà, kadi Nyuma Mwímpè ki Yêyè Udi utèèka Ekeleeziya mu bulongame. Yoshùwà wa leelu ngudi utèèka Ekeleeziya mu bulongame bwèndè, mwikàle ùpèèsha muntu ne muntu, mapà, myaba, mwaba wà kwikalala. Ne Yêyè ngudi Dìyi dya Nzambi didì dyàkwilà ku muntu wa munda udi Kilisto musungile, Nyuma Mwímpè. Mpindyewu nudi bacyùmfwè bìmpè menemene anyi? Mpindyewu tukàadi tubwela mu Mukanda wà Efeso. Mpindyewu, mushindu wumwewumwe awu, ngùdìYe ùshikika Ekeleeziya bilondèshìle myaba yidì yikèngela kwikalabo. Mpindyewu, Yoshùwà wàkabashikika mu buloba bwa mubidi. Mpindyewu Nyuma Mwímpè ùdi ùshikika Ekeleeziya, bilondèshìle myaba, mu buloba, bùdìbo, mu mwaba wùdìbo bàsanganyiibwa, bumpyanyi bwabo.

²⁰ Mpindyewu, cintu cya kumpala cìdiye ùbanga naaci kaaba aka, yêyè ùdi ùfùnda mukanda wèndè ne: "Pòlò, . . ." Bwalu, twètù netujandule paanyima pàà katanci ne bwalu busokoka bwônso ebu bùvwa bubuulùdiibwe kùdiye, kabìyi mu seminere kampana to, kabìyi kùdì mwena teoloji kampana to, kadi

cìwva ndibuulula dya Nzambi dya kùdì Nyuma Mwîmpè òwvwa Nzambi mupeeshe Pòlò. Mumanye ne bwalu busokoka bwa Nzambi, mwàkambàye, bùvwa busokoka kacya ku difuka dya dyulu ne buloba abu, bwàkamubuuludiibwa yèyè kùdì Nyuma Mwîmpè. Ne Nyuma Mwîmpè munkaci mwa bantu ùvwa munkaci mwa kuteeka muntu ne muntu mu bulongame, mwikàle ùshikika Ekeleeziya mu mwaba.

²¹ Mpindyewu, cintu cya kumpala cìdì Pòlò ùbanga kaaba aka bwa kwambila bantu, ncyà kwangata byònsò bya . . . Vùlukààyi ne, eci nci tumina Ekeleeziya, kî mmuntu wa pambelu to. Cìdì mbwalu busokoka mu tusùmù kùdiye, kàyikù mwa kuumvwa to, ciikàle cìmupìcila pamutu, kàyikù mumanye kantu nansha kamwe pa bwalu abu to. Kadi, bwa Ekeleeziya, cìdì mbwìcì mu lubwebwe, ndisanka dìdì kadiyi kwamba, nditwishibwa dibènèshìibwe, ndwongò dya musuuka, nditekemena dyetu ne cisòmbedi cyetu, n'Dubwebwe lwà Bikondo, kaa, cìdì ncyònsò cìdì cìmpè aci. Bwalu maulu ne buloba nebijimine, kadi Dìyì dya Nzambi kadyakujiminaku to.

²² Kadi muntu udi pambelu pàà Kaanàànà kî mmumanye kantu nansha kamwe pa bwalu abu to, yèyè ùcìdì anu wènda ùlalakana. Ncyèna ngamba ne yèyè kî mmuntu mwîmpè to, ncyèna ngamba nanku to. Ncyèna ngamba ne nansha muntu udi mu Ejiipitu kî mmuntu mwîmpè to, kadi yèyè . . . pàdiye kàyì anu mwanjì kwikala mwangate bìdì bu byèndè ebi.

²³ Ne bintu biine, bìdì, mulayi wùdì mufidiibwe kùdì Ekeleeziya kî mbuloba bwa mu mubidi to, kadi mbuloba bwa mu nyuma, bwalu twètù tudi bwakwidi bwa bumfumu, ditunga dya cijila. Nenku mu bwakwidi bwa bumfumu ebu, ditunga dya cijila edi, cisàmbà cya pabwàcì, cibìikidìibwe bwa kupatuka, cisungula, cisungudiibwe, citèèka ku luseke, dìbà adi maalu ònsò a pa buloba mmáfwe pambelu. Ne tudi balombòdìibwe kùdì Nyuma. Bânà bàà balume ne bàà bakaji bàà Nzambi mbalombòdìibwe kùdì Nyuma wa Nzambi; kî nkùdì muntu to, kadi nkùdì Nyuma.

²⁴ Byònsò mu dinanga, cintu cyònsò mu kaabujima patùdì twakulangana apa nciswikiibwe dibuki. Eci tudi bateetètèete bwa kucilongesha misangu ne misangu, ne kakùyì mpatà to beena teoloji banene bàkaadi babwelèmu mu ndondo kule ne kule kutàmba mùndì mèmè mufwànyìne kwenza. Kadi cintu cìndì njinga kunùfikisha ku dyumvwa ncyòcì eci: cya ne muntu udi munda mwa Kilisto awu, mwikàle ne Nyuma Mwîmpè, ùdì mwa kutwàlakù muntu pàdiye mu ntùpàkànyì; ne mwoyi-mule, ne ditalala dya maalu, ne lutuulu; yèyè ùdì ne kalolo, ne mudipwekeshe, ne lulamatu, mùle tente ne Nyuma; kàyikù mubi to; mwikàle misangu yònsò anu ne meeji mîmpè; yèyè mmuntu mushiilàngàne.

25 Kàyì anu muntu wa ne: “Kalekale wàwa tuvwa naaci. Bu twètù mwa kwela mbila, tuvwa naaci, twètù ba-Méthodistes. Kaa, patùvwà twela mbila apu, tuvwa mu Buloba abu.” Abi mbímpè, abi bìdi anu bilenga, ntu pàànyì ngiitabuuja aci.

26 Pashiishe ki beena Mpenta kulwabo biikàle bààkula mu myakulu, bôbò: “Tuvwa naaci; yônsò wàkaakula mu myakulu awu ùvwa naaci.” Ntu pàànyì ngiitabuuja aci, mèmè ewu. Kadi nansha nanku twètù kusangana ne bààbúngì kabàvwa anu banji kuMupeta to, nudi numona’s. Nwamonu anyì? Mpindyewu bôbò bàdi . . .

27 Tukààdi tukafika mpindyewu ku bwalu busokoka bunene ebu bùdi busokoka kacya ku difuka dya dyulu ne buloba kadi biikàle mpindyewu munkaci mwa kubùbuulwila bânà bàà Nzambi mu matuku a ndekeelu. Nudi nwitabuuja ne aci ncilelela ne, bânà bàà Nzambi mbamweneshiibwe anyi? Kumpala mene kwa twètù kuya nì mpenyi nì mpenyi, tùbuululàayi mu Loomo nshaapita wa 8 bwa katanci kakese cyanààna, nnuhadileku cintu kampanda. Anji monaayibi eci nì ncyôci cidì ciya ku cîndi munkaci mwa kwamba kaaba aka eci. Mpindyewu netwangate Loomo 8, mvensa wa 19 wa—wa nshapita wa 8 wa Loomo:

Bwalu ditekemena dya ne mwoyi wùzùka . . . bufuki mbwindile dimweneshiibwa dya bânà bàà Nzambi.

28 Ne ditekemena dya ne mwoyi wùzùka, bufuki bwônsò mu kaabujima mbwindile dimweneshiibwa adi. Nwamonu’s, dimweneshiibwa! Dimweneshiibwa ncinyì? Kumanyisha!

29 Buloba bujimà. Ba-Mùzùlùmanyì kuntu kwàka, mbadĩndile. Mu nyungulukilu mwônsò, myaba yônsò, s’mbadĩndile. “Bantu biine aba bàdi penyi’s?” Tudi bapete. . . Tudi bapete cipeepele cikole cya civuma, tudi bapete mikungulu ne mikenyi, tudi bapete maanyi ne mashi, tudi bapete bintu bya mishindu yônsò, kadi tudi bapangè kuumvwa kaaDìyi kakese katekete menemene kààkakòkà ntema ya muprofeta wàkadìjìngila muzabi pambidi awu ne kupatukaye, kwamba ne: “Ki mèmè ewu, Mukalenge.” Nwamonu anyì?

30 Mpindyewu bufuki bujimà bùdi munkaci mwa kutwa mikemu ne kwindila dimweneshiibwa dya bânà bàà Nzambi. Mpindyewu, Pòlò neikalè mwa kwanji kushikika Ekeleeziya anu menemene mwaba wùdiYe ne cya kwikala. Mpindyewu anu bwa kupeta pàà kushindamijila bitùdi twamba, tubalàayi cyakabidi:

Pòlò, mupostole wa Yesu Kilisto ku diswa dya Nzambi, kùdi bansantu (mbàdi “bajidiibwe” abu) bàdi mu Efeso, ne . . . beena lulamatu mu Kilisto Yesu:

31 Mpindyewu, bwa beena kalaasa aka kabàlu kucipwa mwoyi to, tudi tubwela mu Kilisto munyi? Tudi tukashàala bàà mu ekeleeziya bwa kubwela munda mwa Kilisto anyi? Tudi twenza ditonda bwa kubwela munda mwa Kilisto anyi? Tudi

twinyijiiibwa mu mâyi bwa kubwela munda mwa Kilisto anyi? Tudi tubwela munda mwa Kilisto munyi? Kolinto wa Kumpala, nshapita wa 12: “Bwalu ku Nyuma umwepele,” N-y-u-m-a ne dileeta dinene, umwepele, udi Nyuma Mwîmpè awu, “tudi bônso babàtijiibwe mu Buloba bulaya.”

³² Mu Buloba bulaya ebu, byônso mbyetu twêtù, mu Buloba bulaya ebu. Udi mucimone anyi, Mwaneetu Collins? Nwamonu’s, byônso mu Buloba bulaya! Izaleela pàakasabukàye Yadènè ewu, pàakabwelàye mu buloba bulaya, wàkalwangana ne kantu ne kantu kônso!

³³ Mpindyewu vùlukàayi ne, mu Buloba bulaya ebu, kî mbwena kwamba ne wêwè udi mutwibwe cisâlù cya kubenga kusaama nansha, kî mbwena kwamba ne wêwè udi mutwibwe cisâlù cya kubenga kupeta ntatu nansha. Kadi cidi cyùmvwija nunku, (Kaa, eci cipwekèku mu ndondo’s.), cidi cyàmba nunku ne, ncyebe wêwè! Juuka wêwè anu cyanààna ùcyàngatè! Nwamonu anyi? Pàwà. . .

³⁴ Nenku, vùlukàayi ne, mushindu wumwepele wàkajimijàku Izaleela muntu, mpàakabwelà mpekaatu mu cituudilu. Ki mushindu wumwepele ngwôwò awu wutùdiku bafwànyine kujimija bu—bucimunyi, ngwà ne mpekaatu abwele mu cituudilu, cintu kampana kaciyi cyènda bîmpè mwaba kampana. Akàna pàakiibàye mulungu wà ngôlò awu ne civwalu cya mu Babùlônà aci, mpekaatu wàkasanganyiibwa mu cituudilu, ne mvita yakenda luboko.

³⁵ Mpèèshaayikù mèmè ekeleeziya ewu—ewu diloolo edi, kasumbu kàà bantu aka, mu bupwangane, mu bupwangane mu mulayi wà Nzambi, biikàle ne Nyuma Mwîmpè, bènda mu Nyuma, mèmè’s ndi ngeela disaama kanà dyônso kadyombo anyi lutatu kanà lwônso, anyi nî ncinyi cyônso cìdiku aci, Joe Lewis kanà yônso udikù mu ditunga emu awu, ne dipanga dyèndè dyônso dya lulamatu adi, ne beena bupidya bônso bàdiku abu, bwa kubwelabo ne disaamà anyi lutatu kanà lwônso mu ciibi eci, ne nebàpatukè mwab’ewu ne mubidi tumatuma anu wà menemene ewu. Eyowa’s, mukalenge. Nzambi mmufile mulayi, anu mpekaatu wa bupidya ngudi yèyè mwa kucipangisha. Mpindyewu tukàadi tukafika ku ne mpekaatu mukese ewu ùdi cinyi, paanyima pàà katanci. Mpindyewu:

. . . bàdi mu Kilisto Yesu:

Ngàsà ikalè kunùdì, ne ditalala, bya kùdì Nzambi Taatù wetù, ne . . . Mukalenge Yesu Kilisto!

Nzambi ne Taatù wa Mukalenge wetù Yesu Kilisto abeneshiibwe, yèyè udi mutubeneshe ne mabenasha ônsò a nyuma mu myaba ya mu dyulu mu Kilisto, mu—mu Kilisto!

36 Patùdì mu Kilisto, tudi ne mabenesha a nyuma. Pabelu pàà Kilisto, tudi ne masaluka. Mu Kilisto tudi ne mabenesha a cya bushuwa. Kabìyi bya miitabuuja a budingìbudingì to, kabìyi bya dikutakajangana naabi to, kabìyi bya didingidija to. Kadi paùdì anu wamba mùdì mu Buloba bulaya, kadi peebe kùyimù to, mpekaatu yebe neyikwele patooke. Nenku, katanci aka anyì, neudisangane wêwè mwine wa mafi ne—ne bikwabo byònsò, mutùtù tucibiikila pa buloba apa amu ne, musopàkàne mu nsebela. Neulwe kujandula ne kwèna ne ciine cyùdì wamba ne udi naaci aci to. Kadi paùdì mu Kilisto Yesu, Yèyè mmukulaye ditalala dya ku Dyulu, mabenesha a ku Dyulu, Nyuma wa ku Dyulu, byònsò mbyebe wêwè. Udi usanganyibwa mu Buloba bulaya ne byònsò biikàle byebe wêwè. Amen. Mushindu mwine wùdìbi bilenga's we! Kaa, tulongààyaaku:

Bilondèshile mùdiye mutusungule . . .

37 Mpindyewu, mwaba wùdì ekeleeziya mulendukile bya bibi menemene ngwòwò ewu.

Bilondèshile mùdiye mutusungule munda mwèndè . . .
(Munda mwa Nganyi?) Kilisto.

38 Tudi tusangana mpindyewu, mu—mu Genese mwàmwa ne mu Bwakabuulwibwa, Bwakabuulwibwa 17.8 ne, Yèyè wàkatùsungula mu Kilisto kumpala kwa difuka dya dyulu ne buloba. Mpindyewu, mwaku ewu . . . Ngánjì kubalabi cìdì cilondà aci:

*. . . difuka dya dyulu ne buloba, bwa twètù kwikala
bansantu ne katuyi ne cya ditubanda naaci kumpala
kwèndè . . .*

Mudyànjile kutulongolola . . .

39 Mpindyewu ndi muswe kwimanaku pa mwaku awu wà “badyànjila kulongolola.” Mpindyewu, *badyànjila kulongolola* kí nkwamba ne: “Nènsungulè Mwaneetu Neville, ne ncyà—ncyà—ncyà—ncyà—ncyakusungula Mwaneetu Beeler” to. Kí ng'aci to. Ndidyànjila-kumanya dya Nzambi uvwa mumanye ne uvwa mwa kwikala mululame ngwèpi ne uvwa kàyi mululame ngwèpi. Pa nanku, ku didyànjila-kumanya, Nzambi mumanye civwàYe ne cya kwenza, Wàkadyànjila kulongolola ku didyànjila-kumanya Dyèndè bwa kwenza ne bintu byònsò bikwacishanganè bwa dyakalenga dya bàdì banangè Nzambi, bwa ne, mu cikondo cilwalwà, Yèyè wàmòna mwa kusangisha bintu byònsò mu Umwepele, udi Kilisto Yesu awu.

40 Ngánjì nnwènzèlèbi kaacifwanyikijilu kakese mwab'ewu. Nkimpè. Tudi twanji kwaluka paanyima, ngeela meeji ne mvwa mwakulepu ndambu diloolo adi, anyì mulengèpu, mu Genese, nshapita wa kumpala, 1.26, pàvwà Nzambi mubiikile Dìnà Dyèndè ne, “Mukalenge Nzambi,” cìdì mu mwaku wà El, Elah, Elohim, wùdì wùmvwijà ne “Ewu udi wikalaku

nkàâyendè.” Kakùvwa cintu cikwabo nansha cimwe ciikàlekù to pa kuumusha Yèyè. Kakùvwa nansha kapeepa, kakùvwa nansha bukênkè, kakùvwa nansha mitooto, kakùvwa nansha buloba, kakùvwa cintu cikwabo nansha cimwe to. Cìvwa n’Nzambi, ne Nzambi nkàâyendè, El, Elah, Elohim. Mpindyewu, Yèyè ki wâkenza aci.

⁴¹ Munda mwa cyôci aci mùvwa byambiibwà bìvwà byùmvwijà ne Yèyè ùvwa. . . Munda mwa El, Elah, Elohim munène awu mùvwa cyambiibwà anyi. . . Nwênù’s nudi bamanye cìdì *cyambiibwà* ne ncinyi, anyi ncyâmbè mèmè nunku ewu ne, cìvwa “ngiikàdilù.” Aci mmu mushindu wà bânà batekete bàâcyùmvwakù, ne mèmè ndi umwe wa ku bânà batekete bàdi bàkèngela kucyumvwabo mushindu awu. Munda Mwèndè mùvwa ngiikàdilù wa kwikala taatù kampanda, kadi Yèyè ùdi wikalakù nkàâyendè, kakwena cintu nansha cimwe cya kwikadila Yeku Taatù to. Nenku, mpindyewu, munda menemene mwa cyôci aci mùvwa cintu cikwabo kampanda, cya ne Yèyè ùvwa Nzambi; ne nzambi ncintu kampanda cya dikuukwila; kadi Yèyè nyawu ùvwa wikalakù nkàâyendè, El, Elah, Elah, Elohim, mu mushindu wà ne kakùvwa cintu nansha cimwe cya kuMukuukwila to. Munda mwa cyôci aci, Yèyè ùvwa Musungidi, kadi pààkù kakùyì cintu nansha cimwe cijimine cìvwa mwa kusungidiibwa. Nwamonu anyi? Munda mwa cyôci aci, Yèyè ùvwa Mwondopi, nwamonu’s, kadi pààkù kakùyì cintu nansha cimwe cìsaama cìvwa mwa kwondopiibwa, anyi cintu nansha cimwe cìvwa mwa kwikala cìsaama. Mpindyewu nudi bumvwe cimfwanyi aci anyi? Pa nanku byambiibwà Byèndè, ngiikàdilù Wèndè kupatulaye cìdiku leelu ewu eci.

⁴² Bamwe bantu bàtu bàmba ne: “Ee, bwa cinyi Nzambi kàyikù mwa kwikala mucimànyike anu ku cibangidilu aku?” “Yèyè mmwena lwonji wa mwoyi wà cikisu,” mwàkambà Joe Lewis, wàkapiisha Joe awu, anyi wàkapiisha Jack Coe, nwamonu’s. Kwambaye ne: “Yèyè’s ùdi anu mmwena lwonji wa mwoyi wà cikisu. Cintu pààci ne n’Nzambi kacitukù to. Bu ne cintu bu nanku cìvwaku, Yèyè ùvwa mufwànyine kwikala. . .” Kaa, mèmè. . . kuMutwaye anu ménà a mishindu yònsò, nwamonu’s. Kadi cìdì anu mbwalu yèyè ùvwa mufwànyine kwikala ne mamanya bùngì cyanààna kumutu *eku*, kadi kàyikù ne cintu nansha cimwe kwìnshi *eku* to.

⁴³ Mpindyewu, aci, ki mwaba wùdici ngwôwò awu. Nwamonu anyi? Dîyì edi didi dicyàmbe kaaba aka, ne Yèyè mmucisokoke. Ne maalù masokoka aa àvwa masokoka mpindyewu, vùlukàayi, Bible mmwambe ne: “Kacya ku difuka dya dyulu ne buloba, mindile dimweneshiibwa dya bânà bàà Nzambi,” bwa kuàleya patooke kùdì ekeleeziya. Kaa, ekelekele! Nwacyùmùvù anyi?

⁴⁴ Mpindyewu ndi nganji anu kwimanyika ndambu kaabwalu kàanyi aku, anyi nëntwalè. . . Nènye ku meeji àanyi àdì àlondà bwa kuumvwa cyôci eci. Mpindyewu vùlukàayi ne, mu bikondo

byònsò bya Mòsà, mu bikondo bya baprofeta amu, mu bikondo byònsò abi, bàvwa bindile too ne ku matuku a ndekeelu aa bwa bintu ebi kuleejiiwbabi patooke, bilondèshile Mifundu. Aci's ncyà bushuwa, bwa kucibuulwilabo bânà bàà Nzambi. Bwa cinyi? Kuumukila anu ku cyàkajiminà aci. . . too ne ku cifwànàngàne ne cipaapu cya musàkà, bu mungàmbi amu, ciibakiibwa cyènda citàmba kuseemena, citàmba kuseemena, citàmba kuseemena.

⁴⁵ Anu múnkaadi mwambambe diyi adi misangu yábungì, mwambe ne, Nzambi ùtu mwenze Bibles yisatu. Wa kumpala, WàkaMutèeka mu dyulu, cidiminanzaji. Kacya nukàadikù bamone cidiminanzaji anyi? Cimfwànyì cya kumpala mu cidiminanzaji ncinyi? Virgo. Cimfwànyì cya ndekeelu mu cidiminanzaji ncinyi? Leo nyama wa ntambwe. Yèyè wàkalwa bwa musangu wà kumpala kùdi virgo, Ùdi ùlwa bwa musangu mwibìdi bu Ntambwe wa cisàmbà cya Yuda. Nwamonu anyi?

⁴⁶ Wàkenza uvwa ulonda mu cipaapu cya musàkà, kale mu matuku a Henòkà, pààkenzàbo cipaapu cya musàkà. Ne bóbò bàtu bàbipima. Mèmè ncyèna ncyumvwa to. Kadi too ne bwa mvita, mwaba wùdibo biinama ne bèndela ku binù too ne mu ntanta bule kampanda, nenku bàdi mwa kupima ntanta wa pankaci pàà mvita. Nudi bamanye kùkaadibo ne dipima dyabo adi mpindyewu? Too ne mu cibambalu menemene cya mfumu. Ne pàvwà cipaapu cya musàkà eci cyènda cibànda apu. . . Twètù katwenaku bafwànyine kuciibaka to, ne byònsò bitùdikù twètù naabi leelu ewu ebi. Katwenaku bafwànyine kuciibaka to.

⁴⁷ Nciibakiibwe buludi too ne kuulu mushindu *ewu*, too ne ku lusongo. Ne dibwe di di pa. . . Dibwe dya ku lusongo kabààkadipetakù to. Kacya bóbò kabààkaasakù mùsongà ku lusongo lwà cipaapu cya musàkà aci to. Ncyèna mumanye ní nwènù nutu bacimanye anyi kanùtu bacimanye, cipaapu cinènè cya musàkà cya mu Ejiipitu aci, kacya kacyàkatèèkiibwakù dibwe dya mùsongà ku lusongo lwàci aku to. Bwa cinyi? Dibwe dya ku lusongo dyàkabèngiibwa, Kilisto, Dibwe dya Mùsongà, nwamonu's, dyàkabèngiibwa.

⁴⁸ Kadi patùdi twenda tubànda kuumukila ku cikondo cya Luther, cikondo cya ba-Baptistes, cikondo cya ba-Méthodistes, cikondo cya beena Mpenta, tudi babànde buludi too ne ku Dibwe dya ku lusongo mpindyewu, nwamonu's, munkaci mwa kwindila ne kujinga bwa Dibwe dya mùsongà adi kusòmbadi, nzubu ùkaadi mukumbanangane. Kanùtukù babale mu Mifundu ne: "Dibwe adi dyàkabèngiibwa" anyi? Mu bushuwa bwa bwalu, tudi bamanye ne aci ciwva cyàkula bwa ntempelu wa Solòmò. "Kadi Dibwe dyàkabèngiibwà adi ki dyàkashààlà Dinene dya mu ditumba." Kadi ndi ngamba nunku anu bwa kunwenzelaku ci—ci—ci—cimfwànyì kampanda.

49 Mpindyewu, kabidi mu Bible, tudi ne mwoyi mu dituku dya ndekeelu, ku lusongo lwà cipaapu cya musàkà, mishipa micyamakane ya cikondo cya kansere mu cidiminanzaji, mu cikondo cya dilwa dya Leo nyama wa ntambwe, mu dibwe dya ku lusongo, ne mu matuku a dimweneshiibwa dya bânà bàà Nzambi, mu Bible, nwamonu's. Nudi numona mwaba wutùdi anyi? Tukààdi anu ku cikondo cya nshiikidilu menemene.

50 Mbanganyi bàdiku babalè cibebibi aci mu lumingu emu, cidì Khrouchtchev ne bakwabo abu bambe? Kaa, bôbò bàkaadi badilongòlòle; ne twètù peetu. Amen. Badilongòlòle! Mbîmpè, nwamonu's. Kaa, dyèsè kaayi—kaayi—kaayi, dituku kaayipu's we! Bu ne beena Kilisto bàvwakù mwa kumanya dituku ditùdi ne mwoyi's we. Ekelekele!

51 Nudi nwela meei kaayi? Mufundi wa Mukanda ewu, yêye wâkacimòna awu, ne mucimone ne mmwaba kaayi wùvwaci mwa kumweneshiibwa mu matuku a ndekeelu, mwindile ne mwikàle ùtwa mikemu bwa bânà bàà Nzambi abu kujuukabo mu matuku a ndekeelu, biikàle ne bukole bwa Nyuma Mwîmpè kundekeelu kwa cikondo, bwa kubuulula bintu bisokoka kacya ku difuka dya dyulu ne buloba, bwa kubileeja.

52 Mpindyewu twalukilaayaaku tükabwelè cyakabidi mu “difuka dya dyulu ne buloba” adi, bwa kupeta dibuulula kampana, bwa twètù kumona ní tudi babinge anyi ní katwena babinge. Ndi ntekemena ne ncyèna ndivwija munyangakaji wa cijila to pa kubiikila Nzambi ne, “Papa,” kadi ndi muswe kucyamba mushindu awu bwa nufikeku ku dicyumvwa. Papa! Papa ùvwa dijinga ne bânà, pa nanku cyàkenzàYe ncinyi? Wâkamba ne: “Banjelo biikalèku.” Ki Bôbò kulwa kuMunyungulukila. Kaa, abi's mbîmpè. Bôbò kuMukuukwila, díbà adi kwikalaYe Nzambi, byambiibwà. Vùlukàayi ne, Yêye ùvwa El (E-1), Elah, Elohim, diikalaku dya nkààyendè adi, kakùyikù cingà cintu to anu Yêye. Cintu cya kumpala cyàkalwà mwaba awu civwa m'Banjelo. Díbà adi, Banjelo kabàvwa mwa kwenza cingà cintu to pa kuumusha dikuukwila. Bôbò kabàvwa mwa kujimina to. Pa nanku, Bôbò kabàvwa mwa kusaama to, Bôbò bàvwa baakampàndà bàvwà kabàyi bàfwa to. Pa nanku, Yêye kàvwa mwa kuleeja patooke bukole Bwendè bwa dyondopa to, Kàvwa mwa kuleeja patooke lupandu Lwendè to. Pa nanku díbà adi, kumpala, mpindyewu anjàayi . . .

53 Pashiishe paanyima pàà aci, kwambaYe ne: “Netwènzè cintu kampana cya cilingiibwa.” Ki kwenzaYe buloba. Nenku pààkenzàYe buloba, kwenzaYe bifukiibwa byònsò bya pa buloba, ne pashiishe kwenzaYe muntu. Byònsò byàkapàtukilà ku buloba abi; kubangila ku—ku civuba anyi ku kavubavuba, anu mmwenekelu wetù wa mubidi cyanàànà mwikàle ùlèlema pa màyi, mubangile anu apu, bwa . . . kuumukila apu kuya ku ludimba, cidì ciikàle mushindu wà mwoyi wùdi mutàmbe kwikala wà kwinsi wùtùdiku mwa kupeta, mùdìbo bàmba

ne, ndudimba. Mushindu wùdi mutàmbe kwikala wà kuulu mmuntu. Kuumukila ku ludimba kubangabi biya too ne ku musodya, kuumukila ku musodya kuyabi anu nanku anu nanku anu nanku, ne musangu wònsò wùvwà Nyuma Mwímpè ùbanga kwenza “wuuush,” ùpwidija’s, mwoyi wùlwa kabidi; “wuuush,” mwoyi mutàmbe kwikala wà mubàndile. Ki katanci aka, cintu kampanda kumwenekaci mu cimfwànyì cya Nzambi, ciikàle muntu. Kacyakacya cintu nansha cimwe kacitukù, kacivwakù, ne kakwàkufùkiibwakù kabidi to, cintu kampanda citùmbùke kutàmba muntu, bwalu muntu ùdi mu cimfwànyì cya Nzambi. Nwamonu anyi?

⁵⁴ Pashiishe muntu, pààkenzàYe muntu Wendè wa kumpala awu, mpindyewu, pààkenzàYe Banjelo Bèndè abu apu, Wàkenza muntu: “Yèyè wàkabàfùka mulume ne mukaji,” bònsò mu cintu cimwepele. Ùvwa eku mulume eku mukaji, mwikàle eku ne bukaji eku ne bulume. PààkenzàYe Adàmà ne kumutèèkaYe mu mubidi, vùlukààyi ne, mu Genese 1, Yèyè wàkenza mulume ne mukaji, nenku mu Genese 2, kakùvwa kwanji kwikala muntu bwa kudima buloba to, muntu wa musunya. Kakùvwa muntu nansha umwe uvwa mwa kukwata cintu ne kudima buloba to, kadi nansha nanku kùvwa muntu mu cimfwànyì Cyèndè. “Ne Nzambi ùdi. . .” [Disangisha didi dyàmba ne: “Nyuma.”—Muf.] Ncya bushuwa. Nwamonu anyi? Yèyè wàkenza muntu wa kumpala awu: “Yèyè wàkabàfùka mulume ne mukaji.” Mpindyewu, pààkenzàYe muntu wa kumpala awu. . .

⁵⁵ Mpindyewu, vùlukààyi ne, cyôci cyònsò aci Ùvwa Yèyè naaci mu meeji. Nenku mu dyalumingu diloolo mvwa mwakùle pa cyôci aci. Díyi didi—didi mmeeji mapatwila mukana. Nzambi wàkeela meeji mushindu wùvwàYe mwa kwikala Nzambi, mùvwàYe mwa kukuukudiibwa, mùvwàYe mwa kwikala Mwondopi, mùvwàYe mwa kwikala Musungidi; nenku pàvwàYe anu wàkula Díyi, bwalu bùvwa butuuke kashidi. Kaa, bàna bàà Nzambi aba mpindyewu bu bôbô anu mwa kukwata bikole Díyi adi mushindu awu’s we! Pàdi Nzambi wàkula Díyi, nkujikè! Kakùyi mpatà to! Mmufwànyìne kwikala mwindile. . . Dilondolola dya maalu a bikondo didi dyàmba ne, anyi mulongi wa bintu bya kale bya mwinshi mwa buloba ne bakwabo bònsò, bàdi bàmba ne pàmwàpa buloba mbwenze miliyò ne miliyò ne miliyò ya bidimu. Mémè ncyèna mumanye to, mbufwànyìne kwikala bwenze mbòmbò ne mbòmbò ya bidimu. Ncyèna mumanye ne mbwenze ntanta bule kaayi to. Nzambi kàtu wikalakù mu cikondo to. Yèyè kèna ne kasunsa kamwepele kàà díbà kashàadile ku pàvwàYe naadi musangu wàkacyàmbàYe awu to. Yèyè mmutùngùnùke ne kwikala anu Nzambi. Bwèndè Yèyè kakwèna bya cikondo abi to.

⁵⁶ Kacya ncivwakù mumanye aci mushindu awu to too ne diloolo adi, dinda adi’s we. Wa Cyendèlèlèlè, kakùyi makeelela, kakùyi maalaba, byònsò bìdi anu mpindyewu. Kacya nukàadikù

bamone mwaku ewu “NDI” anyi? Kí nne “Mvwa,” anyi ne “Nèngìikalè” to, ncyá Cyendèlèlè: “NDI,” nwamonu’s, “NDI,” misangu yònsò.

⁵⁷ Mpindyewu, kadi Yèyè wàkajinga bwa kuteeka bintu mu cikondo. Bìvwa bìkèngela bwa Yèyè kwenza cintu kampanda bwa dikuukwila, ki byambùbwà Byèndè kupatulabi cyòcì eci. Pashiishe kwenzaYe muntu. Pashiishe, mu mwine muntu ewu, ùvwa ùmwèka mutàmbe kwikala nkààyendè. Pa nanku, mpindyewu, bwa kuleeja mpindyewu meeji Èndè manene awu, cìvwàYe naaci mu cimfwànyì cya Kilisto ne Ekeleeziya, Yèyè kààkangata kapese kashìilàngàne kàà diima bwa kwenza mukaji to, kadi Yèyè wàkangata mu luseke lwà Adama amu, lubadi; ne kwangataYe ku nyuma wa Adama, cya bukaji aci, ne kuciteekaYe mu lwine lubadi elu. Paùdi umona muntu mulume wènza maalu bu cilùmaacikàjì, kùdi cintu kampanda cipampàlámùke. Ne paùdi umona muntu mukaji ùswa kwenza maalu bu muntu mulume, kùdi cintu kampanda cipampàlámùke. Nwamonu’s, kùdi cintu kampanda cipampàlámùke. Bàdi nyuma yibidi mishìilàngàne, ewu ne ewu. Kadi, bònsò pamwe, bàdi bènza cintu cimwepele, “babidi aba bàdi umwepele.” Pa nanku Yèyè wàkenza mukaji ne mulume, ne bòbò kabàvwakù ne cya kukulakaja, kabàvwakù mwa kufwa, kabàvwakù mwa kutoloka mvyá to, nansha. Bàvwa bàdya, bàvwa bànwá, bàvwa bàlààla, anu mutùdi twètù twenza emu, kadi kabàyìkù bàmanya ne mpekaatu ncyìnì to.

⁵⁸ Mpindyewu nèncingulukè kaaba aka mene bwa dileesona dikwabo musangu kumpala, pa dimiinu dya nyoka. Diine adi, bàvwa bandombe bwa kuumusha cyòcì aci mu bantu. Kadi ndi muswe kumona muntu alwe kundeeja cintu kampanda cishìilàngàne. Ki cìndì mèmè muswe kumanya ncyòcì aci, nwamonu’s.

⁵⁹ Mpindyewu, kadi pashiishe paanyima pàà byònsò ebi, pashiishe pàakabwelà mpekaatu, cìdi cyènzekà ncyìnì?

⁶⁰ Muulu mwàmwa, lwà kumutu kwàka, mu ntanta wa mùliyò, mìliyò lukama ya kilòmèètà, mùdi cibwashibwashi bunene *ebu*, nenku ki dinanga dipwangane dya agapao ndyòdi adi. Musangu wònsò wùdi wela cidya mu *nunku*, cìdi cikèèpela ne ntanta wa bule bwa cyàlà. Kadi nudi anu bamanye mùdikù kafwànyìne kushààla kakese pàmباكù kufika pa buloba apa. S’nkamundidimbi kàà kaamundidimbi kàà mindidimbi. Ki cyùdi wèwè naaci, ki cìndì mèmè naaci ncyòcì aci, kaamundidimbi kàà kaamundidimbi kàà mindidimbi ya dinanga dya agapao.

⁶¹ Kùdi cintu kampanda munda mwebe amu, kùdi cintu kampanda munda mwa mukaji yònsò mwab’ewu ukàadi mupite bidimu makumi abidi, kùdi cintu kampanda munda mwa mulume yònsò mmwab’ewu ukàadi mupite bidimu makumi

abidi, cidi cijinga bwa kushààla. Wêwè udi anu ne bidimu bitaanu cyanàànà, abi nkuumukila ku dikumi ne bitaanu too ne ku makumi abidi. Paanyima pàà bidimu makumi abidi ki wêwè kubanga kufwa aku. Kadi, kuumukila ku dikumi ne bitaanu, wêwè udi anu nsongà wa mucikàle anu mwànà too ne dîbà adi. Ne pashiishe udi uboba upwîla too ne paùdî ufika ku makumi abidi. Kadi paanyima pàà makumi abidi, kaa, ki wêwè awu ne: “Mémè’s ncidi anu muntu pa yêyè.” Awu ngwêwè udi wamba peebe nanku cyanàànà, kadi kî ncyûdi to. Wêwè udi wenda ufwa ne wenda ujika, cyûdi wenza nansha ciikàle cinganyî. Nzambi mmukushiye ukola too ne pa bidimu abi, kadi pashiishe ulwa kufwa. Mpindyewu cidi cyènzekà ncinyî? Wêwè mpindyewu udi ubanga kwenda kufwa, kadi munda amu mùdi cintu kampanda munda mwebe amu cyàmba ne: “Ndi muswe ngîikalèku cyakabidi wa bidimu dikumi ne mwandamukulu.”

⁶² Mpindyewu ndi muswe nnukonkeku cintu kampanda. Anji ambabi tûng bu ne udi mulediibwe kûkaadi bidimu nkama yitaanu, kadi mushààle ne bidimu dikumi ne mwandamukulu too ne leelu? S’udi mufwànyîne kwikala wa cyena kale, ne yebe mmwenenu ya kûkaadi bidimu nkama yitaanu ayi! Kumpala kwa baataatù beena lwendu kulwabo muneemu emu, wêwè’s uvwa anu nsongààkàjî wa mmwenenu anu wa bwena awu. Mona’s, s’bìvwa bipiciibwe ne wêwè mutungunuke ne kwela bidimu ne mushààle ne mwoyi bidimu nkama yitaanu. Nwamonu’s, kùdi cintu kampanda cipampàlàùmùke.

⁶³ Wêwè udi wamba ne: “Ee, mpindyewu mene mémè’s ndi ndyumvwa bîmpè be, Mwaneetu Branham. Kaa, ndi—ndi—ndi ne bidimu dikumi ne mwandamukulu, ndi ne bidimu dikumi ne biswambo, s’ndi ndyumvwa bîmpè.” Munanga wanyî, lekela nkambileku cintu kampanda. Wàmányî munyî ne mamwébè ùdi ne mwoyi mu kasunsa emu, piikalàye kàyî mu ekeleeziya emu? Wàmányî munyî ne mulunda webè wa balume awu kî mbamushebeye kûkaadi anu ndambu wa tusunsa cyanàànà, anyî mulunda webè wa bakaji awu? Wàmányî munyî muwàbèngà kwikala citalu mu dinda mu nzubu mwebe? Wàmányî munyî muwapatuka mu ekeleeziya emu mwikàle ne mwoyi, diloolo edi? S’ndipanga anu dya menemene dya kumanya cyàkwenzekèlà. Kakwèna cintu nansha cimwe cyûdi mumanyè to. Pawikalà ne bidimu dikumi ne bitaanu, dikumi ne bibidi, dikumi ne citeema, makumi mwandamutekete ne bitaanu, anyî makumi citeema, kùdi . . . byònsò kabiyi bimanya. Kùyî umanya ne udi mwimanyine penyî to. Kadi peebe mwikàle ujinga kwalukila ku bidimu dikumi ne bitaanu, dikumi ne mwandamukulu. Cidi cikufikishà ku dyenza ciine aci ncinyî?

⁶⁴ Mpindyewu, wêwè mwalukile ku bidimu dikumi ne mwandamukulu ne mushààdilekù, ne kùyikù mwa kusaama ne kùyikù mwa kwikala . . . s’nebikengeleku bwa wêwè kwikala ne bakwabo bantu pamwe neebe, bwalu mbifwànyîne kukutalala

ku mwoyi, wamonu's. Bantu's mbafwànyine kutungunuka too ne bikondo bikwabo kadi wèwè mufwànyine kwikala wa cyena kale. S'mbifwànyine kwikala bibi kutàmba mùvwàbi bifwànyine kwikala bu wèwè mwa kukulakaja pamwe naabo. Kadi kùdi cintu kampanda cidì cìbìikilà bwa wèwè kwikala mwaba awu. Nka-agapao kakese aku, kaamundidimbi kakese aku kàdi kàkwenzejà . . . Cintu kampanda lwà kuulu eku.

⁶⁵ Mpindyewu, diloolo adi, anyi dinda adi, pa dîbà mwandamutekete, Nyuma Mwîmpè, ku bwîmpè Bwèndè ne ngàsà Wendè, pàvwàYe mumpatule mu mubidi ewu apu, ngeela meeji, mùndi ngeela meeji. Eyowa anyi to, ncyèna ncyàmba to, ne mukabwele mu Buloba abu ne mukamone bantu abu, ne bônso biikàle bansongà. Nenku mèmè kumona bantu batàmbe bulenga bântù nciyikù mwanjì kumona kacya bândela. Nenku kungambilaYe ne: "Bamwe bàà kùdìbo bàwva ne bidimu makumi citeema. Mbaùdì mukudimwishe mucima. Kabyena bikemesha to pàdìbo beela lubila ne: 'Mwaneetu! Mwaneetu!' apu."

⁶⁶ Mpindyewu, awu mmubidi wà mu dyulu, mu mushindu wà ne patùdi tufwa katwena tulwa bwalu bukwatakaja to, tudi tulwa mubidi kampanda. Bu twètù, muntu ne muntu, mwa kufwa, bu bômbè bwa mushinda mwa kututaayisha mu kasunsa emu, mu tusunsa tutaanu kuumukila ku mpindyewu netwikalè munkaci mwa kulabulangana ku cyanza ne kuupukilangana muntu ne mukwèndè, ne kwela mbila mikole ne kusaluka, ne kutumbisha Nzambi! Eyowa's, mukalenge. Nenku Mwaneetu wa balume ne Mwaneetu wa bakaji Spencer bàdi basômbe kaaba aka aba, ngeela meeji bàdi bamwe bàà ku babàka bàdi batàmbe kwikala bakulakaji mwab'ewu aba, nebiikalè ne bidimu dikumi ne mwandamukulu, makumi abidi. Mwaneetu Neville mmufwànyine kwikala anu mwànà wa balume mutekete, ne mèmè mufwànyine kwikala kànà kàà balume katekete. Ne tudi bônso bafwànyine kwikala anu . . . Aci's cidì menemene anu Bulelela ebu. "Bu nenta wa cisômbedi wa pa buloba ewu mwa kunyanguka, tukàadi ne mukwabo mwindile."

⁶⁷ Pàdi mwànà mukese ùpàtuka munda mwa mamwèndè, mu dilediibwa dya mubidi, kaamubidi kèndè kakese aku kadi kàdìnyènguvula ne tukolo atu tûtùpika, ne bikwabo. Mfwilaayiku luse bwa cyakwidi aci, nwènu bansongàakàjì. Kadi, pàdiku kènza nanku apu, kàdi ne misunya yidì ne mwoyi ayi miikalè yidìkòka. Kadi pàdiye ùfika pa buloba, cintu cya kumpala, ùdi ùkwàta mweyelu, ne kùdi mubidi wà nyuma wà ngiikàdilù wùdi ne cya kubwela munda mwa mwànà awu pa dîbà adi mene. Wèwè mumulekele, yèyè ùdi ùjuula mutu wèndè mukese awu ùwùlamika ku dibeele dya mamwèndè aku ne ùbanga kwamwa. Yèyè kàyi mwenzè nanku awu to, mabeele kí mmafwànyineku nansha kupatuka to.

68 Kacya nukààdikù bamone kânà kàà ngombe pàdiku kàlediibwa, kàdi. . . pàdiku anu ne kàapeci makàndà búngi bukùmbàne bwa kwimanyinaku kuulu anyi? Udi ukàmbila ciine aci nganyi? Kààsa lwendu kàya buludi too ne kùdi mamwákù, kàbanga kulamika mutu eku ne eku ne kàbanga kwamwa. Kaa, eyowa's!

69 Bwalu, pàdi mubidi wà pa buloba ewu wùfikishiibwa panwapa, kùkaadi mubidi wà nyuma mumane kudilongolola bwàwù wòwò. Nenku pàdi anu ewu. . . Kaa, aleluuyah! “Nenku ntenta wa pa buloba wa cisòmbedi cyetu ewu yèyè munyanguke, kùkaadi mukwabo mwindile mwàmwa.” Patùdi anu tupatuka mu ewu ewu, tudi tubwela mu wòwò awu; wùdi kawùyi ne dijinga dya kunwa màyi matalale, kawùyikù ne dijinga nansha dikese dya màyi a kunwa to; wùdi kawùyi wùdya, bóbò abu kí mbàa ku lupwishi lwà buloba to. Kadi bàdi anu bàà cya bushuwa, ne biikàle mwa kulengangana ne kulabulangana ku byanza, ne dinanga ne byònsò biikàle anu bipwàngàne. Nenku mubidi awu mmwindile kuntwaku. Ncitùpà cya ku wòwò. Yidi yisatu.

70 Wèwè udi ubangila Mwoyi wèbè wà Cyendèlèlèlè anu ku cyoshelu eku mene. Mwaba ewu ngùdi ubangila Cyendèlèlèlè. Kaa! Wèwè udi ubangila Mwoyi wà Cyendèlèlè mwaba ewu mene. Díbà adi wàledìbù cyakabidi, mwànà wa Nzambi. Ne pashiishe paùdi ufwa, udi ubanga. . . Pàdi lufu lwebe lukukwata mu mubidi ewu ne mwoyi wùlekela kutuuta, ne nkata ya cifwaka yibanga kwimana kaaba kamwe, kaamundidimbi kakese kàvwà mundidimbi wà mundidimbi aku, mu kasunsukila kamwe kàà kasunsa kòkò aku kàdi kàshààla mundidimbi wà mundidimbi, pashiishe mu kakwabo kàdi kàlondà kòkò aku kàdi kàshààla mundidimbi awu, pashiishe mu kakwabo kàdi kàlondà kòkò aku kàdi kàshààla konjònji kakese, pashiishe mu kakwabo kàdi kàlondà kòkò aku kàdi kàshààla kaamusulu, pashiishe mu kakwabo kàdi kàlondà kòkò aku kàdi kàshààla musulu, ne mu kakwabo kàdi kàlondà kòkò aku kàdi kàshààla mbù, ne paanyima pàà katanci wèwè udi udisangana mwimane mu bwikadi bwa bananga beebe biimàne mwàmwa, bavwàle bivwalu bya mubidi wà mu dyulu, mu mushindu wà nwènù numanyangana muntu ne mukwèndè, nunangangana muntu ne mukwèndè, bààlùkile cyakabidi ku nsongàalùmè ne nsongàakàji. Cya bushuwa menemene. Wòwò wùdi wìndila mwaba awu too ne ku dilwa dya Mukalenge Yesu. Nenku dīngà dituku mubidi Wèndè mutumbishiibwe awu. . . Mpindyewu vùlukàayi ne, awu mmubidi wà mu dyulu, kí mmubidi mutumbishiibwe to, mubidi wà mu dyulu. Nenku dīngà dituku mubidi wà mu dyulu awu newumuke mu Dyulu pamwe ne Yesu.

71 “Bwalu ndi nzwambila eci,” Tesàlònìkà Mwibidì, nshapita mwi5, anyi Tesàlònìkà wa Kumpàlà, nshapita mwi5, ewu anyi

ewu: “Ndi nzwambila ne, ncyêna muswe kunushiya mu dipanga to, bânà beetu, pa bidì bitàngilà aba bàdi balààle tulu, bwa kanwikadi mu tunyinyanyinga to, byenzè bu mùdì bakwabo bàdi kabàyi ne ditekemena. Bwalu piikalàbi ne tudi biitabùùje ne Kilisto wàkafwà ne wàkabiiika cyakabidi mu dituku diisàtù, mbya mwomumwe kabidi ne nansha aba bàdi balààle tulu mu Kilisto Nzambi nealwe naabo pamwe Nende. Bwalu tudi tunzwambila nunku ku mèyi matuma a Mukalenge ne, twètù bàdi ne mwoyi ne bashààle too ne ku dilwa dya Mukalenge, katwakupangisha anyi kucyamakana” (mwaku wùdì mutàmbe bwîmpè) “kucyamakana aba bàdi balààle tulu to. Bwalu mpungi wa Mukalenge neadile, ne bafwè mu Kilisto nebànji kubiika dyambedi.” Mibidi ya mu dyulu eyi yidi yitùùluka panshi apa ne yivwàla mibidi ya pa buloba, mibidi mitumbishiibwe. “Ne twètù bàdi ne mwoyi ne bashààle netushintuludiibwe mu katanci, mu mubunyi wà dîsù, ne netwangaciibwe muulu pamwe naabo, bwa kutwilangana ne Mukalenge mu mpeepele.”

⁷² “Ncyakunwa kabidi neenu maala a tumuma twa mvinyo ne Ncyakudyà kabidi to too ne pânNgààbìdyà neenu bipyabipya mu Bukalenge bwa Taatù Wanyì,” Didya dya Dibanji. Bwalu mu bidimu bisatu ne citùpà mufwilakanyi ne Kilisto ùdi ùjikija bukookeshi bwèndè, buloba bujimà bùbùtudiibwa, beena Yuda bàbiiikidiibwa, Yozefu ùDimanyisha kùdì bàà Bisàmbà bya bendè, to kùdì beena Yuda. Vùlukààyi ne, pààkadimanyishà Jozefu kùdì bânà baabo, kakùvwa muntu wa bàà Bisàmbà bya bendè nansha umwe mwaba awu to. Pààkatùmàye. . . Nwènu’s cidipi bamanye bwalu bulonda abu. Yozefu, cifwanyikijilu cipwàngàne cya Kilisto, mu mushindu wònsò. Nenuk pààkatùmà Yozefu mukenji bwa kubiikidishabo bânà baabo, ne kufikabo, ne kutangilaye e kumona mwakùnyèndè Benyàmìnà awu, ne kubamonaye mwaba awu ne pashiishe yèyè. . . Bàakamba ne: “Mona’s, mulumyana ewu! Kabìvwa bikèngela bwa twètù kwikala bashebeye Yozefu, mwaneetu awu to.” Beena Yuda abu pààkamònàno ne bàvwa benze cilema; mpindyewu Kilisto, piikalàYe munkaci mwa kuDimanyisha kùdìbo. Nenuk Yozefu wàkashààla mupate, mu mushindu wà ne byakakengela bwa kutudikaye ne mwadi, mwambe kudila, pa nanku kuumushaye mukàjèndè ne bânà bèndè, ne balami bònsò ne bakwabo bònsò, ne kubatumaye mu nzubu wa bukalenge. Cya bushuwa menemene. Ki pashiishe mu bwikadi bwa beena Yuda nkààyaabò, kwambaye ne: “Mémè ndi Yozefu, mwaneenu awu. Mémè ki mwaneenu awu.” Ki dîbà adi kudyelabo panshi ne kubangabo kuzakala, kwambabo ne: “Bwa apa kaayi tudi bamanye ne twàbwelàkànyi, bwalu tuvwa bashebeye mwaneetu awu. Twàkamba ne tudi bashebeye mwaneetu awu, kadi mpindyewu s’ki yèyè ewu mfumu munene.”

⁷³ Kwambaye ne: “Nzambi ngwàkacyènza mu kiipacila, bwa kusungila mwoyi.” Ki kabingilà menemene nkòkò aku kàvwa

Nzambi mucyènzèle, bwa kutusungila twètù bàà Bisàmbà bya bendè. Kadi bàà Bisàmbà bya bendè bàvwa bàsanganyiibwa mu nzubu wa bukalenge. Aleluuyah! Mubengiibwe kùdi bàna Baabo, Yozefu, Yèyè wàkangata Mukaji-musela; ne Mukaji-musela awu ùvwa wa bàà Bisàmbà bya bendè, kàvwa wa beena Yuda to. Eyo.

⁷⁴ Mpindyewu, kunùyaayà kwobeka nkwèpi mpindyewu? Paanyima pàà twètù bamane kuvwala mubidi wà butumbi ewu, ne cikondo cya butumbi cilwalwà aci; pùikalà mubidi mutumbishiibwe ewu, mubidi wà mu dyulu ewu mumane kuvwijiibwa mubidi mutumbishiibwe. Nudi bumvwe cindi njinga kwamba mpindyewu aci anyi? Dìbà adi ndìndi mwa kulwa e kwamba ne: “Mwaneetu Neville!” Ngànji nnupeesheku kaacifwanyikijilu kakese. Ngamba ne: “Mwaneetu Humes, twànji kuya kwa Papa mu dinda emu tũng.” Yèyè ùdi Nzambi. TwàMumanyì bwa mpindyewu, Yèyè m’Musungidi, Yèyè m’Mwondopi.

⁷⁵ Kacya kakùvwakù cintu pààci ne ndifùka dyà mpekaatu nansha. Aci kî ncinùbwelè bilenga to, mmwômò anyi? Mpekaatu kî ncifukiibwa to. To, mukalenge! Mpekaatu ndinyangakaja. Kùdi Mufuki anu umwepele, n’Nzambi. Mpekaatu mbwakane bunyangakaja. Masandi ncinyi? Bwakane bunyangakaja. Mashimi ncinganyi? Bulelela bukònyangaja. Cya bushuwa’s. Dìyi dya mulawu ncinganyi? Mmabenesha a Nzambi makudimuna mavwija dìyi dya mulawu bwa Nzambi, pamutu pàà dibenesha. Mpekaatu kî ncifukiibwa to. Mpekaatu ndinyangakaja. Pa nanku, Sàtaanà kàvwakù mwa kufuka mpekaatu to, yèyè wàkanyangakaja anu civwà Nzambi mufuke. Ncya bushuwa menemene. Lufu lùdi anu ndinyangakaja dya mwoyi.

⁷⁶ Mpindyewu monaayi eci—monaayi eci. Dìbà adi nêngàsè lwendu nye, ne nêngàmbè ne: “Mwaneetu Humes, ne wèwè ne mèmè, ne Mwaneetu Beeler ne bamwe bàà ku bàna beetu bàà balume, tuyaayi kùdi Papa Nzambi. Nenku, twàmbè ne, twànji kwenzaayikù kaalwendu kakese. Nwènù aba’s nuvwa banangè mikuna panùvwà . . .”

“Eyowa, ncya bushuwa ne tuvwa bayinange.”

⁷⁷ “Kaa, kùdi ndambu wa miliyò ya kilòmèètà ya yòyi ayi mu buloba bupyabupya mwàmwa. Ndàayi muntwamu, nwenda nwendakanamu.”

⁷⁸ “Bidi bikèngela bwa mèmè . . . ? . . . dìbà dya kuulu dituku dyònsò, didi dibànda muulu. Nènnùtèlèlèjè. Pàcidìbo bàakula apu, Nènteelejè.” Yeshàayi 66. Ncya bushuwa.

⁷⁹ Nenku nudi bamanye’s, mèmè mpàtukila lwà kwàka naka, twètù bònsò tupàtukila lwà kwàka naka anu munda mwa bidimu nkama yitaanu cyanàànà, anu kaalwendu kakese cyanàànà, mùliyò wumwe, kabiyi ne cidibi bishintululakù to, nwamonu’s.

Kadi mpindyewu—mpindyewu aci cidi cyumvwika bu bupâle, pààci's mbulelela. Nwamonu's, mbulelela, bwalu kakwena bya cikondo to, n'Cyendèlèlèlè. Nenku pândi mpatuka nya kwàka naka, ndi ngenda ngendela kwàka naka, kadi nudi bamanye ne úndi mêmè—mêmè—mêmè ntwilangana nende kuntwaku nganyi? Ndi ngamba ne: "Ee, piikalàbi ne wàwa kî m'Mwaneetu wa bakaji Georgie Bruce to! Mona's, Mwaneetu wa bakaji Georgie, s'kwênji ntanta mule úmwà mukumone's." Bimwèka anu bu ne yêyè úwva anuku misangu yònsò. Nwamonu anyi? Yêyè ùdi mwa kwikala ne bidimu miliyò dikumi, kadi mwikàle mwànà mutekete anu mwèndè ne kale. Mmufwànyine kwikala ùkoonya kampanda paanyima, ne pândi ntangila kwàka, s'Cisumpa-ntambwe, nyama wa ntambwe.

Ngamba ne: "Maalu kaayi mu dinda emu, wêwè Cisumpà-ntambwe?"

⁸⁰ "Nyâw," byenze bu kânà kàà mpusu's. "Kaa, mêmè's ndi kuntu kwàka nyiikilanganaku ne bamwe bàà ku bânà beetu bàà bakaji lwà ku bilòngò binène kwàka, tudi kwòkò aku kùkaadi binunu nkama yitaanu ya bidimu, wamonu's, munkaci mwa kukenzakana." Mpindyewu, aci's cidi cyumvwika bu dipaala, kadi's mbulelela. Ncya bushuwa menemene. Mushindu awu ngùvwà Nzambi mubyèlèlè meeji.

⁸¹ Ee, mwoyi wèbè wùbeneshiibwè, Mwaneetu wa bakaji Georgie. Dyenzelangana dya bibi kadiyikù mwa kulwa to, cintu nansha cimwe. Mu dîbà dya yîbaamulòlò netùbandè ku lusongo lwà mukuna, ne netwâmbè ne: "Éyì Papa Nzambi, musangu kampanda wàwa mvwa mujimine. Kaa, musangu kampanda wàwa mvwa nsanganyiibwa mu bitoci bya mpekaatu, Papa Nzambi, ki Wêwè kunsungila."

⁸² Mona's, bantu bààkateetateetà bwa kujikula cyôci aci bààkapaala. Ee, muntu wâkafùnda cituminyi cya ndekeelu cya *Éyì Dinanga Dyà Nzambi* awu, cyâkafundiibwà ku cimanu cya lupitaadi kampanda lwà babùlùke aci, wâkateeta bwa kujikula dinanga dya Nzambi awu. MwâkashâàlâYe wa ciipanshi bwa kusùngila bangènzâmpèkààtù, ne mushindu wâkenzâYe, dinanga Dyèndè dyâkapwekà bwa kutùsùngila wêwè ne mêmè adi. Nwènù bàdi bâmba bwa dikuukwila's, Banjelo kî mbamanye cintu nansha cimwe pa bwalu abu to! Dikuukwila, Mwanjelo mmumanye anu... Yêyè ùdi wîmana kwàka ne ùtuma mapwâpwa Èndè awu paanyima ne kumpala ne bikwabo, ne mu nseke ne: "Aleluuyah! Aleluuyah!" Kadi, kaa, luse we! Pàkaadibi bikafika ku kumanya kwa ne mêmè ewu mvwa mujimine ne nkàadi mupetulula, mvwa mufwe, ne nkàadi cyakabidi ne mwoyi! Éyì Nzambi wa yààyà, mêmè's mvwa mpekaatu, s'mvwa bitoci, ne mvwa nsanganyiibwa ku diyaala!

⁸³ Ki cidi citàmbe bwîmpè cidiku mwoyi wà pànu mwa kukupèèsha ncyôci aci. Kacya nukààdikù baye ku diyaala dya Colgate eku anyi? S'mmwaba mutàmbe kwikala wà mupuuya mubole wà kacya wûnkaadiku mêmè ewu musanganyiibwe. Mwishì wà kale awu wùdi anu wùngendesha ku mwoyi pândi ngukoka mu dyùlu apu. Mudyòlòle panshi mu mwishì wònsò wà kale awu, mu cifu mùkusaama bikole, mùkuvùnguluka anu dikuvùnguluka, paanyima pàà wèwè mumane kunwa bwanga bwa misanda bwa mafuta abu. Nwamonu's, ku mwoyi kùkwenda anu ne mwàkù mwònsò! Ne nkose yìkwendela pambidi pajimà, yiteeta bwa kukukunya. Nenku ki mwoyi wà pànù pa bulenga bwàwù ngwòwò awu. Ki pashiishe muntu kampanda wòlola cyanza ùkwambula. Ne wèwè mukulakaji wa dikema ne kùyiku ne pabwàsà to. Ne ùkwambula anu cyanàànà ne ùkwaluja ku mwànà wa balume wa bidimu dikumi ne mwandamukulu, ùkushikika pa lusongo lwà mukuna, ne mubidi tumatama pa wòwù, ekelekele, weyelaku kapeepa kimpè ne katalàle mushindu awu, mâyi a kunwa mîmpè ne a cyashima. Udikù mufwànyine kujinga kwalukila cyakabidi ku diyaala aku anyi? Kwidikiji, kwidikiji, kwidikiji, kwidikiji wadìdinga wàlukilakù cyakabidi ku diyaala adi to.

⁸⁴ Mpindyewu, ki cidici cyumvwija ncyôci aci, mulunda wanyì. Ki cidi cikeena-kumona aci, anyi ditentemunyiibwa adi, anyi nì ncinyi, cikeena-kumona. Mêmè nêngãmbè ne ncikeena-kumona, bwalu ndi ncina ne nkwepi kwàlwàci kutapa muntu ku mwoyi pândi ngamba ne nditentemunyiibwa, ki civwàci ncyôci aci. Mpindyewu, ki dîbà adi divwà Nzambi . . . cyàkenzà Nzambi bwa kufikisha bânà bàà balume ne bàà bakji kùdiYe. Mpindyewu, bantu abu mbanganyi? Mmushindu kaayi wùvwàbokù . . . Bantu aba cyàkenzàbo bwa kukumbanyinabo ciine eci ncinyi? Bòbò biine bààkafikaku ku dicyenza bishi's? Nzambi, ku cibangidilu, kumpala kwa Mwanjelo kampanda kwenjiibwaye . . . Mbanganyi bàdi bamanye ne Yèyè kàtu ne mikàlu? Yèyè kàyi nanku to, Kì n'Nzambi to. Pa nanku, Nzambi, mu luse Lwèndè lwà kalùyì ne mikàlu alu, Wàkamòna ne Lusifere neenzè cyôci aci, bu Yèyè bwa kufuka cyôci eci. Yèyè wàkabàtèèka pa budishikaminyi bwa disungula, cishimikidi aci. Ne wèwè ucidi pòpò apu, ncyà bushuwa, mucì wà maalù mîmpè ne maalù mabi muteekiibwe kumpala kwa yònsò wa kutùdi, wèwè udi wenza disungula dyebe. Nenku Lusifere nguvwa wa kumpala wa kulonda njila mubi. Ki kubangaye kukokela byònsò paanyima pèndè, mwena citù awu, ùteeta bwa kwangata byònsò anu bwèndè yèyè nkàâyèndè, ùteeta bwa kudyatakaja muntu mukwabo. Nenku ki pàakabangilàci mpòpò apu. Mpindyewu, tèelejàayi eci. Ki pààkabangilà mpekaatu mpòpò apu. Nzambi, mu meeji Èndè a kàyi mikàlù awu, wàkamòna aci, ne wàkamòna njila umwepele . . .

⁸⁵ Mpindyewu, nwènu bânà beetu ba-trinitaires, ncyèna ne

dijinga dya kunutapa ku mwoyi to, kadi mmunyi mu Dina dya Diyì dimpè dya Nzambi adi munùdiku bafwànyine kuteeka Yesu mwikàle mupersona mushiilàngàne ne Nzambi Yèyè mwine? Bu Yesu mwa kwikala mwangate mungà muntu ne mumutume bwa kuya kafwaye, bwa kupikula ewu muntu udi apa ewu, Yèyè's ùvwa mufwànyine kwikala muntu kàyi mwakane's. Kùdi njila anu umwepele uvwakù Nzambi mwa kucyenzela, ùvwa ngwa kwangata Yèyè mwine kaaba aku! Nénku Nzambi wàkalwa mubidi bwa kumonaYe mwa kulabula bisaamà bya lufu, bwa kuumusha kalonda aku ne lufu kutùdi, bwa twamona mwa kupikudiibwa kùdi Lwèndè Yèyè mwine. Ki bwa cinyi Yèyè neikalè ukuukudiibwa anu bya menemene. Yesu ùvwa muntu, ki civwàYe cya bushuwa. Yèyè ùvwa muntu, m-u-n-t-u, mulela kùdi virgo Mariya. Kadi Nyuma uvwa munda Mwèndè ùvwa n'Nzambi wa kàyi dipima, munda Mwèndè mùvwa musòmbèle kaabujima kàà Bunzambi mu mushindu wà mubidi. Yèyè ùvwa Yehowah-yilè, Yèyè ùvwa Yehowah-laafà, Yèyè ùvwa Yehowah-maanàsè, Yèyè ùvwa Yehowah; Ngabu wetù, Cibwikilu cyetu cya pa cyàdi, Mwondopi wetù; Yèyè ùvwa Alpha, Omega, Ntwadijilu ne Ndekeelu; Yèyè ùvwa wa Kumpala, wa Ndekeelu; Yèyè Uvwa, Ewu Udi, ne Wàlwa; Muji ne Mùtòlokù wà Davidi, Mutooto wà mu Dinda, mona's, Yèyè ùvwa Byònsò-mu-byònsò. Munda Mwèndè mùvwa musòmbèle kaabujima kàà Bunzambi mu mushindu wà mubidi!

⁸⁶ Ne lufu lùvwa misangu yònsò anu ne kalonda, kàvwàlu lùtwa bantu ne: "Aa," mùdi dyabulu wàmba, "ngàakupeci's, bwalu wantèeleji mèmè. Ndi nkusuma, nènkwelè mu lukita. Mashi a mikooko awu kaàkukwambulwishakù to, awu's adi anu mashi a nyama cyanànà." Kadi Nzambi, mu lungenyi Lwèndè, ùvwa mumanye ne kùvwa kùlwa Mwànà wa mukooko, mushebeya kacya ku difuka dya dyulu ne buloba. Eyowa's, mukalenge. Ne bôbò. . . Yèyè wàkindila cikondo aci, bwa kaabujima kàà cikondo kulwaku.

⁸⁷ Kadi dingingà dituku pàakalwà Mwànà wa mukooko mwine ewu, Muntu ewu, Sataana wàkakùtakajiiibwa. Kutangilaye ku luseke Lwèndè, kwambaye ne: "Wèwè ní udi Mwànà wa Nzambi, enzabi *cikampanda*. Wèwè ní udi Mwànà wa Nzambi, enzabi cishima tung mèmè mmone Ucyenza. Mèmè mmone Ucyenza. Uh-huh, mèmè nèmMuswikè mukùsù kwisù, nKutuute cintu. Wèwè ní udi muprofeta, twàmbilèbi wàKutuutù awu ne nganyì." Hum! "Mèmè ncyèna—ncyèna ngiitabuujà ne Wèwè ki Muntu awu nansha. Ní ng'Wèwè, twàmbilè buludi mùdibi ne ng'Wèwè." Nwamonu's, byònsò mushindu awu. "Kaa, twàmbilèbi ní ng'Wèwè's!" Yèyè kaakabuululaku Mwèndè mukana amu to. Kaa, kaa, Yèyè's wàkamwenza diyèlè!

⁸⁸ Yèyè wàkatàngila kùdi muyiidi awu, ne kwambaYe ne: "Mèmè's ndi mufwànyine kwambila Taatù Wanyi ne Yèyè mufwànyine kuNtumina bisumbu binènè dikumi ne bibidi

bya Banjelo, bu ne Mwwa muswe kwenza ciine aci.” Pilaatu kaakumvwaku aci to, nudi bamanye’s.

⁸⁹ “Wèwè ní udi! Wèwè ní udi. Kaa, wàwa kî n’Yèyè to. Mona’s, tàngilàayi numone mùdìYe ùtùuka mashi. Ê, bamwe bàà kunùdì nwènù basalaayi ndàayi nuMutwile makodi mwîsù amu.” KuMutwilabo makodi, kuMusekabo, kuMutuulabo manza a myedi ku cibàngà. “Kaa, kî n’Yèyè to! To, wàwa kî n’Yèyè to! NèMucimpikè kalonda kàanyi aka, ambà’s. NèMubàndishishè kuulu kwàka. S’ngààKupeci mpindyewu!”

⁹⁰ Ndekeelu wa byònsò pààkeelàYe lubila ne: “Eli! Eli! Nzambi Wanyi! Nzambi Wanyi!” Awu ùwa mmuntu. “WàNdekèdì bwa cinyi?”

⁹¹ Mu lupangu lwà Ngetèsèmànè, dilaabiibwa kuMuumukadi, nudi bamanye’s, byakakengela bwa Afwe bu ngènzàmpèkààtù. Yèyè wàkafwà bu ngènzàmpèkààtù, aci kaayi nudi bamanye; kayiyi mpekaatu Yèndè Yèyè to, kadi yànyi mèmè ne yebe wèwè. Mwaba awu ki wàkabwelelà dinanga adi’s, mwàkangatàYe yànyi mèmè! Kaa, aleluuyah! MwàkangatàYe yànyi mèmè!

⁹² Nenku ki Yèyè awu mwaba awu, Kàyikù mwa kubuulula Mwèndè mukana amu to. Kalonda aku kwambaku ne: “Udi mumanye’s, mèmè ndi ngeela meeji ne Yèyè ùvwa anu muntu wetù wa patupu ewu. Kàvwa mulela kùdì virgo to, bwalu ngààMucimpiki kalonda kàanyi.”

⁹³ Kadi ki yèyè ulwàlwa ewu, kuMucimpikaye kalonda kèndè aku, kadi awu musangu kaayi yèyè ùvwa ùtuuta mpanga ne mùsonà’s, balùmyànà! Kudituudishaye kalonda kèndè aku dîbà adi. Kèna mwa kukàbwejangana kabidi to kubangila ku dîbà adi, yèyè wàkashiya kalonda kèndè aku muntwamu. KubiikaYe ku lufu mu dituku diisàtù, ne kwambaYe ne: “Ndi Ewu uvwa mufwe, kadi udi cyakabidi ne mwoyi, ne mwikàle ne mwoyi bwa kashidi awu, Ndi ne nsapi ya lufu ne ya iferno.” Eyowa’s, mukalenge. Ùvwa mupangila bwa kumona ne Yèyè awu ùvwa nganyi. “Ne bwalu Mèmè ndi ne mwoyi, nenwikalè peenu ne mwoyi. Kî ncyanji kumweneka. . .”

⁹⁴ Dìngà dituku, matuku asatu anyi anaayi paanyima pàà cyòci aci, paanyima pàà Yèyè mubànde kùdì Taatù, mwalukile, pashiishe bamwe kwambabo ne: “Kaa, Yèyè’s. . . Yèyè—Yèyè ùdi ne cya kwikala mukishi. Yèyè ùdi ne cya kwikala cintu kampana cya mukishi’s Mulùmyànà awu. Ne twètù. . . Ní nudi baMumone. Nudi numona cikeena-kumona.”

“To, Yèyè’s ùvwa Yesu anu wetù wa cya bushuwa ewu.”

⁹⁵ Toomààsè kwambaye ne: “Mèmè ngǎnji mmone byanza Byèndè ne bikwabo byònsò, nenku nènñwàmbile ní mmwòmò.”

⁹⁶ KwambaYe ne: “S’m’Mèmè ewu.” Yèyè ne: “Nudiku ne mushipa ne dyàmpà mwaba awu anyi? Ntwadilaayi dyàmpà dyela minyiinyi túng.” Nenku kuMutwadilabo dyàmpà dyela

minyinyi, ki Yêyè kwimana mwaba awu e kudidyaYe. Yêyè ne: “Mpindyewu, nyuma ùtu ùdya mûndyadyà Mémè emu anyi? Nyuma ùtu ne misunya ne mifuba mûndi Mémè naayi emu anyi?” Nwamonu anyi? KwambaYe ne: “M’Mémè. Ndi cyôci aci.”

⁹⁷ Ne Pôlò wàkamba ne: “Kí ncyanjì kumweneka ne mmubidi wà mushindu kaayi menemene wutwikalà naawu to, kadi tudi bamanye ne netwikalè ne mubidi mufwanangane ne Wèndè” Cinyi? Kacya Yêyè ùkaavwakù ne mubidi wà teòfànì awu anyi? Eyowa’s, mukalenge! PààkafwàYe, Bible mmwambe ne “Yêyè,” ùdi cyakabidi mupinganyi-muleeji-muntu, “Yêyè wàkaya mu iferno ne wàkayiisha misuuka yìwà mu buloko.” Aleluuyah! Yêyè wàkacyèza bishi? Ùvwa ne byumvwilu bya lulengu, Ùvwa ne byumvwilu bya luumvu, Ùvwa ne byumvwilu bya dyakula, Yêyè wàkayiisha ne mubidi wà mushindu wumwewumwe wumvwà mumone bantu batùmbìshìibwe abu naawu bufuku kampanda abu. Yêyè wàkayiisha misuuka yìwà mu iferno, yìwà kayìyi minyingalale mu mwoyi-mule wà mu matuku a Noa ayi.

⁹⁸ Kadi pààkabìikàYe ku lufu mu dya Paasaka, kabìvwa mwa kwenzeka ne mubidi awu wùmònè dibola nansha, bwalu Davìdì muprofeta ùkaavwa mudyanjile kucimona ne: “Ncyakushiya musuuka Wèndè mu iferno, anyi Ncyakwitaba bwa Munsantu Wanyì kumonaYe dibola nansha. Kabidi mubidi Wànyì newikishe mu ditekemena, bwalu Yêyè kaakushiya musuuka Wànyì mu iferno nansha, anyi Yêyè kaakushiya Munsantu Wanyì bwa kumonaYe dibola nansha.” Nenku mèbà makumi mwandamutekete ne abidi kumpala kwa dibola kwenzekadi, teòfànì awu, mubidi wùvwà muye mukayiishe misuuka yìwà mu buloko, yìwà kayìyi minyingalale mu mwoyi-mule wà mu matuku a Noa ayi awu, kubiikawu ku lufu, ne cifwaka kuvwalaci dibènga-kufwà, ki Yêyè kwimana e kudyaYe, ne kutwambilaYe ne Yêyè ùvwa Muntu. Aleluuyah!

⁹⁹ Mushindu awu ki wutwaMumona’s, Mwaneetu Evans. Apu mpààsòmbàYe pa nkwaswa wa butumbi wa Davìdì. Aleluuyah! Apu mpatwikalà mwa kwendakana tubànda tupweka mpindyewu, nênye neenu mu lwendu lwà dyàmwàmwa dya mikuna munda mwa bidimu mùliyò mujimà, nwamonu’s, anu ndambu wa matuku cyanàànà, anu ndambu wa tusunsa cyanàànà, netuye luseke lukwabo alu, tukasòmba kuntwaku.

¹⁰⁰ Nenku pàkaadi dîbà dya kudya dikùmbana, nudi bamanye’s, katanci aka anyi, Mwaneetu wa bakaji Wood kwambaye ne. . . Mémè kwamba ne: “Mwaneetu wa bakaji Wood, ee, kùvwà nkwèpi ntanta yònsò wa dîbà ewu? Ncyèna mukumoneku to kwènjì. . . bwànyì mèmè’s mbyenze anu bu ne tùvwa ntusunsa dikumi ne tutaanu’s.”

“Kaa, s’kùkaadi bidimu binunu bibidi, Mwaneetu Branham.”

101 “Uh-huh. Udi udyumvwaku bishi?” Kaa, mu bushuwa bwa bwalu’s udi mwa kudyumvwa anu bimpè.

102 “Kùdii, anjì vwilààyibì apa tǔng, balumyana, nǎnnùleejè nwǎnù bǎnsò cintu kampanda, nwǎnù bǎnà beetu, bǎnà beetu bananga. Mpokolo wa mâyi nyèyè ewu mwaba ewu, matàmbe bwǐmpè anùdì kanùyikù banjì kunwa kacya. Nenku, kaa, twètù netunwe mâyi mǐmpè a cyashima. Nǎngòòlolè cyanza kwàka mpoole bisumbu binènè bya tumuma twa mvinyo, ne twètù bǎnsò netusombebe panshi mwaba awu bwa kutudya.” Aci kacyakwikalaku cilenga anyi? S’ki cyòci aci menemene. Anu aci ki cyòci.

103 Tudi bapete ciine eci bishi? Tudi bacimanye bishi? Nzambi, kumpala kwa difuka dya dyulu ne buloba, ùkaavwa mudyànjlè kutulongolola! Banganyi biine abu? Aba bàdi mu Buloba bulaya.

*. . . kudyànjlè kutulongolola ku diteekiibwa dya bǎnà
ku Yesu Kilisto . . . bilondèshìle disanka dǐmpè dyèndè
dya diswa dyèndè,*

Ku disaamuna dya butumbi Bwèndè . . .

Bwa twamona mwa kuMusaamuna mùtùYe mwambe amu. Ki cǐvwàYe ncyòci aci, Nzambi. Twètù’s tudi baswe kuMusaamuna.

*. . . disaamuna dya butumbi bwèndè bwa ngàsà wèndè,
kùdìye mùtùvwìje baanyìshìbwe mu munangiibwe
awu. (Mu Kilisto mmutùdì baanyìshìbwe.)*

*Mu yèyè mmutùdì bapetè dipikudiibwa ku mashi,
difwidiibwa dya luse ku m-p-e-k-a-a-t-u . . .*

104 Bidì bìkèngela bwa mǐmè kwalukila ku diteekiibwa, kadi ndi muswe kwimanyina pa “mpekaatu” apa bwa katanci kakese. “Mpekaatu,” nukààvwakù bamone aci anyi? Nutukù bamanye ne Nzambi kàtu ùpìisha ngǎnzàmpèkààtù bwa dyenza dya mpekaatu anyi? Yèyè ùdì ùmupìisha bwalu nngǎnzàmpèkààtù. Ngǎnzàmpèkààtù yèyè ùnwà cǐfwanka, Yèyè kǎna ùmupìisha bwa aci to; yèyè’s nngǎnzàmpèkààtù, twamb’eku twamb’eku. Nwamonu anyi? Nwamonu anyi? Yèyè kǎna ne mpekaatu to, yèyè ngǎnzàmpèkààtù awu. Yèyè ùdì anu ngǎnzàmpèkààtù, nwamonu’s, kǎna yèyè ne mpekaatu to. Kadi nwǎnù mbàdì ne mpekaatu, nwǎnù bàdì beena Kilisto abu. Nudi numona ne apa udiye yèyè wàmbila ng’Ekeleeziya. Bwa kumulama mululame’s. Nwamonu anyi? Nwamonu anyi? “Difwidiibwa dya luse ku mpekaatu,” m-p-e-k-a-a-t-u. Twètù mbàdì bènza mpekaatu. Kadi ngǎnzàmpèkààtù ùdì anu ngǎnzàmpèkààtù cyanààna, Nzambi kǎna ùmufwila yèyè luse to.

105 Mpindyewu, wèwè udi wamba ne: “Ee, yèyè’s mmupatuke mwab’ewu mukaase muntu cingoma. Ciwènza pa bwalu abu ncinyi?” Aci kǐ ncintangile mǐmè to. Mǐmè ncyèna mulongolodi

wa maalu to, mêmè ndi muyiishi. Mikenji nyàtàngilà bwalu abu, yôyi ki milongolodi ya maalu. Yôyi nyidi. . . “Ee,” mùdi wamba, “yêyè’s mmwendè masandi.” Aci, aci—aci’s nci tangile mikenji. Aci mbwalu bwèndè yêyè ne mikenji. Mêmè—mêmè—mêmè—mêmè ncyèna mulongolodi wa maalu to, ncyèna mêmè ndongolola bantu to. Cîndi mêmè nkeba mbwa kubafikisha ku dikudimuna dya mucima. Mêmè ndi muyiishi, nwamonu’s, wànyì mudimu ngwà kumufikisha kùdi Nzambi. Piikalàbi ne yêyè mmwenze mpekaatu, aci nci mutangile yêyè, yêyè’s nngènzàmpèkààtù. Nzambi ùdi ùmupiiishila mu cipidi citàmbe kutumbuka. Yêyè’s ùtu nngènzàmpèkààtù anu kwine kwònsò aku, yêyè mmupiiishiibwe anu kwine kwònsò aku. Yêyè kàtu mufike nansha mene pa cishimikidi cya ntwadijilu to, yêyè—yêyè—yêyè kèna mwaba nansha wumwe to. Yêyè nngènzàmpèkààtù anu kwine kwònsò aku. Yêyè kèna ne mpekaatu miine to, yêyè nngènzàmpèkààtù.

¹⁰⁶ Wêwè kwèna mufwànyine kupatuka pambelu kwamba ne: “Too ne *apa* ki bufuku, ne too ne *apa* ki mbufuku” nansha. To, cyònsò mbufuku, anu bufuku pa bufuku. Ki cyàkambà Nzambi ncyôci aci. Aci ncyà bushuwa, yêyè ùdi anu nngènzàmpèkààtù, kwajiki. “Mpindyewu, yêyè mmwenze nenku, too ne *apa* ki bufuku, *eci* mbufuku bwa bùkenka menemene lwà apa mene.” Ndi mumanye, kadi cyònsò cidi anu mbufuku, kwajiki. Nwamonu anyi?

¹⁰⁷ Ncyèna mufwànyine kwamba ne: “Too ne *apa* mbukènkè lwà apa mene” nansha. To, cyònsò cidi anu mbukènkè, nwamonu’s, anu bukènkè pa bukènkè, kwèna mwa kwamba ne ntoo ne mwaba kampanda nansha. Nwamonu anyi? Kadi yêyè mwikàle ditoba difiike mu *eci*, dibà adi mùdi mìdimà munda mwàci amu.

¹⁰⁸ Pa nanku “mpekaatu,” m-p-e-k-a-a-t-u, twètù tudì ne difwidiibwa dya luse ku mpekaatu yetu ku (cinyi?) Mashi Èndè, Mashi a mushinga mukole.

. . . *bilondèshìle mabanji a . . .wendè.*

¹⁰⁹ Tudi tucipwa mwoyi bishi? Bwalu tudi bakùmbànyine, tudiku benzèku cintu kampanda bwa mpekaatu yetu kufwidiibwayi luse anyi? Cinganyì Cyèndè?

. . . *ngàsà,*

¹¹⁰ Kaa, ekelekele! Ncyèna ne cintu nansha cimwe cîndi ndwa naaci mu maboko àànyì to, Mukalenge. Ncyèna ne cintu nansha cimwe cîndi mufwànyine kwenza to, kakwena cintu nansha cimwe cîndi mufwànyine kwenza to. Tàngilàayi! Yêyè ngudi mudyànjlile kundongolola, Yêyè ngudi mumbiikile, Yêyè ngudi munsungule. Kacya nci tukù mêmè mu Musungule Yêyè to. Yêyè ngudi munsungule mêmè, Yêyè ngudi mukusungule wêwè, Yêyè ngudi mutusungule twètù bònsò. Kì ntwètù bàdi baMusungule Yêyè to. Yèsu wàkamba ne: “Nwènù kí mbàdi baNsungule to, Mêmè ngudi munusungule.” KwambaYe ne: “Muntu nansha

umwe kèna mwa kulwa kùNdi pàdi Taatù Wanyì kàyi mumukoke dyambedi to, ne bônso bàdi Taatù muMpeeshe nebalwe kùNdi. Ne nansha umwe wa kùdìbo kî mmujimineku to, pa kuumusha anu mwànà wa dibutuka, bwa—bwa kuuja Mufundu.” Nudi numona anyi? Yèyè wákamba ne: “Kadi bônso bàdi Taatù muMpeeshe nebalwe kùNdi.”

111 Kaa, nkàadi ngenda mpicisha dîbà be, kî mmwômò anyi? Kadi ncyènàku mupatuke mu cyôci eci to. Ncyèna mwanji kubanga cyôci eci to. Ngǎnji kulwijakaja, bikèngela mfike ku cintu kampanda anu ne lukasa lwônso mpindyewu kaaba aka mene, nenku tudi tulwijakaja. Bìdi bikèngela bwa ngàalukilè ku diteekiibwa edi mu katanci kakese cyanàànà. Kaa, nudiku mwa kumfwila luse anu bwa—anu bwa katanci kakese cyanàànà anyi? Twàngataàyi eci eci kaaba aka, bamwe bàà ku bantu aba mbendè njila mule kuumukila ku Géorgie balwè kaaba aka anu bwa diloolo edi nkààyaadi, myoyi yabo yibeneshiibwè. Mpindyewu, wèwè mwaneetu mwena Géorgie, ne mwena Texas ne kwônso kunùdi bafumine aku, tèelejààyaaku mvensa mwi5 ewu. Twǎnji tùnengàayipù ndambu wa tusunsa.

Mudyànjile kutulongolola ku—ku. . .

112 Mwaku ewu “ku” wùdi wùmvwija cinyi, mwaku ewu “ku”? Wùdi wùmvwija cintu kampanda kutùdi tuya batàngile, ku. “Nyààya ku mpokolo. Nyààya ku nkwasu.” Humes, umvu aci anyi? “Nyààya mutangile ku bìrô.”

Mpindyewu, Yèyè mmudyànjile kutulongolola ku diteekiibwa dya bânà ku Yesu Kilisto kùdiye yèyè mwine, bilondèshìle disanka dîmpè Dyèndè Yèyè mwine dya diswa dyèndè,

113 Disanka bûngì kaayi? Dìvwa ndisanka dya nganyi, bwîmpè bwa nganyi? Bwèndè Yèyè mwine. Disanka dîmpè Dyèndè Yèyè mwine dya diswa Dyèndè Yèyè mwine!

114 Mpindyewu, “diteekiibwa” ncinyi? Mpindyewu ngàngatè eci mpindyewu, ncyèna mumanye ní. . . Ncyàkupeta dîbà dya kufika ku dijikija cyôci eci to, kadi nêmfikè ku dilenga bwalu. Dîbà adi, kwòkò lukonko, nudi mwa kulungeela pashiishe ndambu musangu kumpala mu diyiisha kampanda, cintu kampanda. Tèelejààyaaku. Diteekiibwa dyebe kî ndilediibwa dyebe to. Diteekiibwa dyebe ndishikikiibwa dyebe. Paùvwà mulediibwe cyakabidi apu, Yone 1.17, ngeela meeji, patùdi tulediibwa ku Nyuma wa Nzambi, tudi bânà bàà Nzambi. Kadi tuvwa badyànjila kulongolola. Mpindyewu cindi nteeta bwa mêmè kunufikishaku ncyôci eci, bwa bânà bàà ku dituku dya ndekeelu aba, nudi numona’s, ku. . . Nwamonu anyi? Tuvwa badyànjila kulongolola bwa (ku) diteekiibwa.

115 Mpindyewu, mpindyewu’s ki twètù aba. Mpindyewu, eci ki cidi citàpa ndambu beena Mpenta ku mwoyi. Bòbò bàdi bàmba ne: “Ngàalediibù cyakabidi! Mukalenge atumbe, ngààpeci

Nyuma Mwîmpè!” Bîmpè. Wêwè udi mwânà wa Nzambi. Ncya bushuwa. Kadi kî ng’aci ncîndî ngamba to. Nwamonu’s, nuvwa badyànjila kulongolola ku diteekiibwa. Diteeka, ndishikika dya mwânà.

¹¹⁶ Ndi mutàmbe kwikala pabwîpî ne cyôci aci, bwalu Becky ùvwa ùngambila ne ntu ntamba kufika pabwîpî naaci, mu mushindu wà kanùyi mwa kuumvwa paanyima apu to. Ndi . . .

¹¹⁷ Nwamonu’s, mwânà. Mbanganyi bàdîku bamanye bilele bya diteekiibwa mu Dipungila Dikulukulu? Mu bushuwa bwa bwalu, nwênù nukàadikù anu batangile. Mwânà wa balume ùvwa ùlediibwa. Ngeela meeji ne ndi naaci mu diyîsha kampanda. Ncinyî ciine aci, Gene, udi muvuluke anyî? Cîdi pa mukaba wà mêyi. Kaa, cîvwa ncinyî? Ndi—ndi—ndi—ndi mucilengè. Kaa, eyowa’s, ndi naaci: *Mutèlèlèjaayi Yèyè. Mutèlèlèjaayi Yèyè*; diteekiibwa dya bânà.

¹¹⁸ Mpindyewu, mu Dipungila Dikulukulu, pàvwà—pàvwà mwânà ùlediibwa mu dîkù, ùvwa mmwânà pàvwàye ùlediibwa apu, bwalu ùvwa ùlediibwa kùdi baledi bèndè. Ùvwa mmwânà wa balume wa dîkù adi ne mupyanyi wa bintu byônsò. Mpindyewu, mwânà wa balume ewu ùvwa ùkoleshiibwa kùdi bandeji. Galàtìyà, nshapita mwi5, mvensa wa 17 too ne ku wa 25. Eyo. Ùvwa ùkoleshiibwa kùdi bandeji, bakoleshi, balongeshi. Mpindyewu, cileejilu, bu mêmè ne mwânà wa balume mulediibwe, twàmbè ne, ndi taatù ne . . .

¹¹⁹ Nenku ki bwa cinyî mu Roi Jacques, mbanganyi bàkaadîku beele meeji ku cyôci aci ne ncya cikèmesha bikole pàdîbo bàcîbala mu Nkùdimwinu wa Roi Jacques, mwambè ne: “Mu nzubu wa Taatù Wanyi mùdi mabàlaasà àbûngî” awu? Mu nzubu, mabàlaasà àbûngî. Nwamonu anyi? Cya bushuwa, mu—mu matuku àvwà Bible mukudimunyiibwe bwa Roi Jacques, *nzubu* ùvwa “ncitùpà cya buloba.” “Mu *citùpà cya buloba* cya Taatù Wanyi mùdi mabàlaasà àbûngî.” Kî nne mu nzubu, mabàlaasà to, kadi Yèyè ùvwa ùbîikidiibwa ne n’Taatù wa citùpà cya buloba eci. Bôbò bàvwa bacyângàte anu cya Bible menemene, mu Bible mushindu awu ngùdîbi.

¹²⁰ Pàvwà taatù kampanda ne ferme munene menemene wa hectares binunu, anyî cintu cikwabo kampanda, ùvwa ne musumbà wà bantu basòmbèle lwà *apa*. Ùvwa ne beena mudimu bàà difutu basòmbèle lwà *apa* bwa kwikala kutangila mikooko, ùvwa ne bamwe lwà *apa* bwa kwikala kutangila ngombe, ùvwa ne bamwe lwà *apa* bàvwà bàya ku mpàtà uvwa kumutu kwàka mu ntanta wa nkama ya kilòmèètà, ne ùvwa ne bamwe lwà *apa* munkaci mwa kutangila mbuji, ne ùvwa ne bamwe munkaci mwa kutangila mpunda ne—ne bintu bishiileshìllàngàne. Yèyè—yèyè ùvwa anu ne bukalenge bunene. Nenku yèyè ùvwa ùbànda pa kampundu kèndè kakese ne ùya wènda wèndakana mu cyônsò cya ku byôbi abi bwa kumona ne bàvwa bishi, dikosa dya myôsà

ya mikooko ne byònsò bya mushindu awu. Yèyè kàvwakù ne dîbà. . .

121 Kanwena mwa kungumvwa pândi nya kule ne mwaba awu to. Nê—nê—nêntetè bwa kushàadila lwà paanyima apa. Nudi mwa kungumvwa bîmpè mpindyewu anyi, apa nunku? Tàngilàayi.

122 Yèyè ùvwa ùbàndapù ùya, ùya kule, ùteeta bwa—bwa kutangila bukalenge bwèndè—bwèndè. Pa nanku yèyè mmuswe mpindyewu. . . Mwanèndè wa balume awu ngwíkala mupyanyi wa byònsò bidiyè naabi abi. Yèyè ki mupyanyi.

123 Nenku patùdi tulediibwa mu Bukalenge bwa Nzambi, ku Yesu Kilisto, tudi bapyanyi bàà Dyulu, bapyanyi pamwe ne Yesu, bwalu Yèyè wàkangata kaaba keetu. Yèyè wàkalwa twètù (mpekaatu), bwa twètù kulwa Yèyè (bwakane). Nwamonu anyi? Yèyè wàkalwa mèmè bwa mèmè kulwa Yèyè, nwamonu's, bapyanyi pamwe Nende. Eyo, mpindyewu nwavulukaayi aci, yònsò wa kunùdi.

124 Mpindyewu, vùlukàayi ne, Nzambi ngwákadyànjila kukulongolola, ku didyànjila-kumanya, bwa ne wèwè uvwa ulwa ku Cyôci eci. Muntu yònsò udi ucyumvwa, àlè cyanza muulu, nwamonu's. Nzambi, ku didyànjila-kumanya, wàkadyànjila kukulongolola bwa wèwè kulwa ku Buloba bulaya. Bwa mwena Kilisto leelu ewu Buloba bulaya ncinyi? Ela anu cyanza muulu cyanààna pawikalà mumanye. “Mulayi wùdi kunùdi nwènù ne kùdi bânà beenu balela, kùdi aba bàdi kule. Nebyènzekè ne mu matuku a ndekeelu ne, mùdi Nzambi wàmba, Nèngìcikijè Nyuma Wanyi pa mubidi wònsò, bânà beenu balela bàà balume ne bàà bakaji.” Ne mu Yeshàayi 28:18: “Kanungu kàdi ne cya kwikala pa kanungu, mulongo pa mulongo; ndambu apa, ndambu pàapa. Shààlaayi bakwate bikole ku cidì cîmpè. Bwalu ku mishiku yidì yikukuminà ne mu myakulu mikwabo ki kùNgààkwilà ne cisàmbà eci. Ne Diikisha ndyôdi edi, diine—diine Diikisha adi's mbuloba bwa nsabatu bûMvwà mwambe ne mbùvwà bùkèngelà bwa kubwelabo. Kabidi, bwa byònsò ebi, kî mbaswe kuteeleja to, kadi mbakùpe mitu ne buumuke bayè, ne kî mbaswe kuCiteeleja to.” Nwamonu anyi? Menemene.

125 Cìvwa ncinyi? Anu menemene mùvwà bantu bààkèndà njila mujimà kuumukila ku Kaanààna, anyi kuumukila ku Ejiipitu abu, njila mujimà bapicile mu cipeela, ne kufiikabo anu pabwîpì menemene, pabwîpì anu pàà bikùmjàne bya bàlabula tumuma twa mvinyo twàkapàtukà mu bwine buloba abu atu. Mwaneetu, mwaba awu, bantu abu mbaswe bwa mèmè kuumusha cyôci aci, cya pa Ebelu 6 aci. Ndiku mèmè mwa kucyenza munyi? Beena kwitabuuja bàà ku mikàlu abu, bôbò kabaakusabukaku to! Kabeena mwa kusabuka to. Yesu ngudi mwambe ne: “Bwetu. . .”

Bàakamba ne: “Bankambwa beetu’s bàakadyà manà mu cipeela.”

126 Ki Yesu kwambaYe ne: “Bòbò abu, muntu ne muntu, s’mbafwe.” Mbwená kwamba ne mbatapuluke. Bòbò abu, muntu ne muntu, s’mbafwe. Ncya bushuwa. KwambaYe ne: “Kadi Mémè ndi Dyâmpà dya Mwoyi didi difùme mu Dyulu kùdì Nzambi. Muntu udi udyà Dyâmpà edi, yèyè kààdyàkufwàku to. Ncya bushuwa. Eyowa’s, mukalenge, yèyè ùdì ne Mwoyi wà Cyendèlèlèlè yèyè mudye Eci, Mémè ndi Muci wà Mwoyi wà mu budimi bwa Èdènà awu.”

127 Mpindyewu, nwamonu’s, bantu aba bàdì bàlwa too ne pabwìpì menemene! Nwamonu’s, bu nwènù mwa kumona mu Ebelu 6, kî nne ndi ngaalukila ku cyòcì aci to, kadi mu Ebelu 6: “Bantu aba musangu kampana balwè baabanyanganyi, balwè pabwìpì menemene, ne balabùle dipà dya ku Dyulu.” Bòbò kusòmba, kumonabo dyondopa dyènjiibwa, kumonabo bantu mu bukole bwa Nzambi, kumonabo nsòmbelu mishintuluke, kadi kabàyi baswe kuKùlenga to. To, mukalenge. To, mukalenge. “Ne balabùle bukole bwa buloba bùcìvwawwà; ne bu bòbò mwa kuteeta bwa kudyalujulula cyakabidi ku kanyinganyinga, bu mùdìbi ne bòbò—ne bòbò mbapoopèle cyakabidi bwa bòbò biine Mwànà wa Nzambi pa nkuruse, ne babalè Mashi a cipungidi àvwàbo bajidiibwe naawu . . .”

128 “Mémè ndi wa mu ekeleeziya udi witabuuja dijidiibwa.” Aci ncìmpè too ne pàdici cikafika apu, kadi wèwè kwèna uya ntàntà bule bukùmbàne to. Nwamonu anyi? Eyowa’s, mukalenge. Cipeela ncyàkabàjidilà. Eyowa, bushuwa. Bàvwà ne—bàvwà ne nyoka wa cyamu cya kabanda ne—ne cyoshelu cya cyamu cya kabanda, ne byònsò kuntwaku, dijidiibwa, kadi bàakabwela mu Palestine bwa diikisha. Kî . . .

129 Tàngilàayi mu Ebelu 4, yèyè kî mmwambeku ne “Diikisha dikwabo” anyi? Nzambi wàkafùka dituku dya mwandamutekete ne Wàkabàpèèsha diikisha mu dituku dya mwandamutekete. Mu mukwabo mwaba yèyè mmwakule bwa dituku dya diikisha, “ne leelu mu Davidi.” Pashiishe Yèyè kubapeesha Diikisha dikwabo ne: “Lwàyi kùNdi nwènù bònsò bàdì bènza mudimu mukole ne bambùle majitu makole, Mémè nènùpèèshè Diikisha.” Bwelàayi mu dyòdì Diikisha edi! Bwalu twètù bàdì babwelè mu dyòdì Diikisha edi tukàadi balekèle midimu yetu bu mwàkalekelà Nzambi Yèndè mu dya nsabatu. Cya bushuwa’s. Ki dyenu Diikisha dya Nsabatu ndyòdì adi. Ki dyenu Diikisha dilelela ndyòdì adi mu Buloba bulaya ebu.

130 Nyuma Mwìmpè mmulayi kùdì cisàmbà. Kadi ncinyi cyàkakèbelàbo bayiishi balongè tulaasa bàà dimanya dya ngwengwengwe, bàbàlekelà bàvwàla tuputululu ne bàkòsa nsuki yabo, bàlaaba kàpèntà kàà ku mishiku, ne balume bàdì bànya manayi a twarta twa mfranga ne bànwà maala a bière ne bènza

minèkù, ne bàtùngunuka ne kwenza kwa maalu a lukutukutu mushindu awu, cibi bàdibìikila mùdìbo bidimba bya ekeleeziya? Mona's, bôbò nebangate cintu kampana cya mushindu awu kadi kubenga bulombodi bwa Nyuma Mwîmpè! Mona's, Bible's mmwambe ne Diyì dya Nzambi nditwe kutamba mwele wà mvita wà nseke yibidi wùdì wùkòsa too ne mu mufuba, ne mene dijinguludi dya meeji a mu mwoyi. Eyowa's, nansha mene meeji àdì mu meeji!

¹³¹ Nenku twètù banange buloba anyì bintu bya pa buloba, dinanga dya Nzambi kadyena mene munda mwètù nansha. “Bààbùngì mbabiiikiidibwe, bakese mbasungudiibwe; bwalu mushiku wà mbelu mmubùmàkàne, ne njila udi ufla ku Mwoyi mmubùlàkàne, kadi nekwikalè anu bakese bààmupetà. Bààbùngì nebalwe kùNdì mu dituku adi, ne nebasombe mu Bukalenge,” mwàkambà Yesu, “pamwe ne Abraham, Izàkà ne Yakòbò. Kadi bàna bàà bukalenge nebiimanshiibwe pambelu, ne nebàmbè ne: ‘Mukalenge, twètù aba katwakenzaku *ikampanda* mu Dìna Dyebe anyì? Twètù aba katwenaku bayiishe anyì? Twètù aba katùvwakù Docteur *Kampanda* ne Révérend *Kansanga* anyì?’ ‘Kacya Ncítukù munumanye to. Ngumukilaayi apa, nwènù beena mudimu bàà bubi, Ncìvwa munumanye to.’ Kì mbònsò bàdì bàmba ne: ‘Mukalenge, Mukalenge,’ bààbwelà to. Kadi ewu udi wenza diswa dya Taatù Wanyì udi mu Dyulu awu, yèyè awu ngudi ubwela.”

¹³² Ki bwalu mbwabu, kubwela kwa mu Buloba bulaya ebu. Tudi tubwelamu bishi? Twètù tudi badyànjila kubulongolwela. Ekeleeziya, ku didyànjila-kumanya dya Nzambi, ùkaadi mudyànjila kulongolola (ku cinyì?) ku buneeme Bwèndè, ku ngàsà Wendè, ku butumbi, ne dikuukwila ne butumbi bwa Nzambi. Papa, musòmbè kwàka ku cibangidilu, mwikàlekù nkààyendè, kakùyì cintu nansha cimwe ku luseke Lwèndè to, kuswaYe bwa cintu kampana cìikalè cìMukuukwila, pa nanku kudyànjilaYe kuteeka mu mudimu ne kudyànjila kulongolola Ekeleeziya kampana, ne kumpala kwa difuka dya dyulu ne buloba, ne kufundaYe mènà abo mu Mukanda wà Mwoyi wà Mwàna wà mukooko, pàvwàbo. . . mushebeya kumpala kwa difuka dya dyulu ne buloba, bwa bààmòna mwa kumweneka ku butumbi Bwèndè ne ku diMusaamuna ku ndekeelu kwa cikondo, piikalà bintu byònsò bidìsangìshe mu Muntu umwepele, Kilisto Yesu. Yoyöyò! Butumbi's we! Ki mùdìci amu. Aci's cìdi anu. . . Nenku's ki cyòci aci mwaba awu mene, mwaneetu wa balume, mwaneetu wa bakaji. Kùumukukù washiya Aci to.

¹³³ Nzambi, ku ngàsà Wendè wa disungula, wàkakubìikila. Nzambi, ku ngàsà Wendè wa disungula, wàkakujidila. Nzambi, ku ngàsà Wendè wa disungula ne ku bukole Bwèndè, wàkakubàtiiza ne kukubweja mu buloba bwa Diikisha ebu. Aba bàdì babwelè mu Diikisha edi mbamane kwimanyika dipambukapambuka dyabo. Mbamane kwimanyika midimu

yabo mwàkiimanyikà Nzambi Yèndè. Bôbò bàdi ne disanka kadiyi kwamba, ne dyùle tente ne butumbi! Muci wà Mwoyi wùdi munkaci mwa kwela bilòngò munda mwabo. Bàdi ne mwoyi-mule, ne ditalala dya maalu, bwîmpè, lutuulu luvwijùbwe diitabuuja, diitabuuja, bupole, ditalala dya maalu, ne bikwabo. Muci wà Mwoyi wùdi munkaci mwa kwela bilòngò munda mwabo bwalu dyabo ditekemena ndyele lwongò mu Kilisto Yesu, bujaadiki bwa Nyuma Mwîmpè munkaci mwa kujaadiki pamwe ne bimanyinu ne maalu a kukema bìdi bifila beena kwitabuuja ne: “Bimanyinu ebi nebifile bàdi bìtabuuja.” Pàdibo bènda bàya apu, bàdi bòndopa babeedi, bàdi bìipata baadémons, bàdi bààkula mu myakulu, bàdi bàmòna bikeena-kumona. Bàdi...Ne bôbò bàdi bènda pamwe ne Nzambi, bàdi bàyiikila ne Nzambi. Démon nansha umwe kènàku mwa kubanyungisha to, bôbò mbashimàte, bàkèba...?...Biikàle bàpwa mwoyi bintu bikaadi bimane kupita abi, bàdi bàkolesha batàngile ku kiipacila kàà dibiikila ditùmbùke mu Kilisto Yesu. S’ki bôbò abu. S’ki bôbò abu. Ekeleeziya awu nyawu.

¹³⁴ Mbakafike kwine aku bishi? Kwèna mwa kwamba ne: “Ee, Mukalenge, Wèwè’s udi mumanye ne, dîngà dituku ngâkabanga kunwa bifwanka, nenku mêmè kudishinda, pashiishe mêmè kudyambidila mûmvwà mufwànyine . . .” Kaa, to, to, to, to.

¹³⁵ Didyànjila-kulongolola! Yèyè ngwâkatùbiiikila, ne patùdi baMulondè ki patùdi twamba ne: “Nzambi, tuvwa bajimîne ne banyanguke. Katùvwakù mene ne meeji a kudisungila twètù biine to. Tuvwa ne ngiikàdilù wa ngulube, tuvwa ngulube anu kwine kwònsò aku.”

¹³⁶ Wèwè udi uya ku lupangu lwà ngulube ne utàngila ngulube mukaji mukole, wamba ne: “Mpindyewu, tangila kuneeku, wèwè ciimaamù cikulakaji eci, ndi muswe nkwambile bwalu. Mbibi paùdi unwa màyi a bucyafu.”

¹³⁷ Yèyè’s mmufwànyine kwamba ne: “Ngwèng-ngwèng.” Nwamonu anyi? Mpindyewu, ki mùdi pèèbe mwà kudisungila nkàyeebe mmwamù. Ki cyôci menemene.

¹³⁸ Wèwè udi wamba ne: “Inăbànzà, kabivwa bikèngela bwa wèwè kuvwala bilâmbà mushindu awu to, bivwa bikèngela wèwè kuvwalaku ne mankenda. Bivwa bikèngela wèwè kwenza *cikampanda*. Kabivwa bikèngela kwikala uya ku...Kabivwa bikèngela wèwè kwikala wenza manayi a twarta aa to. Kabivwa bikèngela wèwè kwikala unwa mfwanka to. Kabivwa bikèngela wèwè kwikala wenza *cikampanda* to. Mukalenge, kabivwa bikèngela wèwè kwikala wambula *cikansanga* to.”

¹³⁹ Yèyè wamba ne: “Ngwèng-ngwèng, mêmè ndi wa mu *Ngwèng-ngwèng*.” Uh-huh. “Ngwèng,” aci’s cidi anu bu ne ki cyèndè pèndè cidiye mumanye. “Ee, ndi nkwambila ne mêmè ndi mwîmpè anu mùdi wèwè amu. Ngwèng-ngwèng!” Nwamonu’s, bàdi bàbènga bulombodi bwa Nyuma Mwîmpè, bwalu Bible

mmwambe ne wêwè munange maalu a pa buloba anyi bintu bya pa buloba, dinanga dya Nzambi kadyena nansha munda mwebe to.

140 Cidi cibàvwijà bàà pabwàbò ncinyi? Nwênù's nudi ditunga dya cijila. Cinùdi benze ncinyi? Nudi bapatuke mu buloba abu. Nukààdi nusanganyibwa mu Buloba bukwabo mwamwa. Nudi bakafike mwine amu bishi? Ki Buloba bulaya mbwòbù abu. Mmulayi wà mushindu kaayi awu? “Nebyenzeke mu matuku a ndekeelu, mùdi Nzambi wàmba, Nèngiìcikijè Nyuma Wanyì pa mubidi wònsò.” Ku Nyuma umwepele nkutùdi bònsò babàtìijìibwe mu Buloba bulaya bumwepele ebù. Amen. Bàna beetu bàà balume ne bàà bakaji, aleluuyah, ne bukezuke bwa mwoyi, mukawu nansha mukese, lukunà nansha lukese, kantu nansha kamwe! Nansha byòbi ne mwaneetu mmupambuke, cidiye wènza nansha ciikàle cinyi, wêwè neuye anu wenda ukebangana nende.

141 Mvwa muye ngenda nkebangana ne mwaneetu wa balume kampana kî nkwanji kwenza ntanta to, uvwa mupambuke. Nsongààlùmè kampana kungambilaye, wàmba ne: “Lekèlà muntu udi mupange kaneemu bwa bukwabo awu àye kùyaayàye. Mulekèlè's.”

142 Mémè kwamba ne: “Mémè anu mudidinge mukafike mu mushindu wà mwoyi wànyì kawùciyi wènda pamwe ne mwaneetu to, dîbà adi ki didi dikèngela bwa mémè kuya ku cyoshelu, bwalu ngààpangìdi ngàsà.” Mémè kwamba ne: “Mémè nénye dîbà dyònsò dicidiyekù anu ne mweyelu mu mubidi wèndè adi, nenku nèmubàkwilè mwaba kampana mu njila amu.” Eyowa's, mukalenge. Ki mémè kumubakula's, aleluuyah, ne kumwaluja. Eyowa's, mukalenge. Yèyè's ùkaadi mwalukile mu cikùmbi ne dikubiibwa dyònsò patùdi twakulangana apa. Eyowa's, mukalenge. Yèyè nunku's mmupambuke cya bushuwa anu mùdi bulobakù emu.

143 Kwènji cikondo kampana pâmvwà mumone mukaji mukese mukwate ne bya luse awu musòmbè mwaba awu, ki munene wa bampulushi kumbiikilaye, kwambaye ne: “Mona's, s'bivwa bikèngela kwikalaye muvwale kankoozi kàà bapàlè's.” Yèyè ne: “Ùdi anu musalàkàne lungenyi cyanàànà, mmujimije lungenyi.” Yèyè—yèyè, mbamuteeke mu nzubu wa cilààla-beenyi. Mbalwe.

Mémè kwamba ne: “Aci's mbîmpè.”

144 Yèyè ne, munene wa bampulushi awu kwambaye ne: “Mona's, Billy!” Mémè ntu mumumanye bîmpè menemene, ne mumumanye kacya anu pàncivwà mwànà. Kwambaye ne: “Kwòkù cintu cîndiku mwa kwenza bwa kukwambulwisha's.”

Mémè kwamba ne: “Aci's mbîmpè.”

Yèyè ne: “Wèwè udiku mwa kumwambulwisha anyi?”

Mémè ne: “To, kadi Yèyè ngudi mwa kumwambulwisha.”
Mémè ne: “Anji indila kakese.”

¹⁴⁵ Pa nanku kupatukabo nende pambelu apu. Kadi pùmùkù mukaji awu kùkaadi katanci, mmu ditalala. Cìvwa ncinyi? Tuvwa batume disambila bwa kumulonda. Amen! Yèyè ùvwa mu mushindu wà ne . . .

¹⁴⁶ Kwambabo ne: “Udi muswe kwangata ngangabuka anyi?”
Bòbò kwambila bàyèndè ne: “Udi muswe kwangata ngangabuka anyi?”

¹⁴⁷ Yèyè ne: “Ngangabuka kèna ne cidiye mwa kwenza bwèndè yèyè nansha cimwe to.” Ne aci ncyà bushuwa. Yèyè mmupàle; ngangabuka kèna ne cidiye mwa kwenza bwèndè yèyè nansha cimwe to.

Kwambaye ne: “Dyetu ditekemena dimwepele didi anu kufika *kwàka*.”

Ki kwambaye ne: “Billy, ncyèna ngumvwa aci to.”

Mémè ne: “Ncyèna ntekemena bwa ne wèwè newùmvwè to,”
nwamonu’s, “ncyèna ntekemena bwa ne wèwè newùmvwè to.”

¹⁴⁸ Kadi, kaa, ekelekele, nansha mémè ncyèna ncyumvwa to! To. Kadi, mwaneetu, Nzambi mu Dyulu . . . Mvwa pàànyì muye kwàka kule, musangu kampanda, Cintu kampanda cyàkandonda. Amen! Kacivwa ne mbwalu mvwa muswe kulwa to, kadi, to, Cintu kampanda cyàkandonda. Bwalu kumpala kwa difuka dya dyulu ne buloba, Nzambi wàkadyànjlila kulongolola, aleluuya, bwa ne twètù tuvwa mwa kwikala Bèndè Yèyè, bwa buneeme ne butumbi Bwèndè. Tèèlejàayi! Aba bààkadyànjlilàYe kumanya, Yèyè mmwenze cinyi? Wàkabiikila. Ncyà bushuwa anyi? Yèyè mmukubiikile anyi? Eyowa! M’Mukubiikile bwa cinyi? Yèyè wàkadyànjlila kukumanya. Aba bààkadyànjlilàYe kumanya abu, mMubabiikile; aba bàdìYe mubiikile, mMubatumbishe. Ncyà bushuwa anyi? Ne aba bàdìYe mubingishe, mMubatumbishe! Amen! Aci ncidi Bible mwambe ne: “Aba bààkadyànjlilàYe kumanya, Wàkabàbiikila.” Lukongo ne lukongo lwònsò! Aba bààkabiikilàYe, Yèyè ùkaadi mumane kubatumbisha. Cinyi? Ngànji mbalebi Mufundu ewu. Eyo.

*Mudyànjlile kubalongolola bòbò ku ditekiibwa dya
bàna ku Yesu Kilisto kùdìye yèyè mwine, bilondèshile
disanka dìmpe Dyèndè Yèyè Mwine . . .*

Ku disaamuna dya butumbi Bwèndè . . .

¹⁴⁹ Kaa, nudi ncyumvwa anyi? Ku disaamuna dya butumbi Bwèndè! Bwa Wàmòna mwa kusòmba mwaba awu mu bikondo bya Cyèndèlèlèlè bìdì ne cya kutungunuka byènda bìya, ne bàna Bèndè bàvwa ne cya kwela lubila lukole ne: “Abba, Taatù! Abba, Taatù!”

¹⁵⁰ Ne Banjelo bàmba ne: “Cìdìbo bàmba ncinyi? Cìdìbo bàmba ncinyi?”

151 Ncileejibwe bilenga bya dikema mu mwânà mutuulavi wa mfranga. “Mvwa mujimine.” “Ewu mmwanàanyi. Ûvwa mujimine kadi mpindyewu wàpetèkì. Ûvwa mufwe, kadi ùdi ne mwoyi cyakabidi. Lwâyi ne kânà kâà ngombe kâà maanyi, muzàbi wà mutàmbe bulenga, ne mpètà bwa numwele ku munu. Nenku twènzàayi. . .” Kì mbya dyela mpatà to mùvwà mitooto ya mu dinda mimbe pamwe, bânà bàà Nzambi beelè mbila ya disanka, pààkamònàbo ndongamu wa lupandu, Nzambi ùfùnda dîna dyebe mu Mukanda kumpala kwa difuka dya dyulu ne buloba.

152 Mpindyewu wêwè udi wamba ne: “Calvin’s ùvwa wìtabuuja cintu cya mushindu awu.” Mémè nçitu mwitabuuje Calvin nansha. Calvin ùvwa mushebeyanganyi. Calvin wàkashebeya muntu ne bwalu ùvwa ùbàtiiza mu Dîna dya Yesu. Yèyè ùvwa muntu mupange kaneemu bwa bakwabo, bikèngela bwa akudimwishibwe mucima, yèyè mwine awu. Eyowa’s, mukalenge. Kadi byàkambàye, pa bimwe bya ku bintu byàkambàye, abi kaayi bìvwa bilelela. Kanwìkadi. . .kadi civwàye. . .Cyenzedi cyèndè, muntu wa ùshebeya muntu bwa cintu bu nanku, aci’s nçya cikwàcisha bwòwà’s, aci’s nçibi. Eyo.

Bìdàye mutuwudijile ku . . .

153 Kaa, indilaayi, nçyèna mukalengè ku “diteekiibwa” adi to, mmwômò anyi? Dìbà dikaadi dimpite bikole anyi? Tùmònàayibi tũng cidi ntanku udi kuulu eku ewu ùleeja, dìbà ditùkaadi. Eyo. Twàngatàayi anu—anu tusunsa dikumi cyanàànà bwa bantu bàdi bafumine ku ntanta buleyi aba. Tàngilàayi. Tàngilàayi.

154 “Diteekiibwa,” lekelaayi nnuleeje ne mbwa cinyi didi dyènjibwa mpindyewu. Taatù kampana ùdi ne bukalenge bunene, ùnyùngulukamù mubànde pa kabalu. Mpindyewu bààmulelèdì mwânà wa balume. Kaa, yèyè ùdi ne disanka diyiila ne panshi! (Kì Nzambi awu.) Pa nanku nudi bamanye cidi taatù awu wènzà anyi? Ùdi ùpeta mukoleshi wa mutàmbe bwìmpè, ndeji. Nwènù nudi bamanye ne ndeji nganyi, kì mmwômò anyi? Mmulongeshi wa kalaasa. Ùdi ùpeta mulongeshi wa kalaasawa mutàmbe bwìmpè menemene udiyè mwa kupeta mu ditunga dijimà awu. (Nenku dìbà adi tudi twenda tuya mpindyewu, tèelejàayi.) Nenku yèyè ùdi ùpeta mulongeshi wa kalaasa wa mutàmbe bwìmpè udiyè mwa kupeta awu. Yèyè kèna wàngata anu cidindingi nàka eci to, yèyè mmuswe bwa mwanèndè wa balume awu kwikalaye muntu wa nsongo.

155 Nwènù kanwenaayiku baswe bwa beenu bânà kwikalabo mushindu awu anyi? Cya bushuwa’s, cya citàmbe bwìmpè cinùdiku mwa kubapeesha aci! Eyowa’s, mukalenge. Pa nanku pìikalà muntu wa mubidi mwa kwela awu meeji, nudiku nwela meeji kaayi bwa cidi Nzambi wèla meeji bwa Bèndè bânà? Citàmbe bwìmpè cidiYe mufwànyine kupeta aci’s.

¹⁵⁶ Pa nanku, yêyè mmuswe muntu wíkala ne meeji matooke. Mpindyewu, yêyè kî mmuswe bwa muntu kwambaye ne. . . kî mmuswe muntu wa wàmba ne: “Mpindyewu, tangila, mêmè—mêmè. . . Junior, enza wêwè anu cintu kanà cyònsò cyùdi muswe kwenza aci, munanga wanyi” to. “Kaa, eyowa’s, taatù, uh-huh, yêyè ùdi bîmpè, yêyè mmwànà mulenga.” Bàmutuutakù kaadipi pa mwongo apu ne disàlà dyasa ku cifulu. To, to. Awu muntu’s mmufwànyine kwipaciibwa ku mudimu anu mpindyewu mene. Bushuwa’s. Yêyè mmuswe muntu wíkala mwambi wa bulelela. Pìikalà mwâna awu ùlwa mululame, mwambile. Yêyè kàyi ulwa mululame to, mwambile cìdi kacìyi cyènda bîmpè aci.

¹⁵⁷ Kadi pìikalà taatù wa pa buloba wèla meeji awu. . . Wêwè kwênàku mufwànyine kuswa bwa muntu kwikalaye wa meeji matooke kùdi, bwa mulongeshi wa kalaasa awu kwikalaye wa meeji matooke pa bìdi bitàngilà bânà beebe anyi? Cya bushuwa’s. Ee, udi welaku meeji ne Nzambi ùdi wèla meeji kaayi? Ne Yêyè’s mmumanye; twètù katwena bamanye to, Yêyè mmumanye. Twètù tudi ne mikàlù, katwena bafwànyine kumanya to. Kàdi Yêyè kèna ne mikàlù to ne mmumanye cya bushuwa.

¹⁵⁸ Pa nanku, nudi bamanye cìdi Taatù mwenze anyi? Kacya Yêyè kàtukù mwambe ne: “Nêngàngatè paapà kampanda bwa kutangilaye bânà Bàànyì” to. Anyi Kàtukù mwambe ne: “Nêngàngatè mwe—mwepiskopo kampanda” to. To, to. Yêyè kààkenzakù aci to, bwalu Úvwa mumanye ne paapà neatupakane, nansha mwepiskopo kabidi. Nwamonu anyi? Kacya Yêyè kàtukù mwambe ne: “Nêngàngatè mutangidi wa bònsò bwa kutangilaye ekeleeziya Yànyì” to. To, to.

¹⁵⁹ Yêyè mmwangate Nyuma Mwîmpè. Ki uvwa Wendè Ndeji, uh-huh, bwa kukolesha bânà Bèndè. Eyo. Dìbà adi mmunyi mùdi mufwànyine kumanya ne Nyuma Mwîmpè mmucimanye? Yêyè ùdi wàkwila ku mishiku ya buntu. Mmunyi mùdi wêwè mumanye ne Yêyè ùdi wàmba Bulelela? Paùdi umona Nyuma Mwîmpè wàkwila ku mishiku yìdi yàmba Bulelela anu menemene misangu yònsò, yidyànjlila kwamba ne pààbì byènzeka anu mu byòbì menemene, mwàkambà Samwèlè, dìbà adi’s udi umanya ne m’Bulelela. Cìdi cìlwa anu cilelela. Bwalu Nzambi wàkamba ne: “Yêyè wàkula kadi cìdiye wàmba kacìyi cyènzeka to, kanumuteeleji to, bwalu Mêmè ncyèna nende nansha. Kadi yêyè wàmba cintu cyènzeka, ee, dìbà adi numuteelejaayi, bwalu Mêmè ndi nende.” Nwamonu anyi? Ki bwalu mbwòbù abu. Mushindu awu ngùdiYe wènza.

¹⁶⁰ Mpindyewu, dìbà adi Yêyè ùdi wèndakana eku ne eku. Mpindyewu, nudi nwela meeji ne Ndeji awu mmufwànyinekù kwamba cinyi bu byòbì mwa kukèngela bwa kuyaYe kùdi Taatù aku? Bwa kwambaYe ne: “Bânà Beebe—Beebe bàdi bènza maalu mu mushindu mubi be. Nyawu nKwambila’s, mwan’Ebe wa balume awu, yêyè, hum, s’mmuntu mupidyè diitabuujà. Yêyè’s ncijijibùlùndù, kacya mêmè nçitukù mwanjì kumona muntu wa

mushindu wàwa to! Ekelekele, Udi mumanye cidiye wènza? Ne mwan'Ebe wa bakaji awu! Kaa, yoyöyò, ncyéna mumanye ne ciWikalà mwa kwenza nende ncinyi to. Hmm. Ee, Udi mumanye cidi bwalu? Mmumweke anu bu ne yéyè. . . Mmudilaabe bilaabu bya kwisù anu mùdi bamwe bàà ku bàna bàà bakaji bàdi kwàka bàba. Mwena Pelèshètè. Eyowa's, Mukalenge, yéyè mmuswe kwikala wènza maalu anu mùdìbo bènza bóbò amu."

"Mwan'Àanyi Mémè wa bakaji?"

161 "Eyowa, s'mmwan'Ebe wa bakaji awu." Ki cidi Nyuma Mwimpè mwenzèjìbwe bwa kwamba bwa ekeleeziya leelu ewu ncyôci aci. Kabyena bikemesha to patùdi katùyikù mwa kupeta ditabuluja. Nwamonu anyi? Mpindyewu, aci's ncilelela.

"Kadi bishi bwa mwan'Ebe wa balume yéyè? Huh? S'ncintu anu cyôci cimwecimwe aci."

"Cinyi?"

162 "Ee, Wèwè's udi mumanye ne Ukàadi misangu yònsò mwambàmbe ne bìdi bikèngela bwa mikooko ayi kwikalayi yidìila mu mpàtà udi kuntu kwàka wàwa yìdya Cyakudya cya mikooko cyàcya nàka. Eyowa's, Udi mumanye cidiye mwenze? Mmujuuke kadi kuyisaka kuya naayi mu mushiki wà bisoosa bibi wàwa. Mmujuuke kuya anu kwìnshi kwàka mùdiye mukayilekèlèlàngàne yònsò mu kasulu kàka, ne muyilekele milàale lwà ku mushiki wà bisoosa bibi byàbya, munkaci mwa kudya bisoosa bya twèbà byàbya, ne yôyi yikaadi minyaanùnùkàngàne yònsò mu mushindu wà ne bikaadi bìyikolela bwa kupàtukamù." Abu's mbeepiskopo, bampaasata bàdi bàvila Bukole bwàci abu. "Ee, Ndi nKwambila bulelela, Ncìtukù mwanji kumona cisumbu cya mikooko mibìndùlùke ya mushindu wàwa to kacya bàNdela." Yéyè kàtu musweku aci to. To. "Kadi Udi mumanye mùdi bwalu? Ngombe yidì apa eyi, Wèwè's udi mumanye ne Utu—Utu mubàmbile bwa kwikalabo bayidisha lutende lùdi pàapa lwàlwa—lwàlwa, Udi mumanye's, bwa kuyidyundishalu?"

"Eyowa."

"Udi mumanye cidiye yéyè uyidìisha anyi?"

"To."

163 "Mingòngà mikulakaji ayi. Eyowa. Yéyè ùdi ùbàsàka ku diya kashàala bàà mu tusumbu twa bantu basunguluke ne bikwabo byònsò. Kacya Wèwè kùtukù mwanji kumona cya nàka to kacya bààKulela. Wèwè kùtukù mwanji kumona cya nàka to kacya bààKulela. Udi mumanye cidiye wènza? Upàtuka kwàka wènda ùnwa cifwanka cinène, mwalukile cyanyima. Ùdi wàngata mukàjèndè bènda bèndakana nende, mukaji muvwale kaputulu anu mùtù twena Pelèshètè atu tùvwàla pambelu pàapa amu. Eyowa's." Mukenji wà mushindu awu ki wùdi Nyuma Mwimpè

mwenzèjìibwe bwa kutwàla pa bidì bitàngila ekeleeziya leelu ewu. Mpindyewu, nudi peenu nwela meeji kaayi bwa ciine aci?

164 Ki diteekiibwa ndyòdì adi. CidìYe. . . cyàkenzàYe ncinyì? Wàkadyànjila kutulongolola twètù—twètù ku diteekiibwa. Yèyè mmutupeeshe Nyuma Mwímpè; kadi, anjì indilaayi kakese tǔng, diteekiibwa, ki citùdì twamba. Diteekiibwa!

165 “Ee, Udi mumanye cidìye wènza? Mwepiskopo awu mmulwe dituku adi, ne kumwambilaye. Yèyè ùvwa ne kaadisangisha kakese kàà dyondopa kàvwàye munkaci mwa kwenza kuntwaku, ki mwepiskopo kuvwilayepu. Muntu kampanda, mwaneetu wa balume kampanda, kuvwilayepu ne ùvwa ùsambidila babeedi. Kadi yèyè kwamba ne: ‘Imanyika abi!’

“Kaa, kaa, eyowa, taatù mwepiskopo, nèngènzè nanku.’

“Kwedyanganyi nende mu diboko nansha.’

“Kaa, to, to, taatù mwepiskopo, ncyà bushuwa nanku.’

166 “Kadi ki mèmè kulwa ne kumwambila Bulelela bwa mu Dìyì Dyebe. Wamonu’s, s’ki Bwòbù ebu. Mèmè kumubadila mikenji Yebe anu menemene cìvwà cìkèngela kwenza, kadi yèyè kàyi ùyitèèlajakù to. Kwambaye ne: ‘Kaa, abi’s bìvwà mbya cikondo cikwabo, mwànà wa balume mukwabo wa cikondo cikwabo kampanda. Abi kabyena bwànyi mèmè to.’” S’ki bwalu mbwòbù abu. Aci, mpindyewu aci’s ki Bulelela, mulunda wanyi. Mpindyewu kanwenaayiku numona mwaba wùdì ekeleeziya ùpàngila dishikikiibwa dyèndè, bwa cinyì katwena bapetè òtabuluja, bwa cinyì katwena ne bintu biikàle bitungunuka anyi? Ki mwaba wùdici cìsanganyiibwa ngwòwù awu.

167 Yoshùwà wàmba ne: “Gaadà, ndi muswe bwa wèwè. . . anu mwòmò emu ki mùdì mùsanganyiibwà keebe kaaba bilondèshìle dizola, keebe kaaba kàdi kàsanganyiibwa mwaba ewu, mwaba ewu mene. Bwela emu, Gadà, ne ùshaalè mwaba ewu. Wèwè Benyàmìnà, udi upweka buludi mwaba ewu. Nenku mpindyewu nwènù bònsò nùshaalàayi kule ne mukàlù wà beena Pelèshètè.” Dya Yoshùwà wàlukila anyì, ki bòbò aba myaba yònsò mu beena Pelèshètè, munkaci mwa kwenza fète munene wa mutooyi wàbùngì, biikàle anu bàtàfunya maja mushindu awu, ne bakaji bònsò badilaabe bilaabu kwisù, ne bàja maja ne bàpìcila mu cikondo cya dicyonkomoka. Ki Yoshùwà ùdìkoonya ku mutu, wàmba ne: “Mpindyewu cya dyenza ki cinyì?” Mpindyewu cyòcì aci menemene ki cidì munkaci mwa kwenzeka; kì mbònsò to, Nzambi twasakidila, kì mbònsò to, kadi bùngì bupìtè’s. Eyo.

168 Mpindyewu cidì munkaci mwa kwenzeka dìbà adi ncinyì? S’ki cyàkenzèkà aci. Kanwenaayiku nudifwanyikijila ne Muntu awu, Nyuma Mwímpè, ùdì ùbìnduluka kumpala kwa Taatù pàdibi bìkèngela bwa kwambaYe ciine aci anyi? Kaa, ekelekele! “Ndi—Ndi—Ndi mumwambile, kadi kàyi—kàyi—kàyi anu muswe bwa kuCiteeleja to. Ndi mumwambile cyòcì aci, ne mumulekele

mubalè ne mu Mukanda mene amu. Mwawa—mwawa mubiikidisha mwambi mutekete kampanda ne yèyè kumuleeja ne Yesu Kilisto ùdi umwèumwè awu makeelela, leelu, too ne kashidi. Kadi Udi mumanye cidi bwalu anyi? Kulekelaye umwe wa ku—kulekelaye umwe wa ku balami bàà mbuji bàà kale abu bàlwa mwaba ewu bwa kumwambilabo ne aci cìvwa cya cikondo cikwabo. Wamonu anyi? Wa bwalu yèyè mwine awu ùvwa ùnunka mupuuya mubi be dîbà dyàfikiyè mwaba awu adi, ùnunka mupuuya wà mbuji, Udi mumanye's, bifwanka, ne Udi mumanye's, ne bikwabo, ùnunka mupuuya mubi be dîbà dyàfikiyè mwaba ewu adi. Wamonu anyi? Kadi Ndi nKwambila's, mulami wa mbuji awu ùvwa ne bitàdì búngì bukumbane bimulamika pambidi pajimà apu, bwalu, Ndi nKwambila's, bu Wèwè mwa kwamba ne ùfundè dînà dyèndè mu cibejibeji, mbifwànyìne kwangata (dibalulula dya maalu a nsòmbelu wendè's) mbifwànyìne kwangata cyabibidi cimwe cya dibeki bwa kufunda myànzu yèndè. Eyowa's, Mukalenge, ncyà bushuwa ne mbamunange mwine mu citùpa cya buloba aci amu, kadi, Ndi nKwambila, ncyà bushuwa ne yèyè kî mmumanye mwa kudiisha mikooko to. Ki cintu cimwe pa bwalu abu ncyôci aci. Yèyè kèna anu muswe kuNteeleja to," mùdì Nyuma Mwimpè wàmba. "Ndi muteete kumwambila ne Wèwè udi umwèumwè awu makeelela, leelu, too ne kashidi, kadi yèyè—yèyè kèna anu muswe kucyenza to. Yèyè kadi ki cintu citulumuke cya citàmbe bunene cîntuku Mèmè mumone kacya bàNdela. Eyowa. Ne ekeleeziya mmujuuke kadi kumuvwija mutangidi wa bônso, mwepiskopo, ne bikwabo, bantu bônso bàmutèeleja yèyè. Kabidi pashiishe Udi mumanye mùdì bwalu? Bàdi bàngata . . . bàdi ne kaacintu kakese kàà kale kuntwaku kàdìbo bàbiikila ne 'télévision.' Udi unyungululapù kaacintu kakese mushindu ewu, nenku—nenku bakaji abu bàpátuka mu cyalu ne bènza bintu bya lukutukutu, tunkanzu twa tutùpà twa mishindu yônso. Kabidi, Udi mumanye's, bààbúngì bàà ku bàna Beebe bàà bakaji mbalengùbw- . . ."

"Kakaa, cya bushuwa ne kî nnanku to!" Nwamonu anyi?

169 Yèyè wàmba ne: "Eyowa's, s'ki cidìbo. Eyowa, s'ki cidìbo bènza. Hum. Bamwe bàà kùdìbo bàdi bàdila bèèla mbilà bwa kupeta ditàbuluja, Taatù, bamwe bàà kùdìbo bàdi naadi dijinga anu cya bushuwa. Bamwe bàà kùdìbo bàdi cya bushuwa bàlonda njila awu, bamwe bàà kùdìbo mbashààle anu ne lulamatu ku Dìyi adi ne mwabo mwônso. Bakwabo bôbò, Ncyèna mumanye cidi cìkèngelà kwenza to, bàdi—bàdi anu pambelu menemene pàapa's. Udi mumanye cidi bakwabo abu bènza anyi? Bàbèelulwila, bamba ne: 'Bôbò's bàdi anu musumbà wà bantu bàà lungenyi lusalàkàne.'"

"Ee, aci's cidi cìmfikisha ku didyumvwa bibi bya dikema's."

170 Kadi mpindyewu twànjàayibi kushintulula cimfwànyi. Mpindyewu Taatù, mwan'Èndè wa balume mmwànà mwimpè. Tatwènde anu—anu dîbà dyônso, ki Ndeji nyèyè ewu, Nyuma

Mwîmpè. Njila yônsò udi Nyuma Mwîmpè ùleeja awu, Yêyè mwambe ne: “Nêngiikalè mwa kwenda,” Ndeji mwambe ne: “Ndi. . .”

171 Mwânà mwambe ne: “Nêngëndè anu Neebe. Nêngëndè anu Neebe.”

“Kaa, kakuna nkatàmbe kutumbuka bibi be, mwanàànyì.”

172 “Nênye anu Neebe. Ndi ne dyeyemena Kùdì. Mémè mubange kucyoka, Yêyè neanjuule cianza ne neatungunuke anu ne kunkwata.”

“Kadi’s kùdì nyama ya ntambwe pa kakuna pààpa!”

173 “Kî mbwalu to bu mùdìbi ne Wêwè udi ku luseke lwànyì, kacyna ne cidici cishintulula to nansha kakese. Ndi mémè ngenda anu Neebe.”

“S’nyawu kùdì ntatu kumutu kwàka, mmbwebwe ya busenu.”

174 “Kî mbwalu to, bu mùdìbi ne Wêwè udi munkwate ku cianza; mémè nêngëndè anu Neebe. Nêngëndè anu Neebe.”

“Kaa, udi mumanye mùdì bwalu? Tatwèbè’s ùvwa ne ciibidilu cya kwenza nanku, wamonu’s. Abi mbîmpè. Eyowa’s, mukalenge.”

175 Ûbànda ku lusongo lwà kakuna aku. “Kaa,” mwàkambàYe, “Udi mumanye mùdì bwalu anyì, Taatù? Mwan’Ebe wa balume’s ùdì anu wêwè menemene. Kakùyi mpatà to, yêyè ùdì bu Wêwè pyòpyopyò. Dìyì dyônsò dyÛdì Wêwè wamba, yêyè ùdì ùtwaKù ‘amen.’ Mvwa—mvwa mumubuulwile mu Bible dituku adi, ne Cyàmba ne: ‘Yesu Kilisto ùdì umwèumwè awu makeelela, leelu, too ne kashidi.’ Udi mumanye ciwàye mwambe? Kwelaye lubila lukole ne kukùpayè byanza muulu, kwambaye ne: ‘Aleluuyah! Amen!’ Kaa! Ne Wêwè’s udi mumanye ne nCyambe mwab’ewu, mu—mu Dìyì Dyebe emu, Udi mumanye’s, mwaba wÛdì mwambe ne: ‘Byenzedi, ewu udi uNgiitabuujà, byenzedi bìNdi ngenza yêyè neàbyènzè pèndè’ awu?”

176 “Eyowa, Ndi mvuluka ne Ndi mufundile mwan’Àànyì wa balume awu Aci. Eyowa, Ndi mvuluka ne Ndi mufunde Aci.”

177 “Kaa, yêyè mmwenze ùmòna anu aci anyì, kwelaye anu lubila lukole ne kutupikaye muulu ne panshi, kutuutaye mukobolo ne: ‘Aleluuyah, Mukalenge. Umushaku maalu a pa buloba ônsò munda mwànyì. Mvwijeku mufwanangane ne Cyôci aci!’ Eyowa’s, Mukalenge. Ne bintu byônsò byàkenzàye abi!”

178 “Kaa,” mwàkacyàmbà Taatù, “Ndi—Ndi ne disanka bwa mwânà wa balume awu. Awu’s mmwânà wa balume mwîmpè maalu. Eyo. Ikàlà ne dîsù pa yêyè munda mwa ndambu wa bidimu, bwa ùmonè mùdiye—bwa ùmonè mùdiye wènda ùkola, ne mùdiye ùtanta.” Paanyima pàà ntanta ki bidimu kupitabi. “Yêyè mwine ùdì wènda ùya bishi?”

179 “Kaa, ekelekele, yêyè’s ùdi mene wênda ùdyunda ne mu ngàsà! Kaa, ekelekele! Yêyè’s ùdi anu. . . Yêyè’s ùdi anu ùyiisha ne mwèndè mwônsò kàyi wikishakù to. Mêmè ndi nKwambila ne, yêyè ùdi—ùdi menemene. . . Mona’s, yêyè ùdi wàngata mikooko ayi, mumanye mwa kuyitangila anu—anu mùtù Wêwè wenza amu. Yêyè kàakuyipèèshakù bisoosa bya pamutu pàà mbù abi to. Yêyè kàakuyipèèshakù bisoosa bya pamutu pàà mbù to. Pàdiyi yilwa mwaba awu, yàmba ne: ‘Tudi baswe kuya kashàala bàà mu ekeleeziya,’ yêyè ùdi wàmba ne: ‘Bwikilaayi mukana mwenu amu, kí ng’aci cidi cìnùkèngelà nansha! To, mukalenge. Cidi cìnùkèngelà ncyôci eci: “Nyingalalaayi ne nubatiijiibwe, muntu ne muntu wa kunùdi, mu Dìna dya Yesu Kilisto, bwa dilekelediibwa dya mpekaatu yenu. Nenupete kupà kwa Nyuma Mwímpè.” Eyowa’s, Mukalenge, ki cyàkambàye ncyôci aci.”

“Kaa, ncyà bushuwa ne ki cidiye wamba anyi?”

“Eyowa’s, Mukalenge, ncyà bushuwa ne ki cidiye wamba.”

“Ee, mushindu awu menemene’s ki wùNdi muCifunde.”

“Anu mushindu awu menemene ngùdiye ùCyàmba.”

“Hmm!” Eyowa, mukalenge.

180 “Yimwe ya kùdiyi yivwa yàmba ne: ‘Shààlaayi mu cimenga cya Yêlusàlèma too ne panwàvwàdikiibwà ne bukole bwa ku Dyulu. Pàànùtùùlukilà Nyuma Mwímpè, nenwikalè bantemu Bàànyì mu Yêlusàlèma, mu Yudààya ne mu Sàmaalèya, ne mu bitùpà bya kumfudiilu kwa buloba.’ Mmwenze ùbala anu aci anyi, kutuutaye mukòbolo ne: ‘Aleluuyah, ki cidi cìnùkèngelà ncyôci aci!’ Udi mumanye cidiye wenza? Ùdi ùkabàfikisha buludi kwòkò aku too ne pàdibo bàCìpeta, kwajiki, ùshàala anu naabo.

181 “Kadi pàkaadiyi yibanga kukokangana, yêyè ùdi wàmba ne: ‘Wup, wup, wup, anjì indilaayi kakese, anjì indilaayi kakese. Awu mushindu ngùtù mbuji yènza maalu, kí mmikooko to.’ Nwamonu anyi? Nwamonu anyi? Kaa, mingà misangu yidi yidisuyyakù ndambu yimukwàcila cijì, kadi yêyè ùyituutakù ndambu tumapi mu mwongo, wàmba ne: ‘Anjì indilaayiku kakese tung, sh-sh, sh-sh, sh. Bidi anu bimpè.’ Yêyè mmumanye cya bushuwa mwa kukontonona mikooko ayi. Eyowa’s, Mukalenge, Ndi nKwambila.

182 “Udi munanye mùdi bwalu? Mêmè kumona Mwepiskopo *Kampanda* wa mutambidile ùmwambila ne yêyè ‘kàvwa mwa kulwa mu cimenga *kampanda* bwa kwenzamu disangisha to.’ Kadi, Udi mumanye’s, Mêmè kumulombolaku mu mushindu *kampanda*, Mêmè kwamba ne: ‘Ndàaku anu kuya nansha bishi.’ Wamonu anyi? ‘Umusha mikaba yà mêyi eyi mu cyalu, ne kuyilekedi yipàtuka to.’ Twètù kukùya nansha bishi! Twètù kuya mu byòbì bimenga ebi, yêyè kwamba ne: ‘Ee, katwakutuula mfrang- . . .’

183 “Nenku Udi mumanye’s, dyabulu kuyaye kuntwaku, kwambaye ne: ‘Mémè ndi ndya Neebe lupiku ne ndi mwa kumupangisha bwa kubwela mu cimenga aci.’ Mémè kwamba ne: ‘Kwèna mwa kucyenzaku to. Mémè mumwambile bwa kuyaye, yèyè’s neaye. Ndi ndya neebe lupiku ne yèyè neaye.’ ‘To, to, to, to, to, to, mémè’s nèmmwambilè. Nènyemù ngàmbe ne: “Mpindyewu, nwènù bônso beena mudimu bàanyi, disangishaayi bônso. Kanwitabiku dikolesha dya maalu nansha dikese muneemu emu nansha, byónso bya dyondopa dya kùdi Nzambi ne bintu byónso bya kale bya Nyuma Mwimpè abi. Abi byàkamana kushààla paanyima ne bapostolo kùkaadi bidimu. Nwènù’s nudi bamanye ne kî mbimpè, kuntu kwàka.”’ Úteeta kubapeesha bisoosa bya pa mbù bya kale abi, bintu byónso bya mushindu awu. Bàdi . . .

184 “Kadi, Udi mumanye mùdi bwalu’s, nansha nanku yèyè kuya anu buludi kuntwaku. Yèyè kuya anu buludi kuntwaku ne kubangaye kukùpa lutende, lwà mu . . . Kadi Udi mumanye mùdi bwalu’s, mikooko ayi kubangayi kudya, kudyundayi ne mwàyì mwónso. Eyowa’s, Mukalenge. Pàdìyi munkaci mwa kupeta dyondopiibwa ne masangisha apu, nenku Udi mumanye’s, yàbúngì ya kùdiyi ya nsongàalùmè ayi kubangayi. Mona’s, kumonayi ne bu yòyò mwa kudya mushiki munene wà bisoosa bya dyelela nyama bu mùdi lutende alu. Udi mumanye cìdiyi myenze naabi? Bivwa bilenga bya dikema mu mushindu wà ne yòyì yàkaya lubilu kùdi beena mutumba, kwambayi ne: ‘Anjì labulaayibi Eci! Anjì labulaayibi Eci! Anjì labulaayibi Eci tǔng!’ Wamonu’s, cyuyüà mwaba awu kuumvwikaci anu mùdi cidi apa nunki eci’s. S’kì Cyòci aci mwab’ewu. Anu mwab’ewu’s ki Cyòci eci, Wamonu’s. ‘Nyingalalaayi anu cyanààna, muntu ne muntu wa kunùdi, ne nùbatijiibwè mu Dìnà dya Yesu, nwamonu’s, nupete Nyuma Mwimpè. Cidi bwa ewu yónso udi muswe, alwe, alwe kaaba aka bwa kumona cidi Bible mwambe.’ Wamonu anyi? Ne bóbò’s ki kupicilabò mu cikondo cya dicyònkomoka kuntwaku eku.”

185 “Kaa, ki mwan’Àanyi Mémè wa balume nyèyè awu’s! Ki mwan’Àanyi Mémè wa balume nyèyè awu. Ee, Wèwè udi ucinka ne yèyè ùkaadi mubobe mupwile anyi?”

186 “Eyowa. Cya bushuwa’s,” mwàkambà Nyuma Mwimpè. “Ndi mumupicishile ku mateeta. Balumyana wa yààyà, Mémè kumuteetela mu mushindu *kampanda*, kumuteetela mu mushindu *kansanga*. Mémè kumubyankula panshi, ne màsaamà, Mémè kumwela cibùlà. Mémè kumudyatakaja, Mémè kulekela dyabulu ùmwenza byónso bìvwàye mufwànyine kumwenza abi, yèyè ùjuukuluka anu kujuukuluka. Kulwaye anu mwine. Wamonu’s, ùjuukuluka. Mémè kumusaamisha. Mémè kwenza *cikampanda*. Mémè kumukùpa mu bulààlù bwa lupitaadi. Mémè kumuvwija apa pàNdi mwenze *cikampanda*, pàNdi mwenze *cikansanga*. Mémè kusàka mukajèndè bwa àmutombòkèlè, Mémè kusàka beena mutumba nendè bwa àmutombòkèlè,

Mémè kwenza byònsò. Abi kî mbishintulule kantu nansha kamwe to. Kwambaye ne: ‘Nansha Yèyè munshebeye, nansha nanku nêntungunukè anu ne kuMweyemena.’ Mémè kushebeya dîkù dyèndè. Mémè kwangata *bikampanda*, Mémè kwenza *bikansanga*, Mémè kwenza *bikankenga* byònsò, Mémè kwenza *bikampanda*, *bikansanga*, *bikankenga*. Yèyè ùvwa anu kacya wimana kamungulu ne: ‘Nansha Yèyè munshebeye, nansha nanku nêntungunukè anu ne kuMukwacila mudimu! Yèyè ngwanyì!’”

187 “Kaa! Ee, Ngeela meeji ne bìvwa bikèngela bwa Twètù kumubiikila ne kupatukaku nende mu mwaba mukese kampanda wà pabwàwù bwa kwenza diteekiibwa.”

188 Mpindyewu, taatù awu, mu Dipungila Dikulukulu, pàvwàye ùmvwa ne mwanèndè wa balume wàkolù, ne ùvwa mufike pa cipimu cya diteekiibwa. Kufika ku! Ùvwa mulediibwe mwànà, kadi, dîbà adi yèyè mmwànà mulume. Kadi dîbà adi kààkwikalakù mutàmbe anu mwànà wetù ewu to, mwànà wa balume anu wetù wa patupùpù ewu, too ne pàdiye ùboba ne ùleejakù cidiyè. Dîbà adi, ùdi ùmubiikila ùpátuka nendè dîbà adi.

189 Mpindyewu’s ki twètù aba, ekeleeziya. Nudikù anyì? Mpindyewu dîbà dyàpici kakese, muntu ne muntu àdisùmèku mènù ku munu, àcintè musuuka wèndè, ne àdikwàtè bikole ku mwoyi wèndè, anu bwa katanci kakese cyanàànà. Nwamonu anyì? Mpindyewu netushikike ekeleeziya. Mpindyewu pàdi ekeleeziya ùfika pa kaaba aku, Yèyè ùdi wamba ne: “Wèwè Maanàsè, udi wèwè apa nunku. Efàlàyimà, wèwè udi apa nunku.”

190 Dîbà adi ùdi ùpátuka ùya nende ku mwaba kampanda, taatù awu’s, ne ùmusòmbesha pa kaaba katumbuke mùdi *aka* nunku, ne wènza mushingà kampanda, ne bôbò bônso bàdi bàlwa bànyungulukilapù. Nenku ùvwa wamba ne: “Ndi muswe bwa bantu bônso bàmanyè ne ewu mmwanàànyì, ne ndi ngenza diteekiibwa dya mwanàànyì wa balume. Ne ndi muswe bwa muntu kanà yònsò àmanyè ne, kubangila ku mpindyewu, dîna dyèndè. . . Ndi mmuvwadika, civwalu cya pabwàci pambidi pèndè. Ne ndi muswe bwa numanye ne dîna dyèndè pa kabeji kàà shekè dîdi menemene anu mùdi dyànyì dîna. Yèyè mmwanàànyì, Ndi mmuteeka mu dîkù dyànyì, nansha mùdîbi ne yèyè ùvwa mwanàànyì wa balume kacya wàlediibwa. Kacya wàpeta Nyuma Mwîmpè, yèyè mmwan’Àànyì wa balume. Kadi mpindyewu Mémè nêmmushikikè mu bukookeshi bilondèshile mwaba. Udiyè yèyè wipata ku mudimu awu mmwipaciibwe, udiyè wàngata ku mudimu awu mmwangaciibwe.

191 “Ne bulelela, bulelela, Ndi nnwambila ne, wèwè mwambile mucì ewu, wèwè mwambile mukùnà ewu ne: ‘Tentèmùkà,’ ne kùyi wela mpatà munda mwa mwoyi wèbè to, kadi witabuuja

ne ciwāmbi aci necyènzeke, udi mwa kupeta ciwāmbi aci.” Nwamonu anyi? Ki bwalu mbwôbù abu; ki bwalu mbwôbù abu. Nwamonu anyi? “Yêyè mmwan’Àànyì wa balume.” Mbanganyì bàdì bamanye ne diteekiibwa, ne . . .bàvwa bateeka mwānà wa balume paanyima pàà yêyè mumane kufila cijaadiki cya ne yêyè ùkaavwa . . .Bantu bônso bàkaadiku babale Bible, dishikikiibwa dya mwānà wa balume.

¹⁹² Mpindyewu, Nzambi wàkenza cintu cyôci cimwecimwe aci bwa Wendè Mwānà pààkabāndishàYe Yesu pa Mukuna wà Dishintuluka dya mpala. KubāndaYè ne Peetèlò, Yakòbò ne Yone kuntwaku, abu mbantemu basatu bàà pa buloba. Kùvwa Yesu, Mòsà ne Eliyà, ne Nzambi, kuulu ku mukuna aku. Ki bôbò bàvwa biimāne pa mukuna apu abu. Nenku, dyakamwe, bôbò kutangila, ki Yesu kutumbishiibwaYe kumpala kwabo. Ncya bushuwa anyi? Mbanganyì bàdì bamanyè ne m’Mufundu? CyàkenzàYe ncinyi? Yêyè—Yêyè wàkaMuvwādika mùzùbì wà dibènga-kufwà. Ne yêyè mmwambe ne: “Civwalu Cyèndè civwa cibàlakana bu dībà.” Ncya bushuwa anyi? Ki ditutu kubabwikiladi. Ki Peetèlò ne Yone ne bakwabo, kudishindabo batwè mpala panshi. Ki kutangilabo, ki Mòsà ne Eliyà bàvwa biimāne bàba, munkaci mwa kuyiikilangana Nende. Pèndè’s Mòsà ùkaavwa mufwe, ne mujiikiibwe mu lukita lùvwa kalùyì lutèeka cimanyinu to kùkaavwa bidimu nkama mwandamukulu. Ne Eliyà wàkenza lwendu lwà mubānde mu Dyulu mu dikalu dya mvita, bidimu nkama yitaanu kumpala kwa cyôci aci. Yoyôyò! Kadi’s bàcivwa anukù! S’ki bôbò bàvwa bàyiikilanganà Nende abu. Nwamonu’s, Yêyè ùvwa mubāndishe Yesu bwa kubamonaYe, bwa kumona ne byônso abi bìvwa cinyì, kumona kuntwaku, kuMuleeja maaluu aa. Nenku bàvwa bàyiikilanganà Nende, bôosha Nende muyiiki’s.

¹⁹³ Pashiishe Peetèlò mwenze anu ùtàngila cyakabidi paanyima ne ditumbishiibwa adi dyumùke pa Yesu, kumonabo anu Yesu nkàayèndè, ki Dìyì kufuminaDi mu ditutu adi, dyamba ne: “Ewu m’Mwan’Àànyì munanga, Muteelejaayi Yêyè! Dìnà Dyèndè didi menemene anu mùdì Dyànyì Mémè mpindyewu. Muteelejaayi Yêyè!” Ki cyôci aci, bānà bàà balume batèèkiibwe, anyi bashikikiibwe.

¹⁹⁴ Mpindyewu, s’ki mwaba ngwôwò awu wùdì Nzambi ùteeta bwa kufikisha ekeleeziya wa beena Mpenta mu Mukanda wà Efeso. Nwamonu anyi? Nudi—nudi nuumvwa anyi? Bìkèngela twimanyikè, bwalu dībà dyātāmbi kuya be, nwamonu’s, bānà bàkaadi basòmbe bàbùngila. Kadi pàànyì mvwa njinga kupweka too ne ku mvensa udi kaaba aka mene ewu, kadi ncyēna mwa kukùfika to, too ne—too ne ku mvensa wa 13, nwamonu’s, citùpà cya ndekeelu, “batwibwe citampi cya Nyuma Mwimpè wa mulayi.” Netwangate aci mu dyalumingu, nwamonu’s. Tàngilāayi. Mpindyewu, mushindu kaayi, ncinyi

cìdì citùbwejàmu, ne mushindu wutùdì tulamiibwa kùdì Cyôci eci.

¹⁹⁵ Kadi mpindyewu “kushikika,” udi ushikikiibwa mushindu kaayi? Dyambedi udi wanji kulediibwa mu Bukalenge ku Nyuma Mwîmpè. Mbanganyi bàdì bamanyè aci? Eyo. Cìdì cìlondà, udi mudyànjila kulongolola ku cinyi? Diteekiibwa. Ncinyi ciine aci? Udi mudyànjila kulongolola ku dishikikiibwa.

¹⁹⁶ Kaa, Mwaneetu wa bakaji Scott, ngeela meeji ne ngwêwè, wêwè udi musòmbe apa ewu. Kí ngwêwè uvwa kwànyi kumbelu leelu ewu awu anyi? Dilongesha diikàle dinyunguluka mwaba kampanda pa buloba bujimà, mu bitùpà bishiilèshìilàngàne bya ditunga, nkààdi muumvwe bàdyàmbe, bikole be, ne Yesu ùdì pa buloba apa, wènda wèndakana mu mubidi kampanda, Ùdì ùbwela ne wènzà *cikampanda*. Aci mmashimi! Nyuma Mwîmpè Wendè ngudi apa, ne Yèyè ùdì ùteeta kushikika Ekeleeziya Wendè, bwa kuteeka Ekeleeziya Wendè ewu mu bulongame, kuMushikika mu Buloba bulaya, bwa bààmòna mwa kubwela . . . bwa beena lukuna bônso biipaciibwè.

¹⁹⁷ Maanàsè kèna mwa kwangata buloba bwèndè to. Mémè ncyèna mwa kwenza disangisha dya dyondopa pàdì cyabibidi cimwe cya . . . pàdì . . . Ndi nya kuntwaku nyiisha dibatiiza mu Dîna dya Yesu Kilisto, kadi—kadi bânà beetu ba-trinitaires bàmba ne: “Kaa, yèyè’s mmwena Yesu Nkàâyèndè wa kale.” Kabidi ncìyikù mwa kuya lwà kuntweku ne kwenza disangisha dya dyondopa dya kùdì Nzambi pàdì cyabibidi cimwe cya kùdìbò bàmba ne: “Dyondopa dya kùdì Nzambi ndîmpè,” ne bààbûngì bàà kùdìbò bàsànkila bishima bya kùdì Mukalenge kadi bàmba ne: “Ee, ndi ngiitabuujà ne Mwaneetu Branham mmuprofeta, kadi imana nkwambile cintu kampanda. Pàcìdì anu Nyuma pambidi pèndè, ne yèyè munkaci mwa kujingulula apu, yèyè mmusadidi wa Mukalenge. Kadi Dilongesha dyèndè ndibole, kí nDîmpèku to.” Mbanganyi bàkaadiku bumvwe bintu bya budingidingi bya mushindu awu? Anyi mbya kùdì Nzambi anyi kí mbya kùdì Nzambi to. Ncyà bushuwa’s. Anyi byònsò n’Nzambi anyi kí n’Nzambi mu kantu nansha kamwe to. Mushindu awu ngùdìbì. Kadi mmunyi muwàcyènzà? Maanàsè kàyi muswe kushààla mulame cyèndè citùpà cya buloba to, Efàlàyimà kàyi muswe kushààla mulame cyèndè citùpà cya buloba to, Gaadà kàyi muswe kushààla mulame cyèndè citùpà cya buloba to, Benyàminà kàyi muswe kushààla mulame cyèndè citùpà cya buloba to, bônso bàpàtuka lubilu pambelu apa ne beena Pelèshètè, ne bônso badìsangè naabo cimbòndambònda. Mmunyi mutwàshikikiibwà? Kadi tudi balediibwe ku Nyuma Mwîmpè, twètù bônso. Ncyà bushuwa anyi? Tudi balediibwe bwa kufika ku cinyi? Badyànjila kulongolola . . . Nenku paanyima pàà twètù bamane kulediibwa, tudi badyànjila kulongolola ku diteekiibwa, bwa kushikikiibwa mu Mubidi wà Kilisto. Nudi numona cìndì njinga kwamba aci anyi?

198 Mubidi wà Kilisto ncinyi? Bamwe mbapostolo, bamwe mbaprofeta, bamwe mbalongeshi, bamwe mbatangadiki, ne bamwe mbampaasata. Ncya bushuwa anyi? Ki kutùdì babìikidiibwe. Bakwabo bàdi ne mapà a myakulu, dyandamuna dya myakulu, lungenyi, dimanya, bishima, dyenza dya bishima, mapà ónsò mashiilèshìilàngàne aa. Kadi cidibo benze ncinyi mpindyewu? Mbabiteeke byòbì abi mu cyenzi kakese. Cinyi? Mbabilekèlèlàngàne kabiyi bikòntonona mu mushindu wùndiku mèmè ewu nciyi mumanye ne ngwà bishi to. Umwe ùjuuka, wàkula mu myakulu, ne mukwabo ùtùngunuka, wàkula ne: “Brrr, brrr, brrr, brrr, blii.” Uh-huh. Muiyishi ùdi mwa kwikala munkaci mwa kuyiisha, wènza dibìikila dya ku cyoshelu, kadi muntu kampanda ùjuuka, wàkula mu myakulu wàmba ne “Aleluuyah! Butumbi kùdì Nzambi!” Muiyishi yèyè anu—yèyè mudidinge mutungunuke ne diyisha dyèndè adi, mwikàle mulaaba maanyi, dîbà adi bantu bàdi bàmba ne: “Muntu mutwe cimpinga wa kale.” Nwamonu’s, mbwalu kî mbalongeshiibwe to.

199 Bible mmwambe ne nyuma wa bapofeta ùdi ùkòòkela muprofeta. Nzambi kî mmufidi wa cibwejàkàji nansha. Pàndi mwimane kaaba aka apa, anyi mwambi kampanda mu dilaabiibwa dya Nzambi, nansha wèwè muswe bishi bwa kwakula mu myakulu, shààla mupuwe too ne pìikalà Nzambi mujikije kuneeku. Dîbà adi wèwè mwakùle mu myakulu, kaciyèna mwa kwikala anu dyambulula kampanda dya Mufundu to, bwalu Nzambi mmwambe ne kwènji dyambulula dîdì kadiyi ne mushinga to. Kadi mmukenji wà buludi mutùmina muntu kampanda. Ùnkòkèku musangu nansha wumwe, funkunaku munu pa musangu wumwe cyanàànà kacya wùkaadiku Nyuma Mwimpè, mu dijingulula, mwambile muntu kampanda, mwambe mwambulule Mufundu kampanda misangu ne misangu. Yèyè ùvwa ùmwambila cintu kampanda cibi kùdiye ne cintu kampanda cìwàye mwenzè, ne cintu kampanda cìwàye ne cya kwenza anyi cintu kampanda cìwà ne cya kwenzeka, anyi cintu kampanda cya mushindu awu. Ncya bushuwa anyi?

200 Ki mùdì kabidi dyakula dya mu myakulu ne dyandamuna! Kwòkò muntu mu ekeleeziya wàkula mu myakulu, ne mukwabo ùyàndamuna, cyàmbè nunku: Twàmbè ne Mwaneetu Neville ùdi ùjuuka kuulu wàkula mu myakulu, ne mwaneetu wa balume ewu kaaba aka ùfila dyandamuna, wàmba ne: “Ambilaayi muntu udi apa ewu ne makeelela yèyè mmupatuke kaaba aka mukenze cintu kampanda cìwà kaciyi cikèngela bwa kwikalaye mwenzè to. Mpindyewu ngangabuka mmumwambile leelu ewu ne ùdi ne kansere. Nda ùkàlongòlòlè bwalu abu, wàlukilè kaaba aka ùdìlongòlòlè ne Nzambi.”

Muntu awu yèyè mwambe ne: “Cya bushuwa, mbulelela.” Dîbà adi Nzambi ùdi neenu.

201 Kadi netwikalè mwa kucyenza mushindu ewu bishi? Nwamonu anyi? Nyawu bìdi anu ne: “Blmp, brrr, brrr, brrr.”

Anu ku mpuukapuuka, mushindu wònsò kanà, kakùyikù dishikikiibwa nansha dya kanà to. Mpindyewu aci's cidi... Nwamonu's, beena Efeso, bàdi bàteeta... Nwamonu's, bàdi bàpangila aci. Nudi numona mùdibo bàcipangila anyi? Twètù tudi badyànjila kulongolola ku diteekiibwa dya bânà bàà balume! Mpindyewu mbanganyi bàdi bùmva cindi njinga kwamba aci? Elàayi byanza muulu. Diteekiibwa! Tudi tulediibwa mu Nyuma wa Nzambi, bushuwa, tupeta Nyuma Mwimpè, ne twela lubila ne: "Abba, Taatù! Aleluuyah! Butumbi kùdi Nzambi!" Twètù tudi, ncyà bushuwa, twètù tudi bânà, kadi katwena ne kutùdi mwa kafika to. Katwena mwa kutuuta kuzengeja beena Pelèshètè to.

²⁰² Tàngilàayi Billy Graham mwimane pàapa. Ne Mùzùlùmanyi awu wàmba ne: "ÚCileejè's."

²⁰³ Tàngilàayi Jack Coe mwimane pàapa nàka. Ne muntu udi ubènga kwitaba diikalaku dya Nzambi awu, mwena église de Christ awu ùlabulangana ku cyanza ne muntu udi ubènga kwitaba diikalaku dya Nzambi awu kuntu kwàka ùtwa ku ciine aci. Pèndè ne mmwena Kilisto, kadi mwikàle ùlabulangana ku cyanza ne démon wa mùdi Joe Lewis, mwikàle munanyi wa lungenyi mudikàdile, ùya too ne ku dyela dya Nzambi mulawu ne wàmba ne "kakùtu cintu pàaci ne n'Nzambi to, nansha bishi, kacya kwònsò eku," ne bintu bya mushindu awu. Ne ekeleeziya wa ùdibìikila ne mbeena église de Christ, bàlabulangana nende ku cyanza, ne bàbènga kutwa ku cya Mwaneetu Jack Coe. Mmunyi mutwikalàku mwa kwenza cintu nansha cimwe? Ne beena Mpenta pààbò, bààbùngì bàà kùdìbo, bàlwishangana nende; pààbì, muyiishi yònsò wa mu ditunga dyetu edi's bìvwa bikèngela kutwanganaye nende nkundù, ne kwamba ne: "Nzambi, tuululaku Bukole Bwebe." Nwamonu's, ki bwalu mbwòbù abu's, mwaba wùdiye kàyikù mwa kushikikiibwa to.

²⁰⁴ Efàlàyimà kî mmuswe kushàala to. Umwe wa kùdìbo ùya lwà apa, tudi tusangana Maanàsè ùya lwà apa, wàmba ne: "Kaa, ekelekele, Mukalenge wàmpeeshi budimi bwimpè bwa matala!" Pashiishe, ki Gaadà ulwàlwa apa ewu, wàmba ne: "Ee, mpindyewu, anjì indilabi kakese túng. S'bidi bikèngela bwa nkune mpondà, kadi ndi ne cya kupeta anu pàanyi matala. Aleluuyah!" Nudi numona anyi? Bwalu bwa matala kî mbukutangile wèwè to; peta wèwè mpondà, mpondà ki cyebe cya kukuna. Wèwè kwèna ne cya kumuna mikooko to pàdibi ne udi ne cya kumuna ngombe. Nzambi mmuswe kushikika Ekeleeziya. Kadi yònsò wa kùdìbo mmuswe kwenza anu cintu cimwecimwe aci. "Aleluuyah!" Kùyikù mwa kubambila cintu pa bwalu abu to. To, to. Bòbò bàcidi anu ne ngiikàdilù wa mbuji awu ne: "Tukùng, tukùng, tukùng, tukùng, tukùng, tukùng, tukùng." Nwamonu's, wèwè kùyi mwa kubambilaku to. Ncyà bushuwa. Mpindyewu, aci kî ncilelela anyi? Nenku kùyikù mwa kushikika ekeleeziya to. Nwamonu anyi?

205 Ekeleeziya ùdi ne cya kwikala mudyànjila kulongolola ku diteekiibwa dya bânà, kùdì muntu. . . Nzambi ùdi mwa kwangata muntu ne kumuteeka mu dîkù, ne kumupeesha cintu kampanda. Aci, dyambedi, citeetàayi bi numone nî ncyà bushuwa. Bible's mmwambe ne nùteetàayi nyuma. Muntu ewu nyewu ùdi wàmba mùdiye ne cintu kampanda, kadi nùciteetàayi bi numone nî ncyà bushuwa. Cyôci cya bushuwa, tûngunukàayi naaci. Dîbà adi ambàayi ne: “Mukalenge, tûtûminèku cintu kampanda cikwabo.” Tûngunukàayi nwenda nuya, nwamonu's, tûngunukàayi anu ne kwenda kuya too ne pàngatà muntu yònsò kèndè kaaba. Dîbà adi nenumone ekeleeziya wa Nzambi mùdiye ùbanga kupeta kaaba kèndè. Dîbà adi's ki pàbangà beena Pelèshètè kwalukila cyanyima. Tuputulu netuumuke, nsuki neyileepe too ne kwinsi, kwîsù nekwoweshiibwe màyi; bifwanka nebiikalè kabìciyikù to. Ncyà bushuwa. Pàabangà Ekeleeziya kubwela mu Bukole bwèndè bunene abu, patwikalà ne Ànaaniyà kampanda ne Saafilà, ne ndambu wa kùdìbo. Eyowa's, mukalenge. Nenumone pìimanà Ekeleeziya wa cijila awu mudìsangishe mu Bukole Bwèndè, mushikikiibwe bilondèshile myaba bu bânà balume bàà Nzambi, batèekiibwe mu dîkù dya Nzambi, Ekeleeziya wa bukole mwimane kwàka mu butumbi Bwèndè. Kaa, aci's ki cìdìYe ùvwila.

206 Nudi numona ne nkule kwa mushindu kaayi kutùdi twètù tusanganyiibwa anyi, bânà beetu? Kanùyikù mene mwa kupetangana pa Mifundu. Ne muntu kanà yònsò, muntu kanà yònsò udi kàyiku mwa kumona dibatiiza dya màyi mu Bible, mu Dînà dya Yesu Kilisto, anyi ùdi mpofo anyi cintu kampanda kaciyi mu cyôci mu byeledi byèndè bya meeji. Ncyà bushuwa. Ne mwaba awu ngùdi mvita minene yìsanganyiibwa.

207 Nê—nêngambilè muntu kanà yònsò wantwàdila Mufundu nansha bàwàmba ne ngwà bishi mùdìku muntu mubatiijiibwe mu dînà dikwabo kaayi pa kuumusha mu Dînà dya Yesu Kilisto, mu ekeleeziya mupyamupya. Anyi, pìikalàye mubatiijiibwe mu mushindu mukwabo kanà wònsò, bìvwa bìkèngela bwa kubatiijiibwaye cyakabidi mu Dînà dya Yesu Kilisto, bwa kupetaye Nyuma Mwîmpè. Ulwe undeeje. Cya nanku kacyenaku to. Mudimu mutumangana naawu wa nanku kawenaku to. Yesu pàakambàYe mwaba awu ne: “Ndààyaaku, nùlongeshè matungà ònsò, nubàbàtìizè mu dînà dya Taatù, Mwânà, ne Nyuma Mwîmpè,” Taatù, Mwânà, anyi Nyuma Mwîmpè, nansha umwe kî ndînà to, nansha umwe wa kudìbo, Peetèlò wàkakùdimuka, anu paanyima pàà matuku dikumi, kwambaye ne: “Nyingalalaaayi, ne nubatiijiibwe mu Dînà dya Yesu Kilisto, bwa dilekelediibwa dya mpekaatu.” Ne mu myaba yònsò mu Bible. . .

208 Ne pashiishe ki bakwabo bàvwà babàtìijiibwe mbòbò aba mwaba awu, mu mushindu mukwabo, kùdì Yone, anu bwa kanyinganyinga cyanàànà. Pòlò kwambaye ne: “Bidi

bikèngela bwa nubatiijibwe cyakabidi. Bidi bikèngela bwa nulwe cyakabidi.”

209 “Kaa, kadi twètù’s tudi babàtìijibwe kùdì muntu munene wa cijila, Yone. Yèyè awu’s ngwákabàtiiza Yesu.”

210 “Eyo, eci ki Evanjeeliyo. Eci ki Nyuma wa Nzambi uvwa ne cya kubuuludiibwa kùndì. Mémè ndi mupostolo wa Mukalenge, ne bu mwanjelo wa mu Dyulu mwa kulwa ne kuyiisha cintu cikwabo nansha bàcyàmba ne ncinganyi. . . .”

211 Lekèlaayi ncibalè. Bible mmwambe ne: “Bu mwanj-. . .” Pòlò wákamba ne: “Bu mwanjelo wa mu Dyulu mwa kwamba cintu cikwabo nansha bàcyàmba ne ncinganyi,” mwepiskopo, mwepiskopo wa mutàmbidile, paapà, mutàngidi, cyònsò cìdiye mwa kwikala aci, “yèyè muyiishe cintu cikwabo nansha bàcyàmba ne ncinganyi pa kuumusha Eci cìndì mémè munuyiishe, èdiibwè mulawu.” Kakwenaku nansha. . . Twètù katùtukù ne bilele bya nanku to. To, mukalenge. Wèwè udi anu. . . Cintu bu nanku kacitukù to. Wèwè, twètù. . . Kadi dîbà adi—dîbà adi, nwamonu’s, bantu kabeenaku mwa kumona aci bwa cinyi? Bantu kî mbasweku—kî mbasweku—kî mbasweku kwitabuuja aci bwa cinyi? [Muntu kampana mu disangisha ùdi wàmba ne: “Badyànjila kulongolola”—Muk.] Nwamonu anyi? Muntu kampana wàlengì anu pa bwalu menemene mwaba awu, Gene. “Badyànjila kulongolola,” menemene. Bwa cinyi? “Bònsò bàdì Taatù muMpeeshe” (nebènzè cinyi?) “nebalwe kùNdi.” Mushindu mene wùdìbi menemene’s! “Bònsò bàdì Taatù muMpeeshe nebalwe—nebalwe kùNdi.” Mbwalu kaayi ebu kùndì’s, mùndì nteeta kupeta mwab’ewu? S’ki bwalu mbwabu. Eyo.

212 Lekelaayi ngànji mbaleku mvensa ewu nenku pashiishe nènñwàmbilè cìdì Pòlò, bintu bìdì. . . Dìyiisha mene dîndì mémè muyiishe diloolo edi, cìdì Pòlò mwambe pa bìdì bitàngila didyànjila-kulongolola ncyôci eci, pa bìdì bitàngilà dibatiiza dya mu mâyi mu Dînà dya Yesu, dibatiiza dya Nyuma Mwîmpè, dishikikiibwa mu ekeleeziya, ne bikwabo. Cìdiye mwambe ncyôci eci:

Ndi nkèma be (mwikàle wàmabila beena Ngalàtiyà aba’s) munùdì nwènù buumùke ne lukasa lwònsò kùdì ewu uvwa munùbùkile ku. . . ngàsà wa Kilisto (Nudi bamfwishe bundu bwa dikema, mu ngaakwilù mukwabo’s, panùdì balekele muntu kampana ùbwela ne ùnùkùdimuna ùnùmusha ku Cyôci aci) ùnùtuma ku evanjeeliyo mukwabo;

Pàakù kakuyi evanjeeliyo mukwabo to, kadi kùdì bantu bàdì bànùtácisha, ne baswe kupangisha evanjeeliyo wa Kilisto, kupangisha Evanjeeliyo mulelela wa Kilisto.

213 Kadi tàngilààyaaku. Mpindyewu, nwavulukaayi ne, Pòlò ngwâkenzeja muntu yònsò uvwa kàyi mubatijiibwe mu Dîna dya Yesu Kilisto, bwa kulwaye kubatijiibwa cyakabidi mu Dîna dya Yesu Kilisto. Mbanganyi bàdi bamanyè ne aci ncilelela? Mbanganyi bàdi bamanyè ne Pòlò ngwâkamba ne minsokòntù eyi yìvwa misokoka kacya ku difuka dya dyulu ne buloba, ne yìvwa mimubuulwila yêyè ne, twètù tuvwa badyànjila kulongolola bwa kwikala bânà bàà Nzambi ku diteekiibwa, ne ùvwa m’Pòlò? Tàngilàayi apa cyàkambàye:

Kadi nansha twètù, anyi mwanjelo wa mu dyulu, munuyiishe evanjeeliyo mukwabo nansha wa bishi mushùlàngàne ne utudì twètù banuyiishe, èdiibwè mulawu.

214 Kwàmbi anu ne: “Ncyêna ngumvwangana neebe ku méyi to, mukalenge” to. Èdiibwè yêyè anu mulawu. Lekelaayi mbale mvensa udi ulonda awu:

Bu mutwàmbi kumpala amu, nenku nyewu ncyamba cyakabidi mpindyewu ne: Muntu nansha bàmwamba ne nganyi yêyè muyiishe evanjeeliyo mukwabo nansha wa bishi mushùlàngàne ne utùkaadi twètù bamane kupeta, èdiibwè mulawu.

215 Ncyà bushuwa. Mpindyewu, mwaneetu wa balume, mwaneetu wa bakaji, piikalàbi ne ùvwa n’Nzambi dituku adi, ne ndi—ndi ngamba aci, mwikàle ntekèmena ne kî ndipanga dya kaneemu to, nguvwa mumfikishe ku dimona dya kaacintu kakese aka. . . Mpindyewu, ndi ndyumvwa musaluke’s; ncyêna ngeela meeji ne ndi musaluke to, ndi anu mbèneshiibwa mu kuyiisha. Ndi ndyumvwa ncìciyi mu mêmè to ne nnulama kaaba aka too ne pândi mmanya ne nukàadi nubùngila ne bacyòke. Kadi, kaa, ndi. . . Bu nwènù—bu nwènù nanshà mwa kumanya mùndi njinga bwa nwènù kwikalamu’s! Nwamonu anyi? Nenku mêmè, pândi ngamba cyòci eci cyakabidi, pândi. . . pàvwàYe mwambe. . . pâmvwà mwambe ne: “Ncifwànyine kwenza. . .”

Kwambaye ne: “Udiku muswe kumona cìdi ndekeelu anyi?”

216 Ki mêmè kutangila paanyima ne kudimona mêmè mwine mudyòlòle mwaba awu pa bulààlu. Ncyà bushuwa ne nwènù nudi bammanyè mêmè ewu kùkaadi ntanta bule bukùmbàne bwa kumanya ne—ne—ne ndi nnwambila Bulelela. Ndi muswe kunukonkaku cintu kampanda, bu mwàkambà Samwèlè kumpala kwa kwelabo Shawùlà maanyi, kacya nkàadikù munwàmbile cintu kampanda mu Dîna dya Mukalenge cìvwà kaciyi cilelela anyi? Ncyà bushuwa anyi? Cìtu misangu yònsò anu cilelela. Kacya nkàadikù mulwe kunulomba mfranga anyi nî ncinyi cyònsò cya mushindu awu bu kàà pa luse anyi? Bwàlà, nwamonu’s, kacypu. Kacya nkàadikù mwenze cintu kampanda pa kuumusha kuditacisha ne mwànyì mwònsò bwa kunulombola kùdi Kilisto anyi? Menemene.

217 Mpindyewu mbaswe kwamba mûndi mwena lubuku, nudi bamanye's, mumonyi wa maalu àdi matàmbe byumvwilu. Mu bushuwa bwa bwalu, bikèngela bwa bintu abi bìjuukè, Bible mmwambe ne nebijuuke. Anu mwàkakàndameenàbo Mòsà kùdi Yambèlè ne Yanè, bôbò bààkenza pabwîpi ne cintu cimwecimwe cyàkenzà Mòsà, mu mushindu wà ne byàkafika ku diteetangana dya makanda. Ncya bushuwa. Kadi vulùkàayi ne, Yambèlè ne Yanè kabàvwa mwa kwondopa to. Kabàvwa mwa kwondopa to. Bàvwa mwa kutwala bipùpù, kadi kabàyi mwa kubyumusha to. Nwamonu anyi? Eyo. Mpindyewu, Nzambi ngudi Mwondopi. Dîyi dya Nzambi didi dîshààla anu Bulelela.

218 Ndi muditacishe bwa kwikala ne meeji matooke kunùdi. Ndi muditacishe bwa kunwambila Bulelela. Ndi—ndi . . . bidimu bitwè ku makumi asatu ne cimwe mbyôbi ebi, bìndi mwimane mu cyambilu eci, ngâya ngâlùkila, bidimu makumi asatu ne cimwe bulubulu, ne dîngà dituku ndi mwa kuya mu Butumbi nguumukila ku cyambilu eci. Kùvwakù mukàjàanyi, mwanàanyi wa bakaji, taatù wanyi, mwaneetu wa balume, bààkajiikiibwà bônso luseke lukwabo lwàlwa, balunda bàà mushinga mukole. Nkàadi mutangila misheete yabo ya bafwe ne bilongò bitèeka mwaba ewu, ne mmanya ne dîngà dituku wanyi pàanyi newuteekiibwe mwaba awu. Mpindyewu, aci ncilelela. Kadi ne meeji matooke ônsò, ne mwoyi wanyi wônso, ndi nkwambila ne mwoyi wanyi wônso ne, ndi ngiitabuuja ne ndi munuyiishe Evanjeeliyo mulelela wa Mukalenge Yesu Kilisto. Mémè ndi ngiitabuuja ne bivwa bikèngela bwa nubatiijiibwe, muntu ne muntu wa kunùdi, mu Dîna dya Yesu Kilisto, bwa nupete dibatiiza dya Nyuma Mwimpè. Ne dîbà kanà dyônso diwacyènzà adi, necikutwadile disanka, ditalala, mwoyi mule, bwimpè, bupole, kalolo, lutuulu, diitabuuja.

219 Nnku dituku adi, civwà cingenzekele mu dinda adi aci, ncyèna mumanye to. Ncyèna mwa kwanji kwamba ní mvwa nsanganyiibwa panwapa mu mubidi wanyi ne mumone anu cikeena-kumona cyanààna, anyi ní mvwa muumushiibwe panwapa, muye kwòkù aku. Ncyèna mumanye to, ncyèna mwa kucyamba to. Cintu cimwepele cîndiku mémè mumanye, ncyà ne mvwa—mvwa misangu yônso anu ne bwôwà bwa kufwa, kaaba kakese kàà kalonda aku. Kadi, mpindyewu, ncîyi nciina ne nkwèpi kwikalà Yesu mufwanyiine kubènga kulwa kungangata to, ncivwa nciina aci to, bwalu mémè—mémè ncivwa nciina aci to; kadi nkwèpi kûndi mufwanyiine kutwilangana neebe kadi wèwè mwikàle anu kaadifwima kakese kàà kale kènda kàbùuka mu lupeepele. Kadi ngàmòmu mpindyewu. Pâmvwà mumone bantu abu, bàvwa anu beetu bàà cya bushuwa aba. Ne bàvwa mbantu bàvwàku musangu kampanda baswikàkàne naanyi panu pa buloba, nansha mene ne mukàjàanyi wa kumpala awu. Yèyè kàvwa mukàjàanyi to, ùvwa mwaneetu wa bakaji. Yèyè kàakambiikilakù bu bàyendè to, wàkambiikila bu

mwanaabo wa balume munanga. Kamùvwa nì mbya disangila dya mulume ne mukaji, nì mbya milowu ya mushindu awu to, kabìvwakù bifwànyìne kwikalamu nansha; bìvwa bipwàngàne, bìvwa kalolo, cìvwa bupwàngàne.

Ndi mèmè ndyela nkonko, ncyêna mumanye to, ndi ndyela nkonko ne: Ki cyôci aci cyàkamònàye, kumpala kwa yêye kushiyangana ne buloba anyi? pàvwàye ùsanganyibwa mu lupitaadi mwàmwa, pàngàakamubiikilà, ne kwambaye ne: “Billy, wêwè’s utu muciyiishe, utu mwakule pa bwalu abu, kadi,” mwàkambàye, “kwêna mumanye ne ncinyi to.” Kwambaye ne: “Ncicyenà kabidi ne milowu ya kushààla to.”

²²⁰ Ndi ndikonka ní ki cyôci’s, ne muntu mukulakaji wa difwana dya Nzambi, munsantu F. F. Bosworth awu, wàkiimana mu cyambilu eci, wàkayiisha naanyi mu bitùpà bishiilèshilàngàne bya buloba. Mukulumpe F. F. Bosworth, nwênù bônso, pamwe ne bônso, nuvwa bamumanye; muntu mukulakaji wa difwana dya Nzambi, wa bunsantu. Mèbà abidi kumpala, ee, bu lumingu lumwe nanku awu anyi yibidi kumpala kwa kushiyanganaye ne buloba, ngákaya kúdiye ne ki yêye awu mulàadika kwàka, lwà, ne bidimu biipacila ku makumi citeema. Tuboko twèndè tukese tukulakaji atu twolola, katu kèndè kakese kàà dibàla aku ne myedi mitooke ku cibàngà. Mèmè kukwata mukulumpe awu mu maboko àànyì kadi kwela lubila lukole ne: “Taatu wanyì, taatu wanyì, makalu a mvita a Izaleela ne babàndi bàà pa tubalu twawu.”

Bwalu bu ní kùvwakù muntu uvwa muleeje mpala wa Mpenta ne uvwa mupostolo mulelela, s’ùvwa ng’F. F. Bosworth awu, Evanjeeliyo mukezuke, mululame, mulelela, nwamonu’s, ùvwa m’Bosworth awu. Neku pàngàakamukwàta mu maboko àànyì, ki mèmè kwela lubila lukole ne: “Taatu wanyì, taatu wanyì, makalu a mvita a Izaleela ne babàndi bàà pa tubalu twawu.”

²²¹ Kwambaye ne: “Mwanàànyì wa balume, shààla mu budimi bwa bwambi.” Yêye ne: “Údyanjidilè yimwe yà ku nsongààlùmè eyi mu madimi a bwambi a ku baabèndè, wêwè ne mushindu, kumpala kwa bôbò kuyabo kafikisha dikolesha dya maalu búngi cyanààna kuntwaku. Ùbàtwàdilè Evanjeeliyo mulelela údi nende awu, mwanàànyì wa balume.” Kwambaye ne: “Wèbè mudimu wà bwambi kí mmwanjì kubanga bwa kafika ku ciikalàwu to.” Yêye ne: “Wêwè ucidi Branham wa mupyamupya menemene.” Yêye ne: “Wêwè ucidi mwànà, mwanàànyì wa balume.”

Mèmè kwamba ne: “Mwaneetu Bosworth, mèmè’s ndi ne bidimu makumi anaayi ne mwandamukulu.”

²²² Yêye ne: “Kwêna mwanjì kubanga to.” Yêye ne: “Kulekedi bayiishi bàà nsongààlùmè bàà beena Mpenta aba bàya kuntu kwàka ne lukutukutu búngi cyanààna, bàya bàkeela mulungu

mu cintu ciine, nenku bènza ne ba—ba-diplomates bônso ne ditunga dijimà bàbangè kuCilwisha kumpala kwa wèwè kukùfika.” Yèyè ne: “Tungunuka nda kumpala, Mwaneetu Branham, tungunuka ne Evanjeeliyo ùdi nende awu.” Yèyè ne: “Mémè—mémè ndi ngiitabuuja ne wèwè udi mupostolo, anyi muprofeta wa Mukalenge Nzambi wetù.”

223 Mémè kumutangila, mémè kumuupukila mu maboko àànyì. Mémè kwamba ne: “Mwaneetu Bosworth, ndi muswe nkweleku lukonko. Ncikondo kaayi cya mwoyi wèbè cìvwà citàmbe kwikala cya disanka. . . dîbà dya wèbè. . . bidimu byebe byònsò byùdi muyiisheyiishe?”

Yèyè kwamba ne: “Mpindyewu mene, Mwaneetu Branham.”

Mémè ne: “Udi mumanye ne udi munkaci mwa kupùnga ne lufu anyi?”

Yèyè ne: “Mémè ncyèna mwa kufwaku to.”

Mémè ne: “Ncinyì. . . Bwa cinyì bùdi mufwànyìne kwambila ne eci ki cyebe cikondo cya citàmbe kwikala cya disanka?”

224 Kùvwa kaaciibi kakese. Kwambaye ne: “Ndi mulaale panshi mwab’ewu ne mpala mutàngija ku ciibi cyacya. Mu kasunsa kanà kònsò, Yèyè ùndi munange awu, ne Yèyè ùnkaadi muyiisheyiishe ne mutwätwätwe nyama ku mikolo awu, ónsò aa. . . mwoyi wànyì, Yèyè nealwile ku ciibi cyàcya bwa kungangata, nenku nènye Nende.” Mémè kumutangila, kwela meeji, mvwa—mvwa mutangile anu mushindu wumwewumwe wùmvwà mwa kwikala mutangila Abraham, Izàkà, anyi Yakòbò awu.

225 Mémè kumukwata ku cyanza, kwamba ne: “Mwaneetu Bosworth, tudi bônso babidi twitabuuja Nzambi umwèumwè awu, tudi twitabuuja cintu cimwecimwe aci. Ku ngàsà wa Nzambi mémè nènyiiishè too ne pùumukà mweyelu wà ndekeelu mu mubidi wànyì. Nènshaalè ne lulamatu kùdi Nzambi ne mwànyì pàànyì mwònsò mùndi mwa kushààla amu. Mémè ncyakudyaku cibanga pa Evanjeeliyo to nansha luseke kaayi anyi mwaba kaayi. Nènshaalè ne lulamatu ne mwànyì pàànyì mwònsò mùndi mwa kushààla amu. Mwaneetu Bosworth, nèntwilanganè neebe mu Buloba butàmbe bwímpè muwikalà kuyiku nsongà amu. . . anyi muwikalà kùciyikù mwa kukulakaja amu, kadi nsongà.”

226 Yèyè ne: “Newikalèmu, Mwaneetu Branham, kùtácishi meeji nansha.”

227 Nenku dîbà dimwe kumpala, mèbà abidi kumpala kwa yèyè kufwa. . . paanyima pàà ngondo mitwe ku yibidi, mvwa ngeela meeji ne yèyè ùkaavwa ùpùnga ne lufu dîbà adi, mukàjàànyì kubwelaye ne kumumonaye (yèyè ùvwa misangu yònsò anu ùtwa mukàjàànyì mushinga), ne pashiishe Mandamu Bosworth. Nenku mèbà matwe ku abidi nanku yèyè ùvwa mulààle panshi apu, muye mu tulu. Kukàtamukayè, kutangilaye, ne kujuukaye

dyakamwe pa bulààlù pàvwàye apu. Kwambaye ne: “Mààmù, ee, ncyèna mukumoneku to kùkaadi bidimu! Papa! Mwaneetu Jim, mona’s,” mwàkambàye, “twǎnjìbi kumona tǔng, wèwè ewu’s uvwa umwe wa ku bǎngààkakùdimwishà mucima kùdì Mukalenge, ku Joliet, mu Illinois.” Mwine awu ngukààvwa mufwe kùkaavwa bidimu makumi ataanu. Nwamonu anyi? Eyowa’s! Kwambaye ne: “Wèwè udi Mwaneetu wa bakaji *Kampanda*. Eyowa, ngàkakufikisha kùdì Mukalenge ku—ku disangisha dya ku Winnipeg. Eyowa. Mona’s, Mwaneetu wa bakaji *Kampanda* nyèyè ewu. Ncyèna mukumone to... Eyowa, wamonu’s, wèwè wàkalwa kùdì Mukalenge mu mwaba *kampanda*.” Ki munda mwa mèbà abidi malondangane kwikalaye ùlabulangana ku cyanza ne aba bàakafikishàye kùdì Mukalenge. Kwalukilaye buludi wènda wènda tamakatamaka too ne ku kaaba kèndè, kudilongaye panshi, kuvungaye byanza, ki pààkù kùmba kùjika’s. Mwaneetu F. F. Bosworth mmukabwele mu Buloba bùvwà Yesu mundejeje bufuku abu abu anyi? Piikalàbi nanku, yèyè ùdì ùsanganyiibwamù mwikàle nsongààlùmè diloolo edi. Nzambi ikishisheku musuuka wèndè awu. Ne mèmè ngiikalèku misangu yònsò anu ne nsòmbelu wa lulamatu bwa ngaamonaku mwa kubwela mu bwòbù Buloba abu. Ne ngiikalèku musadidi wa—wa Kilisto wa lulamatu lwà menemene!

228 Mèmè ndi ne bundu bwa nsòmbelu wanyi. Ndi ne bundu kumpal-...Ndi—ndi...Piikalàbi ne ndi mwenze mpekaatu kumpala kwenu, nudi—nudi beena dibanza dya kulwa kucingambila. Nwamonu anyi? Mèmè ndi nditacisha bwa kwikala ne nsòmbelu mululame mu kantu kònsò kàdì Nzambi ùmpèsha mushindu wà kwenza ku ngàsà Wèndè. Nwamonu anyi? Nwamonu anyi? Kadi, tǎngilààyi, nwènù balunda bàanyi, nudi beena dibanza kùdì panwikalà bamanyè cintu kampanda cidi cibi mu nsòmbelu wanyi, nùlwaayi nùngambile nanku. Nenku, tǎngilààyi, mèmè ndi mwena dibanza kunùdì dya kwimana apa ne kunuyiisha Evanjeeliyo mulelela. Ndi mwena dibanza kunùdì dya cyòci aci, bwalu ndi ntekemena ne nèmmonè yònsò wa ku mpala yenu ayi, nsongààlùmè ne nsongààkàji, anu dyàmwàmwà dya mukàlu awu. Kùdì anu mweyelu wumwepele cyanààna pankaci pàà mwaba wunùdì nusanganyiibwa mpindyewu ewu ne kwòkù aku. Mpindyewu, aci ncyà bushuwa. Mwaba awu wùdikù.

229 Nenku Nzambi wa ngàsà yònsò àswèkù, Nzambi wa mu Dyulu awu, kì mbya dipanga dya kaneemu to, kadi ne kaneemu kònsò, “Papa,” dituku adi dinene ditwàleejiibwà cyakabidi patwikalà baalùkile pǎnwàpa ne bapetè cyakabidi mibidi yetu ya pa buloba ayi, bwa twamona mwa kunwa, ne kudya tumuma twa mvinyo ne mamuma a mu buloba abu. “Nebiibakè nzu bu kabiyi bwa mukwabo kusòmbayèmu to. Nebakune madimi a mvinyo kabiyi bwa mukwabo kuyidyaye to.” Nwamona anyi?

Muntu ùkùna budimi bwa mvinyo, mwanèndè wa balume ùbwàngata, ne pashiishe mwânà wa balume wa awu awu ùbwàngata, ne wa awu awu pèndè. Kadi kî mmu ebu bwalu to; yèyè neabukune ne neashaalemu. Nwamonu's, aci ncyà bushuwa. Netwikalèmu kashidi. Nenku, mu Buloba abu, mmoneku yònsò wa kunùdi.

²³⁰ Ne ndi mumanye ne ndi ngaakula kaaba aka nansha mene ne bambi bàà ba-trinitaires. Nenku, nwènù bânà beetu, ncyèna ngamba nunku—ncyèna ngamba nunku bwa kutapangana ku mwoyi to. Ndi pàànyì Trinitaire, mèmè ewu, ntu ngiitabuuja busatu, byambiibwà bisatu bya Nzambi (Taatu, Mwânà, ne Nyuma Mwîmpè), kadi kaciyi Nzambi yisatu to. Nwamonu anyi? Ndi ngiitabuuja ne kùdi byambiibwà bisatu, kakùyì mpatà to, ndi ncìtabuuja aci ne mwoyi wànyì wònsò, “Taatu, Mwânà, ne Nyuma Mwîmpè,” kadi kî n’Nzambi yisatu to. Bidi anu byambiib- . . . bisatu anyi midimu yisatu ya Nzambi. Nzambi musangu kampana wàkasòmbela mu buuTaatu, buuMwânà, ne mpindyewu Nyuma Mwîmpè. N’Nzambi umwèumwè awu mu midimu yisatu. Nenku yidi ne . . .

²³¹ Ne Taatu, Mwânà, ne Nyuma Mwîmpè, kî n’Dîna dya Nzambi to. Nzambi ùdi ne Dîna dimwepele, ne Dîna Dyèndè n’Yesu. Bible mmwambe ne: “Famiye mu Dyulu mmwinyika Dîna dya Yesu, ne famiye pa buloba mmwinyika Dîna dya Yesu.” Ncyà bushuwa. Pa nanku Nzambi ùvwa ne Dîna dimwepele, Dîna dya buntu. Yèyè ùvwa . . . ùvwa ne dîna divwà dibìikidiibwà ne Yehowa-yilè, Yehowah-laafà, ayi yìvwa mmyânzù Yèndè ya Bunzambi. Kadi Yèyè ùvwa ne Dîna dimwepele: Yesu! Nenku ki Yèyè awu.

²³² Ne mu bulelela, nwènù bânà beetu, panwikalà kanùyì nutwa ku cyànyì to, nwavulukaayi ne mèmè—mèmè—mèmè nèntwilanganè neenu mwàmwa, nansha bishi. Nwamonu anyi? Mèmè—mèmè nèngiikalèmu neenu. Nenku Nzambi anubeneshe. Ne mèmè ndi mununange.

²³³ Nenku ndi muswe bwa ekeleeziya àvulukè mpindyewu ne, mu dyalumingu mu dinda netwàngacilè kubangila apa ne nènditacishè bwa kubènga kunùlama too ne kupita dîbà ibidi, bwa twamòna mwa kwenza disangisha dya mu mappingaja, twètù ne mushindu, ne bu mèmè mwa kwenza mûngènji diloolo edi emu, dîbà dikumi wa bufuku ne tusunsa makumi asatu. Nudikù numfwila luse anyi? Nwènù balunda bàànyì, kî nkutùshàadile cikondo cyàbûngì to, munanga wànyì. Ndi—ndi nnùbìikila “munanga wànyì” bwalu ki cinùdi. Nudi—nudi bananga bàànyì. Nudi bamanye mùdi bwalu anyi? Twánjàànyì anu . . . Mufundu ngwòwò ewu muumvwile. Pòlò wàkamba ne: “Ndi neenu mukawu (Ekeleeziya Wendè's) mwikàle ne mukawu wà kùdi Nzambi, bwalu ndi munùbangile.” Ki bwalu mbwòbù abu's, aci's ncileea bwalu. S'ki bwalu abu. “Bwalu ndi munùbangile, munùbangidile Kilisto, bu mushikankunde virgo.”

²³⁴ Mpindyewu, pìikalàbi ne cyôci aci cìvwa cilelela mu dituku adi, yêyè wàkamba...Bôbò, bantu abu bààkangambila, ne: “Yesu nealwe kûdi wêwè, ne wêwè neutùleejè kùdiYe,” bu mushikankunde virgo. “Wêwè neulumbulwishiibwe ku Diyì diwakabayiisha adi.” Nenku, tàngilàayi, pìikalàbi ne mêmè ndi nnuyiisha anu menemene cìvwa Pòlò muyiishe wendè ekeleeziya aci, kèndè kasumbu kôkò kabwelè, keetu pààkù nekabwele, bwalu tudi ne cintu anu cimwecimwe aci. Amen.

Twìnyikààyaaku mitu yetu mpindyewu patùdì twamba ne, “Nzambi akubeneshe” apa. Mpindyewu...?...mpaasata wetù munanga, Mwaneetu Neville.



DITÈÈKIIBWA ² LUA60-0518
(Adoption ²)

DILONDANGANA DYÀ MALONGESHA PA DITÈÈKIIBWA

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu diisâtù diloolo, mu matuku 18 a ngondo mwitânù, cidimu cya 1960, mu Branham Tabernacle mu Jeffersonville, Indiana, U.S.A. Ndyumusha pa mukaba wa mêtù ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2021 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org